



সাহিত্য-সমালোচনী সভার প্রতিষ্ঠাতা

এবং

বাল্য সাহিত্যের অকৃত্রিম স্নেহদ,

সহোদর-সদৃশ-স্নেহাস্পদ

শ্রীযুক্ত কুমার রাজেন্দ্রনারায়ণ রায়কে

স্মরণচিহ্নস্বরূপ

এই সামান্য উপহার

প্রদত্ত হইল।



## বিজ্ঞাপন ।

সাহিত্যসমাজে সুপরিচিত আমার এক জন অক্ষয়-  
প্রীতিভাজন অভিন্নহৃদয় আত্মীয় এই প্রবন্ধগুলিকে  
প্রভাত-চিন্তা নামে প্রকাশ করিতে অনুরোধ করেন ।  
তদীয় অনুরোধের বশবর্তী হইয়া, আজি বাঙ্গাবের এই  
প্রভাত-চিন্তা নিতান্ত সশঙ্কচিত্তে বঙ্গীয়-সাহিত্য-সমাজে  
উপস্থিত করিলাম । যাঁহারা বাঙ্গালা ভাষায় অনু-  
রাগী, যদি ইহা কিঞ্চিৎ পরিমাণেও তাঁহাদিগের মনো-  
মদ ও তৃপ্তিপ্রদ হয়, তাহা হইলেই আমার যত্ন ও  
পরিশ্রম সফল জ্ঞান করিব ।

প্রভাত-চিন্তার মুদ্রণাদি কার্য্যসম্পর্কে আমার  
একান্ত স্নেহের পাত্র, ও প্রিয়তম ছাত্র শ্রীমান বাবু  
হরকুমার বসু বিস্তর সাহায্য করিয়াছেন । আমি  
তজ্জন্য তাঁহার নিকট কৃতজ্ঞ রহিলাম ।

শ্রীকালীপ্রসন্ন ঘোষ ।



# সচীপত্র ।

বিষয়	পৃষ্ঠা ।
নীরব কবি ... ..	১
অভিমান ... ..	৭
প্রকৃতিভেদে রুচিভেদ ... ..	১৭
মনুষ্যের জীবনচরিত ... ..	৩০
নিন্দকের এত নিন্দা কেন ? ... ..	৪৪
✱ ভালবাসা ... ..	৫২
লোকারণ্য ... ..	৬৩
রাজা ও প্রজা ... ..	৬৯
✱ বিনয়ে বাধা ... ..	৭৮
হরগৌরী ... ..	৮৪
শক্তি ... ..	১০০
সাধনা ও সিদ্ধি ... ..	১০৯

---



# প্রভাত-চিত্ত

## নীরব কবি ।

[বাহারা প্রতিস্থাবহ ছন্দোবদ্ধ শব্দের সহিত শব্দ গাঁথিয়া, কথার ছটায় সকলকে মোহিত করিতে চেষ্টা করেন, অশিক্ষিত ইতর লোকেরা তাঁহাদিগকেই কবি বলিয়া আদর করে । ঈদৃশ কবি এবং কাব্যের পরীক্ষাস্থান কণ ১] কবিতাও তালে তালে পঠিত বা উচ্চারিত হয় ; তাহার সঙ্গে সঙ্গে শরীরও তালে তালে বিবিধ ভঙ্গিতে নাচিতে থাকে । পারস্য, উর্দু, হিন্দী, বাঙ্গালা ও সংস্কৃত প্রভৃতি ভাষায় এইরূপ কাব্যের অভাব নাই । ভাট, ভট্টাচার্য্য এবং কবিওয়ালা বলিয়া প্রসিদ্ধ গাথকদিগের অধিকাংশই এই শ্রেণীর কবি । কোন একটা নাম দিতে হইলে, [ইহাদিগকে শাব্দিক কবি বলিয়া নির্দেশ করা অসঙ্গত নহে ।] কারণ, শব্দবিজ্ঞাসের চাতুরী বিনা ইহাদিগের কবিতায় আর কিছুই থাকে না । যদি কিছু থাকে, তাহাও প্রায়ই স্বাদগ্রাহী ব্যক্তির ভোগোপযোগী বলিয়া গ্রাহ্য হয় না ।

[সহৃদয় রসজ্ঞ ব্যক্তির কাব্যের অন্বেষণ করিতে হইলে আর একটু উর্দ্ধে আরোহণ করেন । তাঁহারা ছন্দোবদ্ধ বাক্য গুনিয়াই গলিয়া পড়েন না, অথবা কতকগুলি সুললিত শব্দ পাইয়াই মোহিত হন না । যে কথ্যটি প্রতিপথে প্রবেশ করিয়া ক্লান্ত আনন্দ উৎপাদন করিল, তাহা হৃদয়স্থান পর্য্যন্তও গমন করে



কি না, ইহাই তাঁহারা অগ্রে বিচার করেন। যে কথায় অন্ত-  
রের অন্তরনিহিত কোন লুক্কায়িত রস উছলিয়া না উঠে,  
সৌন্দর্য্যের কোন নূতন মূর্ত্তি, মানসনেত্রের সন্নিধানে উপস্থিত  
না হয়, হৃদয়-তন্ত্রী নূতন এক তানে বাজিতে না থাকে, কিংবা  
ভাবভরে আত্মা ছলিয়া না পড়ে, তাঁহাদিগের নিকট তাহা  
কাব্য বলিয়াই গৃহীত হয় না। ইংলণ্ডের অধিকাংশ কবিই  
ছন্দোবিত্তাস-নৈপুণ্যে শেক্ষপীরের শিক্ষাগুরু; অনেক বালিকার  
কবিতাও সেই কবিকুলভূষণ বিশ্বাশ্রয় কবির কবিতা অপেক্ষা  
গুনিবার সময় অধিক মিষ্ট;—জয়দেবের গীতগোবিন্দে যেরূপ  
পদলালিত্য, অভিজ্ঞানশকুন্তল কি উত্তরচরিতের আদি, অন্ত,  
মধ্য কোথাও তদনুরূপ কিছু লক্ষিত হয় না;—নৈষধের পদ-  
মাধুরীর নিকট রত্নাবলী কিছুই নয় বলিয়া উপেক্ষিত হইতে  
পারে। স্ক্রুচিসম্পন্ন বিচক্ষণ লোকেরা তথাপি শেক্ষপীর, কালি-  
দাস এবং ভবভূতিরই পূজা করেন, এবং নৈষধের নাচনি  
ছন্দের কবিতাপুঞ্জকে এক দিকে সরাইয়া রাখিয়া, রত্নাবলীর  
সহিতই আশা করিয়া নিরাশ হন এবং নিরাশ হইয়া আশা  
করেন। কারণ, ভাষা চরণদাসী, ভাবই কাব্যের প্রাণ। যেমন  
আভরণের তুলনায় রূপ, তেমন শব্দের তুলনায় ভাব, অথবা  
শাব্দিকের তুলনায় ভাবময় কবি।

কতকগুলি চিন্তাশীল ব্যক্তির বিবেচনায় কবিতার আর এক  
গ্রাম আছে। তাহা অতীব উচ্চ এবং দুগ্নিরীক্ষ্য। যাহা লিখিত  
হইল, তাহাই কাব্য এবং যিনি লিখিলেন, তিনিই কবি, এমন  
কথা তাঁহারা স্বীকার করেন না। তাঁহাদিগের মতে লিখিত  
চিত্রে কাব্যের আভা মাত্র প্রাপ্ত হওয়া যাইতে পারে, কিন্তু প্রকৃত  
কাব্য এক অনির্কচনীয় অমৃত। মনুষ্যের অপূর্ণ এবং অপবিত্র  
ভাষা উহাকে ধারণ করিতে সমর্থ হয় না। যাহার হৃদয়

যতক্ষণের জন্ত তাদৃশ কাব্যের বিলাসক্ষেত্র হয়, তিনি ততক্ষণের জন্ত হিমাচলের গান্ধীর্যের জ্ঞায়, আকাশের অনন্ত বিস্তারের জ্ঞায়, এবং যোগরত তাপসের ধ্যানের ন্যায় নিস্তরু ও নীরব রহেন। তিনি হৃদয়েই সেই স্বর্গীয় সুধাসিদ্ধুর কণিকা মাত্র পান করিয়া কৃতার্থ হন ; লৌকিক বাক্য এবং লোকব্যবহৃত বর্ণমালায় কিছুই ব্যস্ত করিয়া উঠিতে পারেন না। লোকে স্বপ্নাবস্থায় যেরূপ দৌড়িতে চাহে, কিন্তু কোনমতেই দৌড়িতে পারে না ; কথা কহিবার জন্ত ব্যাকুল হয়, কিন্তু কোন কথাই অধরে ফোটে না ; তিনিও তথাবিধ দশা প্রাপ্ত হইয়া স্তম্ভিত-ভাবেই অবস্থিত থাকেন। প্রকাশের জন্ত যত কিছু চেষ্টা সমস্তই বিফল হয়, প্রকাশ করিবার প্রবৃত্তি পর্য্যন্তও তিরোহিত হইয়া যায়।

কোন ভবের অন্তস্তলে প্রবেশ করা যাহাদিগের বুদ্ধির অসাধ্য, প্রাপ্ত সত্যটিকে নিতান্ত লঘু কথা বলিয়া উপহাস করা তাহাদিগের অসম্ভব নহে। তাহারা এইরূপ মনে করিতে পারে যে, কিছু না বলিয়া এবং কিছু না লিখিয়াই যদি কবির অলৌকিক সম্পদ সম্ভোগ করা যায়, তবে ইহা অপেক্ষা আর সৌভাগ্য কি ? ইচ্ছা হইবে, আর অমনি ধ্যানস্থ হইয়া কবির দেবাসনে উপবেশন করিব ; বীণাপাণি মূর্ত্তিমতী হইয়া সম্মুখে উপস্থিত হইবেন ; প্রকৃতি তদীয় প্রিয়নিকেতনের দ্বার উদঘাটন করিয়া দিবেন ; এবং সংসার কাব্যকুঞ্জের রমণীয় মূর্ত্তি ধারণ করিবে। কিন্তু কবিত্বের এইরূপ আবেশ প্রকৃত প্রস্তাবে মনুষ্যের ইচ্ছাধীন কি না এবং সকলের অদৃষ্টে সকল সময়ে ঘটে কি না, গভীর-ভাবে চিন্তা করা উচিত। ইচ্ছা করিয়া কিছু একটা লিখিয়া তুলা আপনার সাধ্য ; ইচ্ছা করিয়া, কিছু একটা বলিয়া, লোকের চিত্তবিনোদন করাও আপনার সাধ্য। কিন্তু ইচ্ছা করিয়া কে

কোথায় প্রেমিক হইতে পারিয়াছে ? আর ইচ্ছা করিয়া কবে কে আপনার হৃদয়কে আপনি বিগলিত করিতে সমর্থ হইয়াছে ? ইচ্ছা বুদ্ধিকে চালনা করিতে পারে, মনকেও অনেক দূর উত্তেজিত করিতে পারে ; কিন্তু শক্তি ও প্রকৃতির মূল-প্রস্রবণ ইচ্ছার অগম্য স্থান ।

চন্দ্রমা মৃদু মৃদু হাসিতেছে, তরঙ্গিণী মৃদুতরঙ্গনাদে নিজ হৃৎখের গীত গাইতেছে, বৃক্ষ-পত্র মৃদুসঞ্চালনে অটবীর প্রণয়াহ্বান প্রকাশ করিতেছে, এ সকল অভ্যস্ত কথা অনেকেই অভ্যাসবলে লিখিতে পারে । কিন্তু চন্দ্রমা যখন হাসিতে থাকে, তখন তাহার সঙ্গে সঙ্গে এ সংসারে কয়টি হৃদয় হাস্তে উৎকুল হয় ? কে কল-নাদিনী তরঙ্গিণীর তটে উপবিষ্ট হইয়া, তাহার হৃৎখের গীতের সহিত নিজ হৃৎখের গীতকে মিশ্রিত করিতে ক্ষমতা রাখে ? তরুলতার আহ্বানে ইতরজনভোগ্য ভৌতিক ভোগস্থলের আহ্বানকে কর জনে অবহেলা করিতে পারে ?

হর্ষ, হৃৎখ, ক্রোধ ও প্রীতি প্রভৃতি ভাবনিচয়ের ভাষা চিরকালই গাঢ়তার মাত্রানুসারে ভিন্ন ভিন্ন মূর্তি ধারণ করে । যে হর্ষ, যে হৃৎখ, যে ক্রোধ, অথবা যে প্রীতি নিতান্ত তরল, সহজেই তাহা বাহির হইয়া পড়ে । যেমন তরল ভাব, তেমন তরল ভাষা । মনুষ্যের মন অল্প হর্ষে শফরীয় ত্রায় চঞ্চল হয়, অল্প আনন্দে অধীর হইয়া উঠে, হাত্তোল্লাস কিছুতেই নিবৃত্ত হয় না । অল্প হৃৎখ অশ্রুজলেই বিগলিত হইয়া যায় । অল্প মাত্রার ক্রোধ ক্রুকুঞ্চে ও তর্জ্জন গর্জ্জনেই ব্যস্তিত হয় । অতি অল্প প্রেম অল্পজলা শ্রোতস্বতীর ত্রায় সর্বদা খল খল করে । কিন্তু যে হর্ষ শরীরের রোমে রোমে অমৃতরসের ত্রায় সঞ্চরণ করে, যে হৃৎখ গরলখণ্ডের ত্রায় হৃদয়ের মর্ম্মস্থানে লগ্ন হইয়া থাকে, যে ক্রোধ চিত্তকে তুষানলবৎ অহর্নিশ দাহন করে, যে প্রেম একবার

নিশার স্বপ্নের স্রায় অলীক বোধ হয়, আবার আত্মাকে আনন্দ ও নিরানন্দের অধিকার হইতে বহু উর্দ্ধে উত্তোলন করে, তাহা প্রায় কখনও দৃশ্য কি শ্রাব্য ভাষায় পরিষ্কৃতিত হয় না ।

কবিতার ভাষাও এই নিয়মের অধীন । লঘু কবির যত কিছু সম্পদ, তাহা শব্দেই পর্য্যবসিত হয় । তদপেক্ষা গাঢ়তর কবির শব্দ অল্প, রসগান্তীৰ্য্যই অধিক । কিন্তু যখন কাহারও হৃদয়ে কাব্যের সেই অমৃতস্রোত অতিপ্রবলবেগে প্রবাহিত হয় ; যখন মন করুনার ঐক্সজালিক পক্ষে উজ্জীন হইয়া তারকায় তারকায় প্রকৃতির জলদঙ্করলেখা পাঠ করে ; এবং গিরিশঙ্ক, সাগরগর্ভ, আলোক ও অন্ধকার সর্বত্র এক সঙ্গে বিচরণ করে ; যখন জ্ঞান অনুভূতিতে ডুবিয়া যায়, এবং বুদ্ধি অনুসন্ধানে বিরত হইয়া, তরঙ্গের সহিত তরঙ্গের স্রায় হৃদয়ে বিলীন হয় ; তখন ভয়-বিহ্বলা ভাষা আপনিই জড়ীভূত হইয়া যায় । কে আর কাহার কথা প্রকাশ করে ? প্রকৃতি নীরব, কাব্য নীরব, কবিও তখন স্পন্দহীন ও নীরব । ভাবলহরী নীরবে উথিত হয়, নীরবে লীলা করে, এবং নীরবেই বিলয় পায় । মুগ্ধা বালা যেমন দর্পণে আপনার সুন্দরচ্ছবি আপনি দেখিয়া, চকিত নয়নে চাহিয়া থাকে, জ্যোৎস্নাময়ী যামিনী যেমন আপনার স্নেহে আপনি হাসে, বনাস্তবায়ু যেমন আপনার দুঃখে আপনি ক্রন্দন করে, কবিও তখন সেইরূপ আপনার ভাবে আপনি পরিপূর্ণ হইয়া জীবন্মূর্ত্তের স্রায় আপনাতে আপনি নিমজ্জিত হন । কাহার নিকট কি কহিবেন, কে কি শুনিয়া কি কহিবে, কে প্রশংসা করিবে, কে নিন্দা করিবে, কে তাঁহার কথায় মুগ্ধ হইবে, কে অস্পৃষ্ট থাকিবে, ইত্যাদি কোন চিন্তাই তাঁহার তদানীন্তন মনোময় জগতে স্থান প্রাপ্ত হয় না । ধর্ম্ম অধর্ম্ম, পাপ পুণ্য, সুখ দুঃখ, হর্ষ বিষাদ, প্রত্যক্ষ ও অপ্রত্যক্ষ, জীবন ও মৃত্যু সমস্তই তখন তাঁহার

মিকট এক হইয়া যায় । সংসার আছে কি নাই, ইহাও তখন তাঁহার বোধগম্য থাকে না । তাঁহার নিজের অস্তিত্বও কণ-কালের জন্য বিলুপ্ত হয় ।

যাহারা বিধাতার প্রসাদে এইরূপ কবি-প্রকৃতি লাভ করিয়াছেন, এবং লোকাভীত কবিত্বের পূর্ণ আবির্ভাবে সময়ে সময়ে এইরূপ অভিভূত হন, আমরা তাঁহাদিগকে চিনি আর না চিনি, তাঁহারাই সাধক, তাঁহারাই সিদ্ধ এবং তাঁহারাই মানবজাতির প্রাণ । তাঁহাদিগের উদাসীনতাই আসক্তি, কাঠিন্যই কোমলতা, দৈর্য্যই ভোগ, এবং তৃষ্ণাই তৃপ্তির শেষ । সমীরণ তাঁহাদিগের স্বর্গোপম পবিত্র স্পর্শে শীতল ও সুরভি হয় বলিয়াই আমরা বাঁচিয়া আছি, নচেৎ এই স্বার্থচিন্তাময় সংসার-মরুতে সকলেই প্রাণে মরিতাম । পৃথিবী তাঁহাদিগের পদরেণু প্রাপ্ত হইয়াছে বলিয়াই মনুষ্যের নিবাসযোগ্য হইয়াছে, নচেৎ ইহা নিরম-নিবাস হইতেও ভয়ঙ্কর বেশ ধারণ করিত । তাঁহারা ব্যবহার করিয়াছেন বলিয়াই মনুষ্যের ভাষা অদ্যাপি শোকহৃৎখের সময় মনুষ্যের দগ্ধহৃদয়কে শীতল করিতেছে ; নিরাশায় আশ্বাস দিতেছে ; দয়া, উৎসাহ, শান্তি ও প্রেম প্রভৃতি অতিমানুষিক ভাবের ভারবহন করিতেছে ; নচেৎ ইহা পিশাচকণ্ঠ হইতেও অধিকতর শ্রুতিকঠোর হইত ।

# অতিমান ।

মানবপ্রকৃতির কতকগুলি তার সুস্থমসদৃশ;—কোমল ও  
কমনীয়, স্মরণ করিলেই হৃদয় দ্রবীভূত হয়। কতকগুলি তার  
আবার একান্ত ভীত ও কঠোর। তৎসমুদয়ের পরিচিহ্ননে  
মনে ভয় কি ভক্তিরই সঞ্চার হয়; প্রীতি অথবা কারুণ্যসেই  
লেশও অহুত হয় না। যদি কোন সুন্দর ও সুহকার যুবা,  
ব্যাধীভীতকুরঙ্গের স্তায়, শত্রুভয়ে বিহ্বল হইয়া, কাহারও পদতলে  
আসিয়া লুটাইয়া পড়ে, বৈবর্ণিধাতনের জন্ত স্বকীয় শক্তি  
প্রয়োগ না করিয়া, পরের দিকেই চাহিয়া থাকে এবং আপনার  
কর্তব্যের ভার পরের স্বন্ধে ফেলিয়া দিয়া, অবিরলধারায় অশ্রু-  
মোচন করে, তাহার প্রতি ভক্তি কিম্বা শ্রদ্ধার উদ্বেক হওয়া  
যার পর নাই অস্বাভাবিক। কিন্তু তাহার তৎকালীন পরিমাণ  
সুখচ্ছবি, তাহার সেই কাতর চক্ষু, কাতর ভাবভঙ্গি এবং ততো-  
ধিক কাতর গদগদকণ্ঠ অবশ্যই হৃদয়কে কারুণ্য পরিপ্লুত করিতে  
পারে। আশ্রিত জনের প্রতি অহুসাগ মহাত্মাদিগের প্রকৃতি-  
সিদ্ধ। পক্ষান্তরে, যদি কোন ব্যক্তি বিপদের পর বিপদে আক্রান্ত  
হইয়াও, একটুকু না হেলে—অভাবনীয় হুঃখরাশির মধ্যে আকর্ষ  
ভুবিয়াও, হুঃখকে হুঃখ বলিয়া গণনা না করে, এবং পরসহায়তার  
শত প্রয়োজন সত্ত্বেও, কাহারও প্রীতি কি সহানুভূতির প্রত্যাশী  
না হইয়া, আপনার বাহুবলের উপরই দর্পভরে দণ্ডারমান হয়,  
তাহার সেই কঠোর ভাব দর্শন করিয়া, কেহই প্রণয়বলে বিগ-  
লিত হইবে না। যে প্রণয়ের ভিত্ত্যারী নহে, কে তাহাকে আপন

হইতে আদর করিয়া প্রণয় উপহার দিতে পারে ? কিন্তু তাদৃশ ক্রভঙ্গশূন্য, স্বাবলম্ব পুরুষের গাভীৰ্য্য ও গৌরব চিন্তা করিলে, মনে স্বভাবতঃই যে, ভয় কি সজ্জমের ভাব উপস্থিত হইবে, ইহা অবধারিত কথা ।

আমরা অভিমানকেও মনুষ্যপ্রকৃতির এমনই একটি কঠোর জ্ঞাব বলিয়া নির্দেশ করিতে ইচ্ছা করি। অভিমানের সহিত কোমলতার কোন সম্বন্ধ নাই। অভিমান দয়ার ভ্রাম্য পরের হুঃখে গলিয়া পড়ে না, শ্রীতির ন্যায় পরের চক্ষে চক্ষু দিয়া তাকাইয়া থাকে না, এবং মমতার ভ্রাম্য পরকে আপন করিতেও যত্ন করে না। অভিমানীর প্রতি লোকের যে আপাততঃ বিদ্বেষ জন্মে, তাহারও নিগূঢ় হেতু এই ; সে চায় না, স্মতরাং কেহই তাহাকে দেয় না। সে একটুকু স্বতন্ত্র, স্মতরাং সকলের বিরাগভাজন। কিন্তু তাহা বলিয়া যথার্থ অভিমানের ভাবকে কখনই ঘৃণার বিষয় বলিতে পারি না।

অভিমান দুই প্রকার,—রক্ষক ও পীড়ক। যে অভিমান বিষমক্ষিকার মত পরের মৰ্ম্মস্থলে দংশন করে, অকারণে পর-পীড়নে প্রবৃত্ত হয়, পরের স্বাধীনতা সহ্য করিতে পারে না, উহা সৰ্ব্বতোভাবে পরিহার্য্য, সন্দেহ নাই। ঐরূপ অভিমান জগতের উপদ্রববিশেষ এবং মানবজাতির কলঙ্ক। উহা অভিমান নহে, বস্তুতঃ অভিমানের বিকার। কবিকল্পিত অম্লর কি অপদেবতার ললাটেই উহা শোভা পায়। মনুষ্য যখন ঐরূপ অভিমানে অন্ধীভূত হইয়া, আপনাকে এক অলৌকিকবস্তুজ্ঞানে পূজা করে, এবং জ্ঞানের শাসন, মেহের শাসন, এবং সৰ্ব্বপ্রকার সম্ভাবের শাসন উন্নত্বন করিয়া, সংসারে আপনার শাসনই প্রবল করিতে ইচ্ছুক হয়, তখন তাহার মনুষ্যত্ব কতদূর থাকে, ঠিক বলিতে পারি না। করালি রাষ্ট্রবিপ্লবের প্রধান নায়ক মেরাবোর প্রতি দৃষ্টিপাত

কর। যিনি মেরাবোর জীবনের আদ্যোপান্ত সমস্ত বৃত্তান্ত আলোচনা করিয়াছেন, বোধ হয়, মনুষ্যের পদধূলি হইয়া থাকিতেও তাহার প্রবৃত্তি হইবে, তথাপি মেরাবোর শক্তি এবং তাহার সঙ্গে সঙ্গে মেরাবোর অভিমান লইয়া সকলকে দগ্ধ করিতে ইচ্ছা হইবে না। যদি কাহারও গৃহে গ্রহবৈগুণ্যবশতঃ ইত্যাকার ছরতিমানের কণামাত্র লইয়াও কেহ প্রবিষ্ট হন, সুখ ও শান্তি সে গৃহ হইতে উদ্ধৃষ্টাশে পলায়ন করে। এইরূপ অভিমান হৃদয়কে গ্রাস করিলে, আকৃতির সৌন্দর্য্য একবারে বিনষ্ট হয়, চক্ষু এক অপ্রাকৃত বিষাক্ত তেজ উদগীরণ করে এবং অধরনিঃসৃত প্রত্যেক কথায় লোকের অঙ্গ জলিয়া উঠে। কিন্তু যে অভিমান, কাহাকেও পীড়া না দিয়া, সুন্দর একখানি বস্ত্রের ত্রায় হৃদয় ও মনকে পরের আক্রমণ হইতে আবরিয়া রাখে ;—যাহা কটাক্ষ, কটুভাষা কিংবা ভ্রুকুঞ্জে প্রদর্শিত না হইয়া, মান ও গৌরবের মূর্ত্তি ধারণ করে ;—যাহা সরোবরের স্বচ্ছ সলিলে প্রতিভাত ভাস্করের ত্রায় এক অপূর্ব্ব সৌন্দর্য্যে শোভা পায়, অথচ চক্ষুর অসহ্য হয় না, তাদৃশ সদভিমানের অনাদর করা দূরে থাকুক, আমরা উহাকে মানব-প্রকৃতির অমূল্য অভরণ বলিয়া স্বীকার করি।

অভিমান আর যশোলালসা সমান নহে। যশোলিপ্সু পরান্ন-ভোজী, পরপ্রত্যাশী। অভিমানী আপনার বুদ্ধিতে আপনি পরিতৃপ্ত। যশোলিপ্সু হৃদয়ের কণ্ডুয়নে সকল সময়ে আকুল থাকে ; কে তাহাকে কি বলিবে, এই ভাবনাতেই তাহার নিদ্রা দূর হয়। অভিমানী শাস্ত, স্থির ও গভীর। লোকের নয়নদর্পণে সন্তোষ, কি অসন্তোষের ভাব ক্ষণে ক্ষণে যেরূপ প্রতিকলিত হয়, যশোলিপ্সুর মুখচ্ছবিও হর্ষ হইতে বিষাদের দিকে এবং বিষাদ হইতে হর্ষের দিকে সেইরূপ পরিবর্ত্তিত হইয়া আসে। অভিমানী চিত্তার্পিত প্রতিমূর্ত্তির ত্রায় নিষ্পন্দ ও নিশ্চল। পৃথিবীর স্তুতি



নিম্না তাহার নিকট কাকের কোলাহল হইতে অধিক বলিয়া গণ্য হয় না । কিন্তু যশোলিপ্সা প্রকৃতিতে যে অপূৰ্ব্ব একটুকু মাধুর্য্য আনিয়া দেয়, অভিমান কঠোর কৰ্ত্তব্যবুদ্ধির আশ্রয় পাইয়া সেটুকু বিনাশ করিয়া ফেলে ।

যথার্থ অভিমান এক অচিস্তনীয় সামর্থ্য । উহা সাহস, বীরতা এবং সহিষ্ণুতার অভাব পূর্ণ করিয়া দেয়; যাহা কিছু লজ্জাকর ও মানিজনক, যাহা কিছু নীচ ও ক্ষুদ্রজনোচিত, অন্তঃকরণকে তাহার উপরে তুলিয়া রাখে; প্রলোভনের সময় প্রহরীর স্থায় সম্মুখে দণ্ডায়মান হয়, এবং আপদের কালে বন্ধুর স্থায় আলিঙ্গন করে । এই দুঃখপূর্ণ কণ্টকাকীর্ণ, বিষমসঙ্কুল সংসারে যথার্থ অভিমান অনেক সময়ে ভেলার স্থায় অবলম্ব হয় । কেহ লাভের আশায় বাণিজ্য করিয়া সৰ্ব্বশেষে বঞ্চিত হইলে, সকলকে বঞ্চনা করিবার জন্ত তাহার শতবার মতি হইতে পারে । অভিমান তখন তাহাকে রক্ষা করে । সে সহস্র গ্রন্থিবিষিষ্ট জীর্ণবস্ত্র পরিধান করিতে সম্মত হয়, তথাপি ছলনা করিয়া কাহারও কপর্দক রাখিতে চায় না । পৃথিবীর অধিকাংশ মনুষ্যই অবস্থার পূজা করে । অবস্থা বিগুণ হইলে, অনেক স্থলেই সমস্ত সংসার বিগুণ হয় । মাতা স্নেহকণ্ঠে সম্ভাষণ করেন না, পত্নী মুখ তুলিয়াও চান না এবং ভুলিয়াও মনে করেন না, বন্ধুজনেরা বন্ধু বলিয়া স্বীকার করিতেও লজ্জিত হন, স্নাতরাং দেখিলেই দূরে প্রস্থান করেন । দৈবভূক্ষিপাকবশতঃ কেহ অহর্নিশ ঈদৃশ অরুস্তদ দুঃখে দগ্ধ হইলে, অভিমান আর কিছু না করুক, অন্ততঃ সেই দুঃখেতে সহিয়া থাকিবার জন্ত পুরুষোচিত ক্ষমতা দেয় । অভিমান না থাকিলে, হেলেনার কারাস্থিত কুকুরদিগের তীক্ষ্ণ দংশনেই বোনাপাটির তহুত্যাগ হইত এবং অভিমান না থাকিলে, রাজ্যভ্রষ্ট প্রথম চার্লস্, অরাতিনিযুক্ত, ছরক্ষরভাষী ছনীত প্রহরিদিগের অত্যা-

চার সহ্য করিয়া, কণকালও প্রাণধারণ করিতে পারিতেন না ।

সৌভাগ্যের সময় অভিমানকে অনায়াসে উপেক্ষা করা যায়, বরং তাদৃশ উপেক্ষার ভাবই তখন যথার্থ অভিমানশালিতার পরিচয় দান করে । যখন চক্ষুর একটি দৃষ্টি কিংবা জিহ্বার একটি বাক্য নিঃসৃত হইতে না হইতেই, সেই দৃষ্টি কিংবা সেই বাক্য নিয়তমুখপ্রেক্ষিগণকর্তৃকশব্দবাস্তবাবে গৃহীত হয়, এবং সকলে সমবেত হইয়া উহার অর্থগ্রহ করিতে উপবেশন করে ;— যখন পরিচয়মাত্র থাকিলেই লোকে পরম আত্মীয় বলিয়া সন্নিহিত হয়, হাসিলে শতমুখে হাসি ফোটে, এবং একটি দীর্ঘনিঃশ্বাস অকারণে ত্যাগ করিলেও নিকটস্থ সকলের মুখ বিবাদে মলিন হইয়া যায় ;—যখন বায়ুর প্রত্যেক তরঙ্গ প্রশংসার ধ্বনিই আনয়ন করে, এবং সমস্ত সংসার জ্যোৎস্নাধোত নিশার স্রায় আনন্দে ঢল ঢল প্রতীয়মান হয়, মনুষ্য তখন ফলভরনত পাদপের স্রায় নিতান্ত হুইয়া পড়িলেও, তাহার চরিত্রে নীচতা কি কলঙ্কের স্পর্শ হইবে না । বিনয়াচ্ছন্নগর্বতা সম্পদের দিনেই স্নন্দর দেখায় । কিন্তু, অদৃষ্টচক্রের আবর্তনে একবারে ভূতলে আনীত হইলে, মনুষ্য কখনই সদভিমান পরিত্যাগ করিয়া, মনুষ্যত্ব রক্ষা করিতে সমর্থ হয় না । তখন তাহাকে সকল বিষয়েই পদে পদে গণনা করিতে হয়, এবং কথাটি কহিতে হইলেও তাহার পাঁচবার চিন্তা করা আবশ্যক হইয়া উঠে । সে সরলাস্তঃকরণে কাহারও গুণবাদ করিলে, লোকে তাহা চাটুবাদ বলিয়া অবহেলা করে, এবং সে তাহার হৃদয়ের প্রীতির উচ্ছ্বাস সংবরণ করিতে না পারিয়া, কাহারও প্রণয়ের পিপাসু হইলে, লোকে তাহাকে অম্লান বদনে স্বেচ্ছুর বণিক বলিয়া নির্দেশ করিতে ইচ্ছুক হয় । যেমন সুখসন্তোগ সকলের ভাগ্যে

ঘটিয়া উঠে না, বিনীত ও নম্র হওয়াও সেইরূপ সকলের পক্ষে সম্ভবপর হয় না। ভাগ্যবান্ ব্যক্তি সকলের পাদলেহন করুন, তাহাতেও অনিষ্টের সম্ভাবনা নাই। কিন্তু, ভাগ্য যাহার প্রতি অগ্রসন্ন, অভিমানই তাহার অদ্বিতীয়সহায়। সে তাহার শেষ অবলম্ব অভিমানকেও যদি বিসর্জন করে, তাহা হইলে তাহাকে ক্রমে ক্রমে কত নীচে নামিতে হয়, সহজেই অনুমিত হইতে পারে।

এক সম্ভ্রান্তচরিত্র ব্যক্তি, অবস্থার পরিবর্তনবিবন্ধন কোন ধনীর গৃহে অপরিচিতভাবে আশ্রয় লইয়া, দিনপাত করিতেছিলেন। তাঁহার প্রতিপালক, একদিন তাঁহার কোন কার্যে বিশেষ সম্ভোষ-লাভ করিয়া তাঁহাকে মুক্তকণ্ঠে সাধুবাদ দেন এবং তাঁহার বিস্তর উপকার করেন। কেহ অপকার করলে, তাহা অক্ষুণ্ণচিত্তে সহ্য করা যায়। কিন্তু কেহ উপকার করিলে, সেই উপকারের ভার বহন করা, উন্নত প্রকৃতিক মনুষ্যের পক্ষে বড়ই কঠিন হয়। উল্লিখিত ছদ্মবেশী মহাত্মা, আশাতীতরূপে উপকৃত হইয়া, হৃদয়োখিত কৃতজ্ঞতার আবেগ নিবারণ করিতে পারিলেন না। তিনি তাঁহার আশ্রয়দাতাকে সম্বোধন করিয়া, বাষ্পগদগদবচনে বলিলেন,— “মহাশয়! আপনি আমার যে উপকার করিয়াছেন, প্রাণ থাকিতে তাহা ভুলিতে পারিব না। আমার পূর্বের অবস্থা থাকিলে আমি আপনার পাদযুগল মস্তকে ধারণ করিতাম। হুঃখ এই—ঈদৃশ উপকারী বান্ধবকে যে, নিশ্চুস্তচিত্তে কৃতজ্ঞতা দিব, এমন ভাগ্যও এইক্ষণ আমার নাই।” যদি অভিমান কোন পদার্থ হয়, তবে ইহারই নাম অভিমান। অভিমানী প্রাণকে অব্যবহার্য্য জীর্ণবস্ত্রের স্তায় অবহেলায় পরিত্যাগ করিতে পারে; কষ্ট ও ক্লেশ যাহা কিছু সম্ভবে, তাহা অনবসাদে বহন করিতে সমর্থ হয়; অলস বহিমুখে প্রবিষ্ট হইতেও ভীত হয় না,

কিন্তু আত্মার চৈতন্য থাকিতে মানত্যাগ করিতে পারিয়া উঠে না ।

মনুষ্যের মন যথার্থ অভিমানে অলঙ্কৃত হইলে, উহার আশা এবং আকাঙ্ক্ষা ক্রমেই উর্দ্ধদিকে আরোহণ করে । তখন পর-শ্রীতে তাহার কাতরতা হয় না । হৃদয় পরের সৌভাগ্যে ধিন্ন হইলে, অভিমানী আপনার নিকট আপনি অপরাধী হয়, এবং ঐ ক্ষুদ্রতা অনুভব করিয়া লজ্জায় মরিয়া যায় । যে আপনাকে অপদার্থ, অকর্ম্মণ্য এবং সর্ব্বতোভাবে সারশূন্য বিবেচনা না করে, সে অল্পদীয় সম্পদে কদাপি বিষন্ন হইতে পারে না । অভিমানী অগোচরে আক্রমণ করে না, অন্ধকারে আঘাত করিতে জানে না, এবং একবারের পরিবর্তে শতবার মরিতে হইলেও, অযোগ্যস্থলে প্রতিদ্বন্দ্বিক্রমে দণ্ডায়মান হয় না । কবির কল্পনা বল, আর ইতিহাস বল, মহাবাহু ভীষ্ম, শিখণ্ডীর দুর্ব্বল কর-নিষ্কিপ্ত শরনিকরে রোমে বিদ্ধ হইয়াও, তাহাকে ফিরিয় আঘাত করিতে পারেন নাই । যে জাতীয় লোকেরা নীচ-প্রকৃতি ও স্বার্থপর, তাহাদিগের মধ্যে সম্মুখ সংগ্রাম অপেক্ষা উপাংগুহত্যা অধিক প্রচলিত, বীরাচার অপেক্ষা ছদ্মব্যবহার ও ছলনারই অধিক আদর, এবং প্রকৃত বীরপুরুষ অপেক্ষা কপট-কুশল কর্ম্মাসাধকেরই অধিক সম্মান । তাহারা সাধনের প্রণালীর প্রতি দৃষ্টি করে না, সিদ্ধিই তাহাদিগের সর্ব্বস্ব । যে জাতীয় দিগের অন্তরে অভিমানের অগ্নি প্রজ্বলিত থাকে, তাহাদের রীতি-নীতি সন্ধাংশে ইহার বিপরীত । তাহারা বাহ্য কিছু করে, মধ্যাহ্নমার্গে তাহার সাক্ষী থাকেন । সিদ্ধি-হউক, কি না হউক, তদর্থ তাহারা ব্যস্ত হয় না ; সাধনপদ্ধতিতে কোন রূপে কলঙ্কস্পর্শ না হয়, ইহাই তাহাদিগের মুখ্য চিন্তা । ভারবি বলিয়াছেন—

‘অভিমানধনস্য গত্বৈ-

রশ্মভিঃ স্থান্নু যশশ্চিচীষতঃ ।

অচিরাংশুবিলাসচঞ্চলা

ননু লক্ষ্মীঃ ফলমানুসঙ্গিকম্ ।’

অর্থাৎ—অভিমানই যাঁহাদিগের ধন—যাঁহারা ক্ষয়শীল প্রাণে উৎপক্ষা দিয়া অক্ষয় মান সঞ্চয় করিতে অভিলাষী হয়, তাঁহারা সৌদামিনীর বিলাসলীলার ছায় চিরচঞ্চলা কমলার সেবা করে না । যদি তিনি কৃপা করেন, সে কৃপা আনুসঙ্গিক ফল ।

অভিমানী অন্যের অভিমান সহ্য করিতে পারে না, এ কথা অলীক । যে আপনার মানকে মূল্যবান্ বস্তু বলিয়া মনে করে, সে কদাচ অন্ত্রের অপমান সহ্য করিতে পারে না । আর্য্য ঋষিগণ মানীর মানভঙ্গকে এক মহাপাপ বলিয়া নির্দেশ করিয়াছেন, এবং এ বিষয়ে পৃথিবীর সকল স্থানের মহাত্ম্যারাই তাঁহা-দিগের মতানুগামী । যখন ক্রোধোন্মত্ত ভীম মানী দুৰ্য্যোধনের মস্তকে পদাঘাত করেন, রাজরাজেশ্বর যুধিষ্ঠির তখন অনর্গল অশ্রুমোচন না করিয়া থাকিতে পারেন নাই । যখন মন্ত্রিশ্রেষ্ঠ রাক্ষস, চাণক্যের বুদ্ধিকৌশলে সর্ব্বথা অভিভূত হইয়া, পাটলিপুত্র নগরে উপস্থিত হন, তখন অভিমানী চাণক্য ভূতলে পতিত হইয়া তাঁহার পাদবন্দনা করেন । যখন পরাজিত পোরস, আলেক্সেণ্ডরের সম্মুখে আনীত হইয়া, গর্ব্বিতভাবে আপনাকে রাজা বলিয়া পরিচয় দেন, বিজয়ী বীরচূড়ামণি তখন ক্রুষ্ঠ কি অসন্তুষ্ট না হইয়া, তদীয় তেজস্বিতায় নিতান্ত প্রীতি লাভ করেন । পুশিয়ার সম্রাট্ ফরাশিদিগকে পরাজয় করিয়া যে কীর্ত্তি উপার্জন করিয়াছেন, তাহা দশ বৎসরের মধ্যেই বিলুপ্ত হইতে পারে । কিন্তু, তিনি সিংহাসনভ্রষ্ট লুই নেপোলিয়নের

সম্মাননার জন্ত যেরূপ যত্ন দেখাইয়াছেন, ইতিহাস তাহা কখনও ভুলিতে পারিবে না ।

কেহ রূপের অভিমানে ফাটিয়া পড়ে । কেহ সামান্য কোন গুণ থাকিলে, সেই অভিমানে মূর্তিকায় পাদনিষ্ক্ষেপ করিতে চায় না । কেহ পরের চরণ লেহন করিয়া, একটুকু পদোন্নতি লাভ করিলে, সাধু কিংবা অসাধু কোন উপায় অবলম্বন করিয়া, বৈষয়িক ব্যাপারে কিয়ৎ পরিমাণে কৃতকার্য হইলে, লংসারে দশজনের মধ্যে কোন না কোন রূপে গণনীয় হইতে পারিলে, অভিমানে উন্নত হয় এবং চক্ষে অন্ধকার দর্শন করে । ঈদৃশ জঘন্তভাব অভিমানের বিড়ম্বনা মাত্র । যথার্থ অভিমান, মহত্বের একজাতীয় বস্তু । উহাতে চাতুরী ও চাঞ্চল্য কিছুই নাই, এবং উহা কখনও তুলনায় তুলিত হয় না । প্রতি মনুষ্যের আত্মাতে যে এক অচিস্তনীয় নিজত্বের ভাব নিহিত রহিয়াছে,— যে ভাব অবলম্বন করিয়া, লোকে আপনাকে আমি বলিয়া নির্দেশ করে এবং অন্ত হইতে আপনার পার্থক্য অনুভব করিতে সমর্থ হয়, সকল প্রকার আক্রমণ এবং অত্যাচার হইতে তাহার রক্ষা করা এবং সেই ভাবকে ক্রমে পরিষ্কৃতিত এবং পরিবর্দ্ধিত করিয়া মনুষ্যত্বের দিকে অগ্রসর হওয়াই অভিমানের প্রকৃত কার্য্য ।

যে মনুষ্য এরূপ অভিমানের ভাবকে অন্তরে পরিপোষণ না করে, ব্যক্তিগত স্বাধীনতা কাহাকে বলে, তাহা সে কখনই অনুভব করিতে পারে না । সে অপরাংশে যত কেন উন্নত না হউক, তাহার ললাটদেশে সকল সময়েই তদীয় প্রভুর নাম অঙ্কিত দেখিবে । আর, যে জাতীয় লোকেরা, জাতীয় গৌরব ও জাতীয় স্বাধীনতার জয়পতাকা উড়াইবার অভিলাষে, এক হস্তে মান এবং আর এক হস্তে প্রাণকে তুলিয়া দিয়া, জাতি-

সাধারণের একীভূত হৃদয়ে জাতির অভিমানকে আদরের সহিত  
 রক্ষা না করে, তাহাদিগের অন্ত যত প্রকারের উন্নতি ও কীর্তি  
 হউক, তাহারা কখনই মানবজাতিরূপ বিরাটপুরুষের এক অঙ্গ  
 বলিয়া গৃহীত হইবে না । তাহাদিগের সম্পদ সমৃদ্ধি যাহা কিছু  
 আছে, এবং যাহা কিছু কালক্রমে হইতে পারে, সমস্তই পরাধি-  
 পত্যের গ্লানিজনক চিহ্নে চিরদিন চিহ্নিত থাকিবে ।

---

## প্রকৃতিভেদে রুচিভেদ

যাহা লোকের নিকট এক পদার্থ, তাহা শাস্ত্রকারদিগের নিকট আর এক পদার্থ। শাস্ত্রকারেরা অতি সহজ কথা বুঝাইবার জন্ত এক এক সময়ে এমন দুর্ভেদ তর্কজাল বিস্তার করেন যে, লোকে তাহাতে কোন প্রকারেই সহজে প্রবেশ করিতে পারে না, প্রবিষ্ট হইলেও বাহির হইবার পথ দেখে না। রুচি কাহাকে বলি, এই কথা-প্রসঙ্গেও এইরূপ ঘটিয়াছে। আলঙ্কারিক ও দার্শনিক পণ্ডিতবর্গ রুচি শব্দের যে সকল সংজ্ঞা ও ব্যাখ্যা করিয়াছেন, তাহা বিজ্ঞসমাজে অবিদিত নহে। কিন্তু ঐ সমস্ত সংজ্ঞা ও ব্যাখ্যা এমনই দুর্গম ও জটিল যে, যাহারা বিশেষরূপে দর্শনশাস্ত্রের অনুশীলন করেন নাই, তাহারা কিছুতেই তাহার মর্ম্মার্থ পরিগ্রহ করিতে সমর্থ হন না। আমরা এই নিমিত্ত ঐ পথ পরিত্যাগ করিয়া, যে সকল ভাব ও কথা সর্বত্র পরিচিত আছে, তাহা লইয়াই রুচিশব্দের তাৎপর্য্য বিবৃত করিতে যত্নপর হইব।

কোন বিষয় কাহারও মনে ভাল লাগে, কোন বিষয় কাহারও মনে ভাল লাগে না। কোন একটি বিশেষ সংগীত শ্রবণ করিয়া কেহ একবারে গগনদ্রুতি হন, কাহারও কর্ণে সেই সংগীতটিই বিষধারা বর্ষণ করে। অধিকারীরা রঙ্গভূমিতে অবতীর্ণ হইয়া, যে ভাবে দেবলীলার অভিনয় করেন, তাহা দেখিবার জন্ত কেহ পঞ্চ ক্রোশের ব্যবধান হইতে পদব্রজে চলিয়া আসেন ; কেই তাদৃশ অভিনয়কে যত্না ও বিড়ম্বনার অবশেষে মনে করিয়া অব্যাহতি লাভের জন্ত পঞ্চ ক্রোশ ব্যবধানে চলিয়া



যান । কেহ একখানি কাব্য পাঠ করিয়া পদে পদে অশ্রু বিস-  
 র্জন করেন ; কেহ সেই কাব্যখানিকে নীরস কাষ্ঠসমান  
 বিবেচনা করিয়া অনির্বচনীয় বিরক্তির সহিত দূরে ফেলিয়া  
 দেন এবং যাহা বিজ্ঞব্যক্তির ঘৃণায় স্পর্শ করেন না অথবা ইচ্ছা  
 হইলেও লজ্জায় স্বকীয় গ্রন্থাধানে রাখেন না, এমন একখানি  
 কদর্য্য পুস্তক লইয়া দিবা রাত্রি পড়িয়া থাকেন । একখানি চিত্র-  
 পট দর্শনে কাহারও হৃদয় একবারে উছলিয়া উঠে এবং দৃষ্টি উহা-  
 তেই একবারে লাগিয়া থাকে ; আর এক ব্যক্তি সেই পটখানি  
 পুনঃপুনঃ দর্শন করিয়াও তাহাতে সৌন্দর্য্য কি মাধুর্য্যের কোন  
 চিহ্ন দেখিতে পান না । ইত্যাদি স্থলে বলিব যে, ঐহার মনে  
 ঐরূপ কোন বিষয়, কি গীত, কি কাব্যাদিতে প্রীতির পরিবর্তে  
 বিরক্তি জন্মে, তাঁহার উহাতে রুচি নাই । স্মরণ্য, রুচির সারাধ  
 মনের আনন্দ এবং সেই আনন্দ-জন্য স্পৃহা । যাহা ভাল লাগিল,  
 তাহা রুচিকর ; এবং যাহা ভাল লাগিল না, তাহা অরুচিকর ।

কিছুতেই রুচি নাই, এরূপ লোক জগতে নাই বলিলেও  
 অত্যাুক্তি হয় না । যদি কেহ থাকেন, তাঁহার অবস্থা স্মরণ  
 করিয়া কেহই তাঁহাকে হিংসা করিবে না । তিনি পণ্ডিত হই-  
 হেও মহামূর্খ, পরমসাদু হইলেও মহাপাতকী । এই শোভা-  
 বিলাসিনী স্মরণ্যমেদিনী তাঁহার বসতিস্থান নহে । তাঁহার  
 অধ্যয়ন ও বিদ্যালোচনা ভ্রম্যে ঘূতাহতি, বিবাহ পাপ, বন্ধুজন-  
 সংসর্গ অকথ্যযন্ত্রণা, এবং পার্থিব জীবন প্রত্যক্ষ নরকভোগ ।  
 সূর্য্য, মেঘপটলকে প্রভাতকান্তিতে রঞ্জিত করিয়া, তাঁহার জন্ত  
 উদিত হয় না ; চন্দ্রমার অমল-স্নিগ্ধকৌমুদী তাঁহার জন্ত মৃদু হাসি  
 হাসে না ; তরুলতা ও সরোবরের নিশ্চলসলিলরাশি কুসুমনেত্র  
 বিকসিত করিয়া, তাঁহার দিকে ফিরিয়া চায় না ; বিহঙ্গগণ সুধা-  
 সিক্ত কলকণ্ঠে কখনও তাঁহাকে আহ্বান করে না ; ভারতীর

বীণাধ্বনিসদৃশী কবিতা তাঁহার সন্মুখীন হইতে সাহস পায় না ;  
 প্রীতি ভয়ে কি বিরাগে তাঁহার নিকট চক্ষু মেলে না ; সংক্ষেপতঃ  
 এই সুবিস্তীর্ণ ধরণীমণ্ডলে কেহই আপনাকে তাঁহার বলিয়া পন্নি-  
 চয় দেয় না । কিন্তু জগদীশ্বরপ্রসাদাৎ এইরূপ নিরানন্দ, নিরা-  
 লস্য, চিরবিষাদমগ্ন, কিন্তুত লোকের সংখ্যা অতি অল্প । পৃথি-  
 বীর অধিকাংশ মনুষ্যই রুচিবিশিষ্ট । প্রত্যেক ব্যক্তিরই কোন  
 না কোন বিষয়ে রুচি, অর্থাৎ আসক্তি ও আনন্দ বোধ আছে ;  
 এ গীতে না হউক, অন্য গীতে এবং এ ভাবে না হউক, অন্য  
 ভাবে ; কিন্তু কোন না কোন গীতে এবং কোন না কোন ভাবে  
 সকলেরই হৃদয়বল্ল বাজিয়া উঠে ।

অনেকে রুচি শব্দটিকে অতীব সংকীর্ণ অর্থে গ্রহণ করিয়া,  
 শুধু কাব্যনাটকাদির দোষগুণঘটিত বিচারের কথাকেই ইহার  
 বিষয় মনে করেন, এবং যাহার কাব্য নাটকে তেমন পাণ্ডিত্য  
 নাই, তাদৃশ ব্যক্তি নিতান্ত সুরুচিসম্পন্ন হইলেও, তাঁহাকে রুচি-  
 হীন, রসহীন এবং সর্বপ্রকার স্বাদ-শক্তি-বিহীন বলিয়া অব-  
 ধারণ করিয়া রাখেন । ইহা ভ্রম । রুচির বিষয় এই অনন্ত জগ-  
 তের অনন্ত সৌন্দর্য্যরাশি । যাহা সুন্দর, যাহা সুশ্রাব্য, যাহা  
 অন্যথা সুখপ্রদ কিংবা মনোমদ, তাহার সহিতই রুচির সম্পর্ক  
 আছে । কাহার চক্ষু কি দেখিয়া হর্ষোৎফুল্ল হয়, কে কি শুনিতে  
 ভালবাসে, কে কিরূপ আলাপ করে ও কিরূপ বেশবিন্যাসে অনু-  
 রাগ দেখায়, কি প্রকার আভরণে কাহার মনে আনন্দ জন্মে,  
 কিরূপ আমোদ প্রমোদ ও ক্রীড়কলায় হৃদয় আসক্ত থাকে, এই  
 সমস্ত কথাই রুচির পরিচায়ক । উপাসনাদি উচ্চকল্পের অনুষ্ঠান-  
 নিচয়ও রুচির সহিত সম্পর্কশূন্য নহে । ছুইটি স্বতন্ত্র সম্প্রদায়ের  
 ভজনাগ্ৰহে প্রবিষ্ট হইয়া তত্ত্বত্যা সামগ্রীসমূহ এবং উপাসকদিগের  
 কীর্ত্তি-কীর্ত্তি, ভাবভঙ্গি ও কণ্ঠস্বর পরীক্ষা কর, অথবা একসম্প্র-

দায়হু দুই ব্যক্তির উপাসনাক্রিয়া দর্শন কর, তাহাতেও রুচিগত পার্থক্যাদির পরিচয় পাইবে । রুচি বিশ্বাসের উপর কার্য্য করে, জীবনের সকল কার্য্যেই নিত্যসঙ্গিনীর ন্যায় উপদেশ দেয়, এবং সুখের কথা ফুটিতে না ফুটিতে, আকারে, ইঙ্গিতে ও হস্ত ক্রকুঞ্চনাদি শতমুখে প্রকাশিত হইয়া পড়ে ।

এইক্ষণ প্রশ্ন এই,—মনুষ্যের সহিত মনুষ্যের সর্ব্বত্র, সকল সময়ে এবং সকল বিষয়েই যে বিষম রুচিভেদ পরিলক্ষিত হয়, ইহার কারণ কি ? যাহারা মানবমনের গূঢ়তত্ত্বসকল আলোচনা করিতে বিশেষ আনন্দ অনুভব করেন, তাঁহাদিগের মধ্যে এক এক জনে এই প্রশ্নের এক এক প্রকার উত্তর করিয়াছেন । কেহ বলিয়াছেন, দয়া কি ভ্রায়পরতার ভ্রায় রুচি নামে মনুষ্যের একটি পৃথক মনোবৃত্তি আছে ; সেই বৃত্তির বিকাশ অথবা অবিকাশ কিংবা অপূর্ণ বিকাশই রুচিভেদের একমাত্র কারণ । কেহ বলিয়াছেন, রুচি শোকানুভাবকতার নামান্তর,—যিনি যে পরিমাণে সৌন্দর্য্যের স্বাদগ্রহণে সমর্থ, তাঁহার রুচি সেই পরিমাণে বিকশিত ও মার্জ্জিত ; আর যিনি যে পরিমাণে সৌন্দর্য্য বিষয়ে অন্ধ, তাঁহার রুচি সেই পরিমাণে অক্ষুট ও অমার্জ্জিত । এই শ্রেণির চিন্তকদিগের মতে স্মরুচির নাম সৌন্দর্য্যের উপাসনা এবং কুরুচির নাম কদর্য্য বস্তুতে প্রীতি । কাহারও মত এই যে, ব্যোভেদ অথবা অবস্থ্যভেদ হইতেই রুচিভেদ জন্মে । যেমন জীবনে দিন দিন নূতন নূতন পরিবর্তন ঘটে, রুচিতেও দিন দিন সেইরূপ নূতন নূতন পরিবর্তন আসিয়া অলক্ষিতভাবে উপস্থিত হয় । কিশোরবয়সে যাহা ভাল লাগিত, যৌবনে তাহা ভাল লাগে না ; এবং যৌবনে যাহা প্রিয় বোধ হয়, পরিণতবয়সে তাহা প্রিয় বোধ হয় না । অন্ত এক শ্রেণির পণ্ডিতদিগের মতানুসারে শিক্ষাভেদ ভিন্ন রুচিভেদের কার-

ণাস্তুর নাই । শিক্ষাপ্রভাবে মনুষ্য দেবতা, শিক্ষাবিরহে মনুষ্য পশু । শিক্ষিত এবং অশিক্ষিত ব্যক্তির রুচিবিষয়ক পার্থক্যই ইহার প্রমাণ । উভয়েই সমান মনুষ্য । কিন্তু একজন অমৃতের জন্ত লালায়িত, আর একজন কর্দমতোয় পান করিয়াই পরিতৃপ্ত ।

আমরা রুচি নামে পৃথক্ একটি মনোবৃত্তি স্বীকার করি না । এইরূপ একই বৃত্তির সর্ববিষয়ব্যাপকতা অনুমানসিদ্ধও নহে, এবং প্রমাণ দ্বারাও কোন প্রকারে সমর্থিত হইতে পারে না । চক্ষু যদি শুনিতে না পায়, তবে তাহাতে চক্ষুর নিন্দা নাই ; এবং কর্ণও যদি দেখিতে না পায়, তবে তাহা কর্ণের দোষ বলিয়া পরিগণিত হয় না । ইহা ভিন্ন আমরা প্রাপ্তকৃত একটি মতেরও প্রতিবাদী নহি । তবে আমাদিগের সহিত এই এক বিশেষ বিভিন্নতা, আমরা উল্লিখিত কারণসমূহের কোন একটি-কেই রুচিভেদের একমাত্র কারণ না বলিয়া, প্রত্যেকটিকেই পৃথক্ একটি কারণ বলি, এবং সকল কারণের অভ্যন্তরে প্রকৃতিভেদকেই রুচিভেদের মূল কারণ বলিয়া নির্দেশ করি । শিক্ষা বলিলে সংসর্গজন্ত দোষগুণ তাহাতে আসিতে পারে, কিন্তু অবস্থাবিশেষে তাহার অন্তর্গত হয় না ; এবং বয়ঃকালাদিজন্ত অবস্থাবিশেষকে রুচির প্রণোদক বলিয়া গ্রহণ করিলে, প্রবৃত্তি-বিশেষের প্রাবল্য অথবা দুর্বলতা তাহার অন্তর্গত হইলেও, শক্তিভেদ ও শিক্ষা প্রভৃতি অতিপ্রধান কারণ নিচয় তাহার মধ্যে পরিগৃহীত হইতে পারে না ! কিন্তু প্রকৃতিভেদকে আদিকারণ বলিয়া উল্লেখ করিলে সকলই তাহাতে আসিয়া পড়ে । প্রকৃতি যে সকল শক্তি প্রদান করেন, শিক্ষা তাহার বিকাশ করে, শিক্ষার অভাবে তাহা জড়তা প্রাপ্ত হয় ; সংসর্গবিশেষে তাহা উন্মেষিত হয়, সংসর্গবিশেষে তাহা বিপথগামী অথবা

একবারে বিলুপ্ত হইয়া যায়। শোক হুঃখ ও হর্ষবিষাদজনিত মানসিক অবস্থা এবং বয়ঃকালাদিও প্রকৃতির উপর সামান্য ক্ষমতা প্রয়োগ করে না। সুতরাং শক্তিভেদ, শিক্ষা, সংসর্গ, প্রবৃত্তি বিশেষের প্রাবল্য, এবং অবস্থাভেদ প্রভৃতি যত প্রকার কারণ রুচির উন্নতি কি অবনতি বিষয়ে অনুকূলতা অথবা প্রতিকূলতা করে, সমস্তই প্রকৃতিভেদরূপ এক কারণের অন্তর্ভূত।

দুইটি লোক তুল্যরূপে ক্রীড়াসক্ত। তন্মধ্যে একজন তাসপাসা লইয়াই সময়ের প্রোতে ভাসিয়া ভাসিয়া যাইতে ভাল বাসেন, আর একজন অস্ত্রের ঋন্বনা এবং অশ্বগজের কর্ণভেদি সজ্জন গুনিবার জন্ত বালক সেকেন্দর সার মত প্রমত্ত হন। এ স্থলে শিক্ষাভেদ এই রুচিভেদের কারণ নহে, অবস্থার বিভিন্নতাকেও কারণ বলিয়া গ্রহণ করা যায় না, শোভানুভাবকতা প্রভৃতি বৃত্তি বিশেষেরও কার্যকারিতা নাই। এখানে যথার্থ কারণ প্রকৃতশক্তিভেদ। যিনি তাসপাসাতেই নিরুপম আনন্দ অনুভব করেন এবং উহা লইয়াই সমস্ত জীবন অতিবাহিত করিতে ভাল বাসেন, তিনি যে ধাতুতে গঠিত, সেকেন্দর সাহ সে ধাতুতে গঠিত নহেন। উভয়ের মধ্যে প্রকৃতিদত্ত শক্তিবিশয়ে অনেক প্রভেদ আছে, তাহাতেই ক্রীড়া প্রমোদঘটিত রুচি বিষয়েও এত প্রভেদ। যিনি যৌবনে মেরেঙ্গো, অস্তালিজ ও জিনা প্রভৃতি ক্ষেত্রে পুরুষকারের পরাকাষ্ঠা প্রদর্শন করিয়া সমস্ত ইউরোপ-ভূখণ্ডকে পদাঘাতে কম্পিত করিয়াছিলেন, তিনি যদি কোমারে নবনীতকোমলা বালিকার মত কন্দুকলীলাতেই ব্যাসক্ত থাকিতেন, তাহা হইলে মনোবিজ্ঞানের সমস্ত কথাই মিথ্যা কথা বলিয়া সপ্রমাণ হইত। তাঁহার রুচি শৈশব সময় হইতেই কোন্ দিকে প্রধাবিত ছিল এবং তিনি কি লইয়া ক্রীড়া-সহচরদিগের সহিত খেলা করিতেন এবং কিরূপ প্রমোদে সুখী

হইতেন, তাহা তদীয় চরিতাখ্যায়কদিগকে জিজ্ঞাসা কর ।

মহুষ্যের প্রাকৃত শক্তি সম্বন্ধে একটি অত্যাবশ্যকীয় কথা আমাদের কাছে এস্থলে সংক্ষেপে বলিয়া লইতে হইয়াছে । নতুবা শক্তিভেদের সহিত রুচিভেদের বিরূপ ঘনিষ্ঠ সম্বন্ধ আছে, তাহা অনেকের হৃদয়ঙ্গম হইবে না । যদি কাহাকেও শক্তিমান পুরুষ বলি, তাহা হইলে এমন সিদ্ধান্ত করা উচিত নহে যে, শক্তির যত প্রকার ভিন্ন ভিন্ন মূর্তি পরিকল্পিত হইতে পারে, সমস্তই সেই একাধারে নিহিত রহিয়াছে । যে ছুই বীরপুরুষের কৌমাররুচির প্রশংসা হইল, তাঁহারা এক বিষয়ে যেমন অসাধারণ শক্তিমত্তা দেখাইয়াছেন, তেমন অনেক বিষয়ে নিতান্ত হীন-শক্তি ছিলেন । আবার অনেকে প্রস্তাবিত বিষয়ে নিতান্ত নিকৃষ্টকল্পের লোক বলিয়া গণ্য হইয়া থাকিলেও, অন্যান্য বহু-বিষয়ে অতীব প্রশংসনীয় ক্ষমতা ও রুচিশালিতা প্রদর্শন করিয়াছেন । ইংলণ্ডে জনসমুদায় প্রভৃতি পূর্বতন পণ্ডিতেরা মহুষ্যের শক্তিঘটিত এই নিয়ম সুন্দররূপে বুঝিতেন না, এবং বুঝিতেন না বলিয়াই রুচিভেদ সম্বন্ধে কোন কথা হইলে তর্কতরঙ্গে ভাসমান হইয়া নানাবিধ ভ্রমসঙ্কুল সিদ্ধান্তে উপনীত হইতেন । তাঁহারা মনে করিতেন যে, পশ্চিমদিকে যাইতেও যে বলের আবশ্যক, পূর্বদিকে যাইতেও যখন ঠিক সেই পরিমাণ বলই প্রচুর হইয়া থাকে, তখন যে বুদ্ধি যথাযথরূপে প্রযুক্ত হইয়া বুদ্ধিশাখা হইতে ছিন্নবৃন্ত ফলের পুঙ্খলনদর্শনে মাধ্যাকর্ষণ-নিয়ম আবিষ্কার করিয়াছে, সেই বুদ্ধিই যদি আর একপথে পরিচালিত হইত, তাহা হইলে তদ্বারা ওথেলো কি অভিজ্ঞানশকুন্তলের ন্যায় অপূর্বকাব্যও অনায়াসে বিরচিত হইত । কিন্তু বিচার এবং বহুদর্শন দ্বারা ইহা এইক্ষণ বৈজ্ঞানিক সত্যের ন্যায় প্রমাণিত হইয়াছে যে, মানবীয় শক্তি এক

এবং অথও হইলেও বহুধাবিভক্ত এবং বহুধারা-প্রবাহিত। জগতের নিত্যপরীক্ষিত বৃত্তাস্তচয়ও সৰ্ব্বথা এই সিদ্ধান্তেরই পরিপোষকতা করে।

কাহারও চক্ষু এবং বুদ্ধি সৌন্দর্য্যবিষয়ে এ মন স্থনিপুণ যে, তিনি উহার বিভেদ ও অনুভেদ সকল তিল তিল করিয়া ভাগ করিতে পারেন; এবং একখানি আলেখ্য দর্শন করিলে তাহার কোথায় কি গুণ এবং কোথায় কি দোষ আছে, তাহা দৃষ্টিপাতমাত্রই অঙ্গুলিনির্দেশ সহকারে বুঝাইয়া দিতে সক্ষম হন; অথচ তাঁহার সঙ্গীতবিষয়িনী বুদ্ধি এত অল্প যে, তানসেন কি সুরমিঞার গন্ধর্ব্বকণ্ঠানুকারিনী ভুবনমোহিনী গীতলহরীও তাঁহাকে প্রবোধিত করিতে সমর্থ হয় না। যদি রূপের লীলাভঙ্গি এবং সৌন্দর্য্যের স্তম্ভভেদ বিষয়ে আলাপ কর, তাহা হইলে মনে হইবে যে, তাঁহার শ্রায় সুরসিক ও সুরুচি-বিশিষ্ট পুরুষ আর একটি সম্ভবে না। কিন্তু সঙ্গীতপ্রসঙ্গে কথা তুলিলে, তাঁহাকে তেমনই আবার অরসিক ও অকৰ্ম্মণ্য লোক বলিয়া অবজ্ঞা করিবে। তুজের গণিততত্ত্বের অন্তস্তলে কত কি মধু সঞ্চিত রহিয়াছে! বাঁহারা স্বভাবতঃ গণিতবুদ্ধিসম্পন্ন, তাঁহারা তাহা পান করিয়া ধ্যানরত তাপসের শ্রায় বিমোহিত থাকেন। কিন্তু প্রকৃতি বাঁহাদিগকে সে বুদ্ধি, সে শক্তি দেন নাই, তাঁহারা অন্তরসে রসিক হইলেও উহার প্রবেশদ্বারের রেখা সমূহকে নরকপালস্তিত অদৃষ্টরেখার শ্রায় অপাঠ্য জ্ঞানে দীর্ঘ-নিশ্বাস ফেলিয়া চলিয়া যান। দৃষ্টান্তের প্রয়োজন হইলে, শক্তি-গত বিভিন্নতার এইরূপ আরও সহস্র দৃষ্টান্ত সঙ্কলিত হইতে পারে; কিন্তু বাহা উদাহৃত হইল, তদ্বারাই বিলক্ষণরূপে সপ্রমাণ হইতেছে যে, বাঁহার যে বিষয়ে প্রকৃতিদত্ত শক্তি নাই, তাঁহার প্রকৃতিতে সে বিষয়ে কুচি থাকা নিতান্ত নিসর্গবিরুদ্ধ;

আর যিনি যে বিষয়ে স্বভাবতঃ শক্তিসম্পন্ন, তিনি সে বিষয়ে স্বভাবতঃই অমুরক্ত ও রুচিবিশিষ্ট । যেমন শরীরের অঙ্গ-বিশেষে সামর্থ্য না থাকিলে, সেই অঙ্গসম্পর্কিত ব্যায়ামে ইচ্ছা অথবা আনন্দ বোধ হয় না, তেমন মনেরও বৃত্তিবিশেষে সমুচিত শক্তি না থাকিলে, সেই বৃত্তির পরিচালনায় তৃপ্তিলাভের প্রত্যাশা থাকে না ।

একই শক্তির পরিমাণগত তারতম্যানুসারেও রুচির বৈচিত্র্য জন্মে । গায়কেরা সাধারণতঃ গীতবিদ্যাকে ধ্রুপদ, খেয়াল ও টপ্পা এই তিন ভাগে বিভক্ত করিয়া থাকেন । ধ্রুপদ গুরুপাক, কষ্টসাধ্য এবং সংগীতের চরমোৎকর্ষ । খেয়াল কাঠিন্য ও কোমলতা মিশ্রিত ; উহাতে রাগ রাগিণীর ব্যাকরণ আছে, অথচ টপ্পারও একটু একটু রস আছে । টপ্পা ফুলের মধু, সব-বতের ছায় সুপাক, সুখপেয়, সহজসাধ্য । অনেকে গাইতে পারেন কিম্বা গান শুনিয়া সুখী হন, কিন্তু টপ্পা পর্য্যন্তই তাঁহা-দিগের শক্তির দৌড় । উহার উর্দ্ধে উড্ডীন হইতে হইলে তাঁহাদিগের পক্ষ অবসন্ন হইয়া পড়ে । অনেকে আর এক গ্রাম উর্দ্ধে উঠিয়া বিচরণ করেন । আর, যাহারা প্রকৃতির রূপায় উচ্চশ্রেণীর শক্তি লাভ করিয়াছেন, তাঁহারা উহার শেষ শিখরে সমাক্রান্ত হইয়া এক অলৌকিক আনন্দরসে নিমগ্ন হন । তাঁহারা কি সুখে সুখী হইলেন, অশক্ত অদীক্ষিত ব্যক্তির নিম্নভূমিতে থাকিয়া, তাহা সংশয়াকুল বিশ্বাসের সহিত চিন্তা করেন । যাহারা আরও জড়বুদ্ধি, তাঁহারা উপহাস করেন । এইরূপ অনেকেরই চিন্তাশক্তি আছে । কিন্তু কাহারও চিন্তা-শক্তি উচ্চ শ্রেণির,—প্রখর, বলবিশিষ্ট এবং শ্রমসহ । কাহারও চিন্তাশক্তি বালক অথবা স্ত্রীলোকের মত,—দুর্বল, শ্রমবিমুখ এবং স্থৈর্য্যাহীন । চিন্তাশক্তির এই মাত্রাগত প্রভেদ অনুসারে



এই দুই শ্রেণিই লোকের মধ্যে অধ্যয়ন ও পাঠানির্বাচনাদি বিষয়ে কিরূপ রুচিগত বৈলক্ষণ্য ঘটায় উঠে, তাহা কে না প্রত্যক্ষ করিয়া থাকেন ?

শিক্ষা রুচিকে কিরূপ পরিশোধিত ও পরিমার্জিত করে, তাহার নিদর্শনবাহুল্য নিম্নয়োজন । যে লৌহখণ্ড খনি হইতে এইমাত্র উত্তোলিত হইল, তাহাও লৌহ, এবং যাহা নিপুণকাক-করের হস্তে পুনঃপুনঃ শোধিত ও পুনঃপুনঃ মার্জিত হইয়া, এইক্ষণ স্বকীয় প্রভাৱ রজতপ্রভাকেও পরিহাস করিতেছে, তাহাও লৌহ । কিন্তু উহাকে স্পর্শ করিতেও লোকের অবজ্ঞা জন্মে, আর ইহা বীরজনবাহুতে অমূল্য ভূষণের স্তায় মণিমুক্তার সহিত বিলম্বিত হয় । অঙ্গার ও হীরক একই পদার্থের বিভিন্ন মূর্ত্তি বলিয়াই কথিত হইয়া থাকে । অথচ উভয়ে কত অন্তর । পারিসের সুশিক্ষিতা নবীন এবং সাঁওতাল কি গারোজাতীয়া অশিক্ষিতা যুবতী প্রকৃতিতে পরস্পর বহুদূরবর্ত্তিনী নহে । কিন্তু উভয়ের রুচিগত পার্থক্যে প্রতি দৃষ্টি করিলে, কে ইহাদিগকে একজাতীয় জীব বলিয়া স্বীকার করিতে পারে ? আভরণপ্রিয়তা উভয়েতেই সমানবলবতী এবং উভয়েই সমানরূপাভিমାନিনী । প্রশংসার কলকণ্ঠও উভয়কে সমানরূপে অভিভূত করে । তথাপি শিক্ষার শোধনী প্রক্রিয়ায় উভয়ে এইক্ষণ প্রভেদ জন্মিয়াছে যে, একটি স্বরলোকবিহারিণী বিদ্যাধরী এবং আর একটি পিশাচের প্রণয়সহচরী । সুশিক্ষিত ও অশিক্ষিত, উভয় শ্রেণিই গীত, বাদ্য ও নৃত্যাদিতে তুল্য অস্থুরকৃত । কিন্তু সুশিক্ষিতসমাজে গীতের নাম স্বরসুধা, অশিক্ষিতসমাজে গীতের নাম কর্ণপীড়া ; সুশিক্ষিতসমাজে বাদ্যযন্ত্রের নাম বীণা বা পিয়ানো, অশিক্ষিতসমাজে বাদ্যযন্ত্রের নাম ঢকা কি ভগকাংস ; সুশিক্ষিতসমাজে নৃত্যের নাম লাস্ত্র কি লীলাতরঙ্গ, অশিক্ষিতসমাজে নৃত্যের নাম

লক্ষ্য রাখি কি প্রতিবেশীর নিজাভঙ্গ। কবিতায়ও এইরূপ। সুশিক্ষিতেরা যে কবিতায় আদর করেন, তাহাতে কল্পনার বৈচিত্র্য থাকে, অথচ কলঙ্কের পঙ্ক দৃষ্ট হয় না। অলঙ্কার ও রসমাধুরীর প্রাচুর্য্য থাকে, অথচ সে অলঙ্কার চক্ষুতে কণ্টকবৎ বিদ্ধ হয় না, সে রস আত্মাকে আবিল করে না। পক্ষান্তরে গ্রাম্যরুচিবিশিষ্ট অশিক্ষিত ব্যক্তির যে কবিতা লইয়া প্রমত্ত হন, তাহাতে কল্পনা না থাকুক, কদম্ব থাকে, এবং রস ও অলঙ্কার না থাকুক, ঝাল ও ঝঙ্কার থাকে। কর্ণাটরাজমহিষী এইরূপ কবিদিগকে কপি বলিয়াছিলেন ; বঙ্গে ইহাদিগকে কেহ কবি-ওয়ালা বলে এবং কেহ কবিকুলের কালিমা কিম্বা কবিকুঞ্জের কাক বলে।

এই স্থলে কেহ এইরূপ আপত্তি করিতে পারেন যে, যদি শিক্ষার এতই মাহাত্ম্য থাকিবে, তবে যাহারা সুশিক্ষিত বলিয়া লোকের নিকট পরিচয় দিয়া থাকেন, তাঁহাদিগের রুচিও অনেক সময় নিতান্ত অধোগতি প্রাপ্ত হয় কেন ? তাঁহাদিগের মধ্যে অনেকে, জলন্তবহ্নিরূপিণী দময়ন্তীর পবিত্র কাহিনী শ্রবণ করিতে অনিচ্ছা প্রকাশ করিয়া, বারবণিতার কুংসিত বাত্রা শুনিবার জন্ত অধীর হন ; বেহাম্ ও মিল্ প্রভৃতি মহাগনস্ব-দিগের গভীরচিন্তাপ্রসূত জ্ঞানগর্ভ গ্রন্থাবলিকে ভস্মসূপ বিবেচনায় একদিকে সরাইয়া রাখিয়া, কতকগুলি অর্থশূন্য অকল্পিত পুস্তক দিয়া সেই স্থান পূরণ করেন ; এবং বাস্তবিকি, ভবভূতি ও মিন্টন প্রভৃতি সাক্ষাৎ দেবোপম স্বর্গীয় কবিদিগের কাব্য-কলাপে উপেক্ষা প্রদর্শন করিয়া, প্রভাত হইতে সন্ধ্যা এবং সন্ধ্যা হইতে রাত্রির দ্বিপ্রহর পর্য্যন্ত, রেনন্ডের গুপ্তকথা অথবা ঐরূপ আর কিছু অশ্লীল বস্তু লইয়াই অনিমেঘলোচনে উপবিষ্ট থাকেন। এই রুচিবিকারের কারণ কি ? এই প্রশ্নের প্রথম

উত্তর,—শিক্ষার অপূর্ণতা । যদি তাহা না মান, ইহার দ্বিতীয় উত্তর,—মানসিকশক্তির অপকৃষ্টতা । যদি তাহাতেও তৃপ্ত না হও, তবে ইহার তৃতীয় এবং শেষ উত্তর,—প্রবৃত্তিবিশেষের অপ্রশংসনীয় ও অমুচিত প্রবলতা । প্রবৃত্তির পক্ষিল স্রোত যখন খরধারে প্রবাহিত হয়, তখন শিক্ষা, শক্তি ও স্বকৃতি সমস্তই সৈকত-ভূমিতে জলরেখার আয় বিদৌত ও বিলুপ্ত হইয়া যায় ।

মনুষ্যের উৎকৃষ্ট ও নিকৃষ্ট উভয়বিধ প্রবৃত্তিই রুচির উপর কর্তৃত্ব করে । ভাল হউক আর মন্দ হউক, স্ববিষয়ের অনুসরণ করা মনোবৃত্তি মাত্রেরই নৈসর্গিক ধর্ম্ম । যাঁহাদিগের স্নেহ, মমতা ও দয়াবৃত্তি স্বভাবতঃ প্রবলা, তাঁহারা করুণরসের কাব্য পড়িতেই ভালবাসেন, এবং যে সকল হৃৎথের কথার দয়া উত্তেজিত হয়, তাহা পাঠ কি শ্রবণ করিয়া অজস্র অশ্রুধারা মোচন করেন । তাঁহাদিগের নিকট অশোকবনে সীতার বিলাপ, দেস্‌দিমোনার মৃত্যুকালীন খেদ, পিঞ্জরাবরুদ্ধা রেবেকার স্তম্ভিতমনস্তাপ, পতি-গতপ্রাণা সূর্য্যমুখীর শোকরুদ্ধ স্নাকোমলকণ্ঠ যেরূপ হৃদয় ও মনোহর ; গুলেবক ওয়ালীর গুপ্তপুষ্পকাননে গুপ্তপ্রেমালাপ, লায়লা ও মজনুর প্রেমঘটিত চতুরতা এবং রাধা ও চন্দ্রাবলীর প্রণয়-কলহ কখনই তেমন বোধ হয় না । সেইরূপ যাঁহাদিগের দয়া দুর্বল, ধর্ম্মবুদ্ধি নিভেজ, শোভানুভাবকতা হীনপ্রভ, এবং অপর উচ্চতর বৃত্তি অর্দ্ধবিকসিত, অথচ কামাদি নিকৃষ্টবৃত্তি নিতান্ত বলবতী, তাঁহারা ভাগবতের রজলীলা কিংবা লুক্‌সিয়ার বিড়ম্বনা, ডন জুয়ানের অপকীর্ত্তি কিংবা চতুর্থ জর্জের চরিত্রবর্ণন পাঠ করিয়া যেরূপ তৃপ্তিলাভ করেন, আর কিছুতেই তাহা প্রাপ্ত হন না । যে দেশে যে সময়ে এই শেবোক্ত শ্রেণির লোকের সংখ্যা নিতান্ত অধিক হয়, সে দেশে সেই সময়ে কুৎসিত কাব্যাদির সংখ্যা কিরূপ অধিক হইয়া পড়ে, কুরুচি সংক্রামক রোগের

শ্রায় গৃহে গৃহে কিরূপ পরিব্যাপ্ত হয় এবং সংকবি ও স্নলেখক-  
বর্গ কিরূপ হতাদর হইয়া যান, তাহা ইংলণ্ড ও ফ্রান্স প্রভৃতি  
সকল দেশের সামাজিক ইতিহাস পাঠেই অনায়াসে অবগত  
হওয়া যাইতে পারে ।

---

## মনুষ্যের জীবনচরিত

মহানুভাব ব্যক্তিদিগের জীবনচরিত পাঠ করিবার জন্ত, সকলেই কৌতূহল প্রকাশ করে। যাহারা, সংসারে আসিয়া থাইয়া গুইয়াই কাল কর্তন করেন নাই, কিন্তু প্রকৃতপ্রস্তাবে জীবনযাপন করিয়াছেন,—যাহারা তৃণের মত জোয়ার ভাটায় যাতায়াত না করিয়া, এই অনন্ত কালসমুদ্রের সৈকতভূমিতে আপনাদিগের পদ-চিহ্ন রাখিয়া গিয়াছেন, যাহাদিগের আবির্ভাবে ধরা টলমল করিয়াছে, চতুর্দিকে হলুধুলু পড়িয়াছে, মানবজাতি হয় হাসিয়াছে, নয় কাঁদিয়াছে, তাদৃশ অনন্তসাধারণ ক্ষণজন্মা পুরুষদিগের ঘরের কথা জানিবার জন্ত মনে স্বভাবতঃই এক বিষম কণ্ঠস্বন উপস্থিত হয়। তাঁহারা ছোট বেলায় ক্রীড় খেলা করিয়া বেড়াইতেন; তাঁহারা যৌবনকালে প্রবৃত্তির তরঙ্গে ক্রীড় হাবুডুবু খাইতেন; তাঁহারা পরিপক্ব পৌঢ়দশায় উপনীত হইয়া, সমাজের অভিনয়-ভূমিতে ক্রীড় কার্য্য করিতেন এবং যবনিকার অন্তরালেই বা ক্রীড় অবস্থিত থাকিতেন, এই সমস্ত কথা বালক, বৃদ্ধ, সকলেই সবিশেষরূপে অবগত হইতে ইচ্ছা প্রকাশ করে।

নীতিবিশারদ পণ্ডিত মহাশয়েরা বলেন, পৃথিবীর প্রধান পুরুষদিগের জীবনবৃত্ত পাঠ কর; ক্রমেই মন, নীচতাব পরিত্যাগ করিয়া, মনুষ্যোচিত উচ্চতার প্রেতি আসক্ত হইবে। কবিসমাজ উপদেশ করেন, মহামতি মনুষ্যদিগের আলেখ্যের প্রতি স্থির-নয়নে তাকাইয়া থাক,—তাঁহাদিগের চরিত চিন্তা কর, তবেই

বুঝিতে পারিবে যে, মহত্বের দ্বার তোমার জন্তও উন্মুক্ত রহিয়াছে । কিন্তু মনুষ্যের জীবনচরিত কোথায় পাইব ? পৃথিবীতে পোনে ষোল আনা ইহাতেও অধিক লোক আসে আর যায় । তাহারা যে কোন সময়েও জীবিত ছিল, এমন বলিবার কারণ নাই । যদি তাহারাও জীবিত থাকিয়া থাকে, তবে তাহাদিগের শয়নখট্টা এবং অবলম্ব্যষ্টিও জীবিত ছিল । যাহারা জীবিত ছিলেন বলিয়া জগতে পরিচিত, তাহাদিগের বিষয়ই বা কে কি জানিতে পারে ? কোন মৃত মনুষ্যের বঙ্গালমাত্রাবশিষ্ট দেহ দর্শন করিয়া, কেহই তাহার মুখচ্ছবি ও রূপলাবণ্যের কল্পনা করিতে সমর্থ হয় না । সে কিরূপে হাসিত, হাসির সময়ে তাহার অধরপল্লবে কি কি ভাব বিশেষরূপে প্রকাশ পাইত,—তাহার জ্ঞান কোন্ সময়ে আকুঞ্চিত, কোন্ সময়ে সরলায়ত থাকিত, তাহার নয়নযুগল, মুখরভূত্যের স্তায় মনের কি কি নিগূঢ় কথা লোকের নিকট কহিয়া ফেলিত, ইত্যাদি সহস্র বিষয় মাংসচন্দ্র-বিবর্জিত একখানি কেরাটি এবং কয়েকখানি অস্ত্রির নিকট জিজ্ঞাসা করিয়া অবগত হওয়া যায় না । মনুষ্যের জীবনচরিতও এইরূপ । মনুষ্য মনুষ্যের বহিঃস্থ ক্রিয়াকলাপ অবলোকন করে । প্রকৃত মনুষ্যজীবন কুন্ডলকোরকের অন্তঃস্থ কিঞ্জকের স্তায় পটলের পর পটলে আবৃত থাকে । কাহারও চক্ষু সেখানে প্রবেশপথ পায় না । মনুষ্য আপনাকেই আপনি জানে না । পরকে কিরূপে জানিবে ? আপনার জীবন আপনিই পাঠ করিতে কেহ সমর্থ হয় না । পরের জীবন কিরূপে পাঠ করিবে ? যদিও প্রকৃতির রূপাবলে, কেহ মানবজীবনগ্রন্থের দুই চারি পংক্তি, কি দুই চারি পৃষ্ঠা, পাঠ করিতে সমর্থ হন ; তিনি আবার ভাষায় তাই প্রকাশ করিতে পারেন না । মানুষী ভাষা আজও অসম্পূর্ণ রহিয়াছে, এবং বোধ হয়, এই অপূর্ণতা কখনও ঘুচিবে

না। প্রভাতে কি সন্ধ্যার সময় অথবা ঋতুিকার প্রাক্কালে আকাশের জলদমালা বৃহত্তে মৃহত্তে কত শোভা ধারণ করে, কত পরিবর্তনের অধীন হয়, তাহা নিবিষ্টমনে পাঠ করিতে পারিলেই, মনুষ্যের বিস্তর প্রশংসা; ভাষায় আবার তাহা স্নায়িক ভুলির, কেহই এমন আশা করে না। মনুষ্যের মন আকাশের জলদমালা হইতেও অধিক পরিবর্তনশীল। ভাগীরথীর লহরীলীলার বিরাম আছে, কিন্তু চিরচঞ্চল মনুষ্যমনের ভাব-ভরস্বের কখনও বিরাম নাই। কে তাহা গণনা করিবে? কে আবার তাহা বর্ণনা করিবে?

জীবনচরিতে পাঠ করা গেল, আলেক্জেণ্ডার, সহসা ক্রোধে অধীর হইয়া, তদীয় প্রিয় ও পুরাতন সহচর ক্লিটসকে বৃহত্তে সংহার করিলেন, এবং ক্যাসেগরের সাহসিক ভাষা সহ্য করিতে না পারিয়া, নিভান্ত ইতর জনের জ্ঞান তাহাকে অপমান করিলেন। এই দুইটি—কার্য্য। ইহাদের কারণ কোথায়? আলেক্জেণ্ডার এক সময়ে পুরুষপদবাচ্য বীরদিগের ললাটের ভিলক ছিলেন। কেন অকস্মাৎ তিনি এবং বিধ কাপুরুষপদবীভে পদনিক্ষেপ করিলেন?—এক সময়ে তিনি শত্রুরও সম্মান করিতে জানিতেন, কেন পরিশেষে তিনি মিত্রের মর্য্যাদাও ভুলিয়া গেলেন? তাঁহার প্রকৃতির এত পরিবর্ত কেন ঘটিল? এই শৃঙ্খল-বদ্ধ কারণ পরস্পরা কে দেখিয়াছে এবং কে তাহা বুঝাইতে পারিবে? বোনাপার্টি প্রসিদ্ধি লাভের পূর্বে, মনুষ্যের জাতিসাধারণ অধিকার সমূহের একজন প্রধান রক্ষক ছিলেন। অবশেষে তাঁহার কিরূপ মত-স্থলন হয়,—রক্ষক, দুদিন দশদিন যাইতে না যাইতেই, কিরূপ ভয়ঙ্কর ভক্ষকবেশ ধারণ করেন, তাহা সর্ব্বত্রই জানেন। তাঁহার বাহিরের জীবন অতি সুন্দর-রূপে লিখিত হইয়াছে বটে, কিন্তু তাঁহার বাহিরের জীবন

যে আভ্যন্তরীণ জীবনের সামান্য ছায়া মাত্র,—যে জীবনে ‘কারণ’ সকল প্রচ্ছন্নভাবে অবস্থিতি করিয়া, দৃষ্টজগতে কার্য্যফল প্রসব করিয়াছে, তাহা অবগত হইবার কোন উপায় নাই । এ কথা সত্য যে, চরিতাখ্যায়কেরা এই উভয় মহাত্মার চরিত্র-ভ্রংশের বহু কারণ নির্দেশ করিয়াছেন । কিন্তু তাঁহাদিগের হেতুবাদে মনস্তৃপ্তি হয়, ইহা আমরা কখনই স্বীকার করিতে পারি না ।

অনেকে, এই সমস্ত কথা আলোচনা করিয়া, মনুষ্যের স্বরচিত জীবনবৃত্ত পাঠেই বিশেষ অনুরাগ প্রদর্শন করেন । তাঁহারা বিবেচনা করেন যে, পরে যাহা লিখে, তাহা হয় অজ্ঞতার পরিচয় দেয়, না হয় অসুচিত স্তুতি কি অসুচিত নিন্দায় পরিপূর্ণ থাকে । কিন্তু মনুষ্য, পৃথ্বীতল হইতে প্রস্থান করিবার পূর্বে আপনার সম্বন্ধে আপনি যাহা লিখিয়া যায়, তাহাতে অসত্য, অত্যাধিক অথবা অজ্ঞতামূলক ভ্রমপ্রমাদের কণিকাও থাকিতে পারে না । ভারতবর্ষে কেহ কোন দিন আপনার জীবনকাহিনী আপনি লিখিয়া গিয়াছেন, এমন আমরা জানি না । বাবর এবং আরংজীব প্রভৃতির কথা অবশ্য গণনার বাহিরে রাখিতে হইবে । কারণ ইহাদিগকে ভারতবাসী বলিয়া স্বীকার করিতে আজও কাহারও মন সম্মতি দান করিবে না । ভারতবর্ষের নাম উচ্চারণ করিলে, যে অস্তুমিত আর্ঘ্যজাতির ভূত-বৃত্তান্ত মনে সমুদিত হয়, তাঁহারা যদি স্বদেশের ইতিহাস এবং স্ব জীবনের ইতিবৃত্ত লিখিয়া যাইতেন, তবে এই ধরাবিলুপ্তিতা ভারতমাতা এখনও গায়ের ধূলি ঝাড়িয়া, আবার দণ্ডায়মান হইতে পারিতেন । পুরাতন নাম এবং পিতৃপুরুষদিগের পুরাতন কাহিনী মৃতদেহেও জীবন সঞ্চারণে সমর্থ হয় । ফল-কথা, এই মনুষ্যের জীবনবৃত্ত পাঠ করিয়া, কোন উপকারের



প্রত্যাশা করিলে, আমাদিগকে ইউরোপ এবং আমেরিকাতেই অনুসন্ধান করিতে হইবে । স্বদেশে সে স্তরের আশা নাই ।

ইউরোপ এবং আমেরিকার অনেক মহাশয়ই আপনার জীবন আপনি গ্রন্থবদ্ধ করিয়া গিয়াছেন । কেহ স্বকীয় জীবনের আদ্যোপান্ত সমস্ত বৃত্তান্ত আধ্যাত্মিক প্রণালীক্রমে লিখিয়া গিয়াছেন । কেহ, সে পথ অবলম্বন না করিয়া, প্রণয়িবদ্ধ-বান্ধব কিম্বা পরিবারস্থ ব্যক্তিবর্গের নিকট নিজ জীবনের প্রধান অপ্রধান ঘটনাবলী উল্লেখ করিয়া, সৰ্ব্বদা পত্র লিখিয়া-ছেন । বন্ধু, বান্ধব কিম্বা পরিবারস্থ ব্যক্তির তদীয় পরলোক-প্রাপ্তির পর, সেই পত্র যত্নপূৰ্ব্বক সংলগ্ন করিয়া,—প্রসঙ্গের সঙ্গতির জন্ত মধ্য মধ্য আবার আপনাদিগের উক্তি পুরিয়া দিয়া, মনোজ্ঞ একখানি গ্রন্থ প্রণয়ন করিয়াছেন । ইংরেজী গ্রন্থালয়ে ঈদৃশ গ্রন্থের কিছুই অসম্ভাব নাই । নাম করিতে ইচ্ছা হইলে, অনায়াসে বড় ছোট শত শত গ্রন্থ ও গ্রন্থকারের নাম করা যাইতে পারে । কিন্তু যে উদ্দেশ্যে মনুষ্যের জীবনবৃত্ত পাঠ করা আবশ্যিক, কাহারও স্বরচিত জীবনচরিতপাঠে তাহা সম্যক সফল হয় কি না, বোধ হয়, ইহা সংশয়ের বিষয় ।

মনুষ্য ভীৰু । মনুষ্য দুৰ্বল । মনুষ্য পবের প্রশংসায় বাঁচে, পরের অপ্রশংসায় হাস্যমাত্র অঙ্গে লাগিলে ঢলিয়া পড়ে । সুতরাং, মনুষ্য আপনার সম্বন্ধে আপনি যাহা বলে, তাহা বেদ-বাক্যস্বরূপ মানিয়া লওয়ার পূৰ্বে, দুইবার চিন্তা করা আবশ্যিক । এইরূপ মনে করা যাইতে পারে যে, মনুষ্য কোন মিভৃত্তস্থলে বসিয়া, মনের কবাট একবারে খুলিয়া দিয়া, জীবনের সমস্ত গুটকথা যখন লিখিয়া যায়, তখন তাহাকে অবিশ্বাস করা একান্ত অসঙ্গত । কিন্তু আমরা স্পষ্টতার অনু-রোধে উল্লেখ করিতেছি, এস্থলে বিশেষ কোন মনুষ্যের প্রাপ্তি

অবিশ্বাস করিবার কারণ না থাকিলেও, মানবজাতির প্রকৃতিগত দুর্বলতাকে সম্যক্ বিশ্বাস না করিবার বহু কারণ বিদ্যমান রহিয়াছে। মনুষ্য একাকী উপবিষ্ট হইয়াই আপনার কথা লিখে বটে ; কিন্তু তাহার অবিরামপ্ৰসবিনী চিরসজ্জিনী করুণা তাহাকে সে নিগূঢ় নির্জন স্থানেও অসংখ্য মনুষ্যচক্ষুতে পরিবেষ্টিত করে। সে যেই মনে করে যে, তাহার দিকে বর্তমান ও ভাবী কালের লক্ষ চক্ষু তাকাইয়া রহিয়াছে, অমনি তাহার মনে ভয়ের সঞ্চার হয়। যাহা সাদা মনে লিখিয়া ফেলিব স্থির করিয়াছিল, এইক্ষণ সে তাহা একটুকু সাবধানভাবে লিখে, এবং লিখিয়া, এখান হইতে একটি অনুস্মার তুলিয়া ফেলে, এবং ওখানে ছুটি বিসর্গ ভরিয়া দেয়। তাহার হাতের কাগজখানিতেও তাহার সম্যক্ প্রত্যয় থাকে না। এইরূপ সংশোধনের পর সংশোধনে, পরিবর্তনের পর পরিবর্তনে, লেখকের প্রকৃত ও লিখিত জীবনে, ক্রমে ক্রমে এত প্রভেদ হইয়া পড়ে যে, বিবেচনার সহিত দেখিলে, একটিকে অশ্রুটির প্রতিবিম্ব বলিয়া স্বীকার করাও কঠিন হয়। পৃথিবীর অনেক প্রধান পুরুষের স্বলিখিত জীবনবৃত্ত এই দোষে দূষিত।

অনেকে অপেক্ষাকৃত সরল হইয়াও দুর্ভাগ্যবশতঃ আত্মবঞ্চক। তাঁহারা বস্তুতঃ যাহা নহেন, আপনাকে আপনার নিকট তাহা প্রমাণ করিবার অভিলাষে পুনঃপুনঃ প্রয়াস পাইয়া, পরিশেষে এমন জটিল ভ্রমজালে জড়িত হইয়া পড়েন যে, তাহা হইতে বাহির হওয়া আর তাঁহাদিগের পক্ষে সম্ভব হইয়া উঠে না। ধর্মপ্রবর্তক সম্প্রদায়ের অনেক স্মরণীয়নামা ব্যক্তি আপনার কাহিনী আপনি কহিতে গিয়া, এইরূপে ঠকিয়াছেন। তাঁহারা, ক্রোধে অধীর হইয়া পরপীড়নে প্রবৃত্ত হইলে, তাদৃশ প্রবৃত্তিকে ধর্মবৃত্তির ক্ষুরণ বলিয়া মনের নিকট প্রবোধ দিয়াছেন, এবং

লোককেও স্মরণে ঐরূপ বুঝাইতেই চেষ্টা করিয়াছেন। তাঁহা-  
দিগের সরলতার প্রতি অনেকের সংশয় নাই; কিন্তু তাঁহারা  
সরলভাবে নিজ নিজ মনের গতি সম্বন্ধে যাহা বলিয়া গিয়াছেন,  
তাঁহার প্রত্যেক কথাই উপরও লোকের তেমন আস্তা নাই।

কেহ কেহ আবার, সরলতার সীমা উল্লঙ্ঘন করিয়া, দৃষ্টের  
শরণ লইয়াছেন। তাঁহারা দৃষ্টভরে সংসারকে তৃণের সমানও  
জ্ঞান করেন নাই। লোকে হাস্যক কি ভালবাসুক, কিছুই প্রতি  
দৃষ্টিতে না করিয়া, নিজ জীবনের লোকভয়ঙ্কর দোষসমূহ কীৰ্ত্তন  
করিতেও তাঁহাদিগের অকুচি হয় নাই। তাঁহারা জগৎকে চম-  
কিত করিতে ইচ্ছা করিয়াছেন, এবং বস্তুতঃও জগৎ চমকিত  
হইয়াছে।

আধুনিক কবিসম্প্রদায়ের প্রিয় পুস্তক লর্ড বাইরণকে আমরা  
এই শ্রেণির লোক বলিয়া মনে করি। বাইরণ আত্মসম্বন্ধে ভ্রমাক্ত  
ছিলেন না; অভিমানে অন্ধীভূত ছিলেন। তিনি, অভিমানের  
উপর নির্ভর করিয়া, শব্দের অর্থ পরিবর্তন করিতেও সঙ্কুচিত হন  
নাই। তাঁহার অভিধানে পরিণামদর্শিতার নাম ভীকৃত্য এবং  
লোকের প্রতি শ্রদ্ধার নাম কাপুরুষতা। অনেক কথা তাঁহার  
লিখিতে লজ্জা হয় নাই; লোকের পড়িতে লজ্জা হয়। লজ্জার  
সঙ্গে ভ্রুংখও হয়। অমন ব্যক্তিটা, কেন সাধ করিয়া, আপনার  
অঙ্গে আপনি এত দাগ দিল,—ছিল বা ছিল, কেন কালিকলমে  
আবার তাহা লিপিবদ্ধ করিয়া রাখিয়া গেল, ইহা মনে করিলে  
মন পোড়ে। তিনি কবির মূর এবং অশ্রুচর বন্ধুর নিকট পত্র  
লিখার ছলে, আপনার যে ছবি আঁকিয়া তুলিয়াছেন, তাঁহার  
সমকালবর্ষিদিগের মধ্যে অনেকেই তাহা তাঁহার ছবি বলিয়া  
স্বীকার করেন না। তিনি কবি,—তাই কল্পনার কুহকে পড়ি-  
য়াছিলেন। আপনার প্রকৃতি যত না নিন্দিত, (কি ভয়ানক

দস্ত !) লোকের নিকট উহার তদপেক্ষাও নিন্দিত মূর্তি প্রদান করিতে যত্নশীল হইয়াছেন। তত্ত্বজিজ্ঞাসুর পক্ষে অতিনিন্দা ও অতিস্তুতি উভয়ই সমান।

আত্মদোষকীর্তনে রসিয়ু বাইরণকেও পরাভব করিয়াছেন। রসিয়ু বাইরণের জ্ঞান অভিমানে ক্ষীত হইয়া লিখেন নাই। সংসার তাঁহাকে সরল বলিয়া ধন্ত ধন্ত করিবে, তিনি, এই লোভবশতঃই, আপনার সম্বন্ধে মানবজিহ্বার অবক্তব্য, মানব-কর্ণের অশ্রোতব্য নানা কথা লিখিয়া গিয়াছেন। কিন্তু পৃথিবীর লোক এমনই চলগ্রাহী, এত যে প্রকাশ করা হইয়াছে, তথাপি অনেকে বলে যে, রসিয়ু স্থানে স্থানে চন্দ্রবিন্দু চুরি করিতে ক্রটি করেন নাই। ডাকাতি করিয়াছি, এমন কথা স্বীকার করিতে অনেকের সঙ্কোচ হয় না। স্বচরিত্রে চৌর্য্যাদোষের সংস্পর্শ থাকিলে, সেটুকু যত্নের সহিত আচ্ছাদন করিয়া রাখিতে প্রবৃত্তি হয়। রসিয়ুর স্বলিখিত জীবনবৃত্তে অবিবাস্যীরা এই দোষ আরোপণ করেন। তাঁহাদিগের এই সংস্কার যে, তিনি স্বকীয় চরিত্রের যে সকল দোষকে বিশেষ দোষ বিবেচনা করেন নাই, তৎসমুদয়ই অক্ষুন্নমনে বর্ণনা করিয়াছেন। যেগুলিকে তাঁহার নিজ মনেই একান্ত অপমানজনক বলিয়া বোধ ছিল, তাহার আবরণ যেমন ছিল, তেমনই রহিয়াছে।

অল্পদিন হইল, জন ষ্ট্রয়ার্ট মিলের স্বরচিত জীবনবৃত্ত প্রকাশিত হইয়াছে। অধুনাতন অনেক লোকেই তাঁহাকে বুদ্ধিগত ক্ষমতা বিষয়ে অসাধারণ মনুষ্য মনে করিয়া থাকেন। মিল আপনিও আপনাকে অসাধারণ মনে করিতেন, এইরূপ বিশ্বাস করিবার বিস্তর কারণ রহিয়াছে। তাঁহার চরিত্র যে, সর্বাংশে না হউক, অনেক অংশে তদীয় বুদ্ধির অনুরূপ ছিল, ইহাতেও সংশয় হইতে পারে না। তথাপি বোধ হয়, আপনার কাহিনী

আপনি বলিবার সময়, অস্পষ্ট ব্যক্তির যে দোষে নিপতিত হইয়াছেন, মিলও তাহা হইতে সম্পূর্ণ অব্যাহতি লাভ করিতে পারেন নাই। হিতবাদিসম্প্রদায়ের আদিপ্রবর্তক জেরিনি বেছামের নিকট মিলেরা পিতাপুত্রে অনেক বিষয়ে বিশেষ-রূপে শ্রী ছিলেন। মিল বেছামের প্রতি কোন অংশে অকৃত-জ্ঞের ভাব প্রকাশ করেন নাই। অথচ বেছামের ধ্বংস পরি-শোধের জন্ত, হৃদয় উন্মুক্ত করিয়া যে সকল কথা স্পষ্ট উল্লেখ করা উচিত ছিল, বোধ হয়, তাহার অনেক অমূল্য রহিয়াছে। বেছামের চরিতাখ্যায়ক, মিল এবং মিলের পিতাকে ক্ষমতা ও চরিত্র বিষয়ে যে স্থান প্রদান করিয়াছেন, মিল আপনাকে আপনি এবং সঙ্গে সঙ্গে আপনার পিতাকেও তাহা অপেক্ষা অনেক উচ্চ স্থানে তুলিতে যত্ন করিয়াছেন। বুদ্ধি অসাধারণ হইলেই যে, স্বগুণপক্ষপাতিতা তিরোহিত হয়, এমন নহে। জীবিত মনুষ্য জ্ঞতির মোহনকণ্ঠে বিমোহিত হয়। মুমূর্ষু মনুষ্য এই রোগ হইতে নিষ্কৃতি পায়, ইহা কে বলিবে ?

আপনার জীবন আপনি লিখিলেই যদি এত দোষ ঘটে, উহা পরের লেখনীদ্বারা আলিখিত হইলে, কত অপূর্ণতা থাকিয়া যায়, তাহা সহজেই অনুমিত হইতে পারে। মনুষ্য আপনার চক্ষে এক, পরের চক্ষে আর। সে যতক্ষণ একাকী, ততক্ষণ সরল। যেই তাহার উপর পরের দৃষ্টি পড়িল, অমনি কপটতার সুদৃশ্য আবরণে তাহার তনু আবৃত হইল। ইহা মনুষ্যের স্বভাবের দোষ নহে, মানবসমাজের অনুরক্তজনীয় শাস-নের ফল। সর্বতোভাবে সরল ব্যক্তি মানবসমাজে একদিনও তিষ্ঠিতে পারে কি না সন্দেহ। ইয়ুরোপীয়দিগের মধ্যে এইরূপ একটা কথা প্রচলিত আছে যে, শয়নঘরের সেবকের নিকট কোন মহাত্মাই দেবতা নহেন। কোন বিচক্ষণ পণ্ডিত ইহাও

বলিয়াছেন,—যদি কাহারও স্বভাবের অনুসন্ধান করিতে চাও, তাহার ভূতের নিকট জিজ্ঞাসা কর। এই সমস্ত প্রচলিত কথাই অর্থ বড়ই গভীর। লোক, আপনা হইতে উচ্চ কিম্বা আপনার সমানব্যক্তির সন্নিধানে গমন করিবার সময় যেমন ভাল বস্ত্রাদি ব্যবহার করে, সেইরূপ স্বকীয় স্বভাবের উপরও ভাল একখানি আবরণ দিয়া যায়। ঘরে যখন সে একাকী উপবিষ্ট থাকে, যখন সেবক ব্যতীত অন্য কেহ তাহার নিকট যাতায়াত করিতে পারে না, তখন বস্ত্রাদির উপরও তাহার মনোযোগ থাকে না, স্বভাবের বহিরাবরণ বিষয়েও, সে তত সাবধান রহে না।

চরিতাখ্যায়কেরা প্রায়শঃই বহিঃস্থ ব্যক্তি। তাঁহারা বাহির হইতে উঁকি মারিয়া, যৎকিঞ্চিৎ যাহা দেখিতে পান, তাহার সঙ্গে কল্পনার কোটি কথা মিশাইয়া বাস্তব এবং অবাস্তব উভয়-বিধ উপকরণ দিয়া, এক অদ্ভুত বস্তু সৃজন করেন। কোন্ কথা বলিলে লোকের মনে বিশ্বাসের সঞ্চার হইবে, কিসে সংসার মুগ্ধ এবং গ্রন্থের অধিকৃত ব্যক্তির প্রতি মনুষ্যের চক্ষু আকৃষ্ট হইবে, এ বিষয়ে যে পরিমাণে যত্ন থাকে, বোধ হয়, অমিশ্র সত্য প্রকাশের জন্য তাঁহাদিগের তেমন যত্ন হইয়া উঠে না।

চরিতাখ্যায়কদিগের মধ্যে অনেকে—ভক্ত। ভক্তের মন মৃত মহাত্মার গুণরাশি স্মরণ করিয়া; ভক্তির তরঙ্গে নাচিতে থাকে; দোষভাগের প্রতি ভুলিয়াও দৃষ্টিপাত করে না। অনেকে স্নেহানুরক্ত। স্নেহ মনুষ্যের চক্ষে কিরূপ ধূলি নিক্ষেপ করে, তাহা কাহাকেও বুঝাইতে হয় না। পুত্র কি কন্যা পরলোকগত পিতার জীবনবৃত্ত লিখিতে উপবিষ্ট হইলে অথবা পত্নী সংসারের নিকট মৃত পতির পরিচয় প্রদানের উদ্দেশ্যে লেখনী ধারণ করিলে, তাঁহাদিগের উদ্বেল হৃদয় কত দিকে প্রবাহিত হয়,

তঁাহারা ইচ্ছা করিয়া কত ভ্রমে নিপতিত হন, তাহা হৃদয়ালু ব্যক্তিমাত্রই অনুভব করিতে পারেন। অনেকে ভক্তি স্নেহের শাসন উল্লঙ্ঘন করিতে সমর্থ হইলেও, সম্প্রদায়বিশেষের প্রতি অনুরাগনিবন্ধন অন্ধ হইয়া পড়েন। ক্রম্‌ওয়েলের জীবনচরিত সম্বন্ধে বহু গ্রন্থ বিদ্যমান রহিয়াছে। কোন কোন লেখক ক্রম্‌ওয়েলকে দেবতা হইতেও বড় বলিয়া বর্ণনা করেন; কেহ কেহ আবার দস্যুর সহিত তঁাহার তুলনা দিতেও কুণ্ঠিত হয়েন না। লেখকদিগের রুচি ও প্রবৃত্তির বৈষম্য নিবন্ধনও অনেক স্থলে একই ব্যক্তির চরিত্র সম্বন্ধে বর্ণনার বৈষম্য ঘটিয়া উঠে। অনেকের জীবনচরিত হইতেই এ কথার প্রমাণ দেওয়া যাইতে পারে। আমরা, তাহা না করিয়া, কাব্য হইতে একটি উদাহরণ দিতেছি। শকুন্তলার নাম ও চরিত্রের সহিত পরিচয় না আছে, এদেশে তাদৃশ লোকের সংখ্যা অতি অল্প। কিন্তু ব্যাসের শকুন্তলা এবং কালিদাসের শকুন্তলা একস্থলে দণ্ডায়মান হইলে, ইনিই যে উনি, এইরূপ অবধারণ করা, অনেকের পক্ষেই কঠিন হয়। ব্যাসের শকুন্তলা পরবাক্ষরভাষিণী প্রগল্ভস্বভাবা তাপসী—কথার কথা কাটিতে সঙ্কোচ নাট, রাজা বলিয়া ভ্রূক্ষেপ নাই, লোকে কি কহিবে, কি না কহিবে, তৎপ্রতি অগ্নুমাত্রও দৃষ্টি নাই। কবির মানসকাননের শকুন্তলা লভার স্নায় কোমলা, নিঃশ্বাসের ভরও সয় না, আপনার তনুতে আপনি আবৃত। এইরূপ চরিতাখ্যায়কদিগের মধ্যে যঁাহারা ওজোগুণসম্পন্ন, তঁাহাদিগের লেখনীর গুণে অনেক দীনসম্ব ব্যক্তিও ওজস্বল বলিয়া প্রতিভাত হন এবং সময়ে সময়ে যথার্থ. বীরপুরুষেরাও, কাপুরুষের হাতে পড়িয়া, কাপুরুষের পংক্তিতে মিশিয়া যান।

পূর্বে উল্লেখ করা হইয়াছে যে, ভারতবর্ষের কোন মহা-  
আই আপনার জীবনচরিত, আপনি লিখিয়া যান নাই। ভারত-

বর্ষবাসীরা পরের জীবনচরিত লিখিতেও জানিতেন না । তাঁহার কবিতার কলকূজন শ্রবণেই মোহিত থাকিতেন । আর কোন-দিকেই চিত্ত প্রেরণ করিতে অবসর পাইতেন না । শাক্য সিংহ, শঙ্করাচার্য্য এবং চৈতন্যদেব প্রভৃতি কতিপয় সাধুপুরুষের জীবনবৃত্তান্ত অংশতঃ সঙ্কলিত আছে । কিন্তু তাহাও ভক্তের হাতে পড়িয়া বিকৃত হইয়াছে । পারসিকেরা, এ বিষয়ে অপেক্ষাকৃত উন্নত হইলেও প্রতিবেশীর সংসর্গদোষ হইতে সম্পূর্ণরূপে নিম্নুক্ত নহেন । জীবনচরিত লেখার আড়ম্বর গ্রীসদেশ হইতে আরম্ভ করিয়া উত্তরোত্তর পশ্চিমে । সে দিকে যত জনে অদ্য-পর্য্যন্ত লোকের জীবনচরিত লিখিয়া গিয়াছেন, তন্মধ্যে পণ্ডিত-দিগের সর্ব্ববাদিসম্মত সিদ্ধান্ত অনুসারে বস্‌ওয়েলই বিশেষরূপে প্রশংসনীয় । পণ্ডিতেরা বলেন, বস্‌ওয়েল চরিতাখ্যায়কদিগের রাজা । তিনি জনসনের সম্বন্ধে চরিতলেখকের কার্য্য করিতে গিয়া, চিত্রকরের কার্য্য করিয়াছেন । তাঁহার তুলিকায় সকলই উঠিয়াছে । আমরা যদিও বস্‌ওয়েলের চিত্রনৈপুণ্যের বিশেষ প্রশংসা করিতে সর্ব্বাস্তঃকরণে প্রস্তুত থাকি, তথাপি মানব-প্রকৃতি স্মরণ করিয়া, ইহা না বলিয়া থাকিতে পারি না যে, যথাযথ বর্ণনা বিষয়ে বস্‌ওয়েলও সকল সময়ে কৃতকার্য্য হন নাই । বস্‌ওয়েল, জনসনের আত্মার ভাৱে একেবারে অভিভূত ছিলেন । তিনি স্বপ্নেও জনসন বিনা আর কিছু দেখিতে পাইতেন না । দুর্ব্বল-স্বভাবা কুমারীরা যেরূপ ভূতাবিষ্ট হইয়া থাকে, তিনিও সেই-রূপ জনসনকর্ত্তৃক আবিষ্ট হইয়াছিলেন । এই গুণেই তিনি অভীপ্সিত ফললাভে সমর্থ হইয়াছেন ; অথচ এই গুণই আবার তাঁহার প্রধান দোষ । জনসনের সহিত অপরের তুলনা করিবার কালে, তাঁহার জ্ঞান-অজ্ঞান-বোধ থাকিত না ; এবং তাদৃশ ব্যক্তির হৃদয়ের মনোদোষটনের জন্ত যেরূপ বুদ্ধি আবশ্যক, তাহাও



তাঁহার ছিল না। তাঁহার স্বাভাবিক বুদ্ধি জনসনের নিকটবর্তী হইলেই স্তম্ভিত হইত। ওদিকে জনসন যতই সাধু হউন, তিনি বস্‌ওয়েলকে তাঁহার চরিতাখ্যায়ক বলিয়া জানিতেন। বস্‌ওয়েল তাঁহার মুখের কথা, নয়নের ভঙ্গি, তাঁহার হাস্য, তাঁহার ক্রোধ সমস্তই গ্রন্থবদ্ধ করিতে উপবিষ্ট রহিয়াছেন, ইহা সন্দেহ তাঁহার মনে জাগিত। মনে প্রতিক্ষণে এইরূপ ধারণা থাকিলে, কাহারও যথার্থ জীবন প্রকটিত হয় কি না, তৎসম্বন্ধে হাঁ কি না বলা নিতান্ত নিশ্চয়োজন।

জীবনচরিত পাঠের ফল সম্বন্ধে লোকের ভিন্ন ভিন্ন মত। কেহ বলেন, জীবনচরিত মনোবিজ্ঞানশাস্ত্রের শাখাবিশেষ। মানবপ্রকৃতির মৰ্ম্মপরিগ্রহ করা মনোবিজ্ঞানের মূল উদ্দেশ্য, এবং ভিন্ন ভিন্ন মনুষ্যের জীবনগ্রন্থ সমালোচনা দ্বারাই সেই উদ্দেশ্য সূচরূপে সংসিদ্ধ হয়। মানবমন অঙ্কুরিত অবস্থায় কিরূপ থাকে, উহার বৃত্তিসমুদয় কুসুমের আয় ক্রমে ক্রমে কিরূপে বিকসিত হয়, মনুষ্য কি অভিলাষে কোন্ কার্যে প্রবৃত্ত হয়, এবং তাহার হৃদয়যন্ত্রের কোন্ অঙ্গ স্পর্শ করিলে, কখন কি বাদ্য বাজিয়া উঠে, ইত্যাদি সমস্ত তত্ত্বই তাঁহার জীবনচরিত পাঠ করিয়া, সঙ্কলন করিতে ইচ্ছা করে। মনুষ্যের যথার্থ জীবন-বৃত্ত গ্রন্থবদ্ধ হওয়ার সম্ভাবনা থাকিলে, এই উদ্দেশ্য কেন, ইহা হইতে মহত্তর উদ্দেশ্যও জীবনচরিত পাঠেই সম্পন্ন হইত। কিন্তু, জগতে যে প্রণালীতে মনুষ্য, মনুষ্যের জীবন পাঠ করে, এবং পাঠ করিয়া লিপিবদ্ধ করে, তদ্বারা তাদৃশ উদ্দেশ্য সিদ্ধ হইতে পারে কি না, ইহা বস্তুতঃই চিন্তনীয়। বৈজ্ঞানিক, স্বকীয় ব্রত বিন্ধিত হইয়া, কবির কল্পনা ও বীণা লইয়া উপবেশন করিলে, না বুদ্ধিই ভোজ্য লাভ করে, না হৃদয়ই দ্রবীভূত হয়। যাহা হউক, এত অপূর্ণতা সত্ত্বেও আমরা মনুষ্যের জীবনচরিতে উপেক্ষা

প্রদর্শন করিতে পারি না । ইতিহাসশাস্ত্র এই দোষে দূষিত, তথাপি ইতিহাস জগতের অপরিসীম উপকার সংসাধন করিতেছে । জীবনচরিতশাস্ত্র, এই দোষে দূষিত হইলেও, তীক্ষ্ণ আলোচনা দ্বারা বথাসম্ভব শোধিত হইয়া, জগতের অশেষ উপকার সংসাধন করিবে । ইতিহাস মানবজাতির জীবনচরিত ; জীবনচরিত মনুষ্য বিশেষের ইতিহাস । যেমন ইতিহাস, প্রাচীন পিতামহের তায়, জগতের ভূত কথার প্রস্তাব করিয়া, মানবজাতির নির্বাণোন্মুখ আশার উদ্দীপন করে,—কোন্ জাতি উন্নতির সোপানে ক্রমে ক্রমে কিরূপে উঠিল, ক্রমে আবার কি হেতু জলে জলবুদ্বুদের গ্ৰাস্ত বিলীন হইল, তাহা কহিয়া নিয়ত শিক্ষা দেয় ; মনুষ্যের জীবনচরিতও মনুষ্যকে সেইরূপ উৎসাহ ও উপদেশ প্রদান করে । জাতীয় কাহিনী ব্যক্তিকে জাগরিত করিতে না পারিলেও ব্যক্তিবিশেষের কাহিনী অবশ্যই ব্যক্তিবিশেষের মৰ্ম্মস্থল স্পর্শ করিতে সমর্থ হয় ; সেই স্মৃতি, সেই দুঃখ, সেই আশা, সেই উদ্যম, সেই উত্থান ও পতন ; কেবল আধারের ভেদ ।

---

# নিন্দূকের এত নিন্দা কেন ?



এ দেশের এক প্রাচীন নীতিপ্রবক্তা এইরূপ বলিয়াছেন যে, পৃথিবী সকল ভার সহিতে পারেন, নিন্দূকের ভার সহিতে পারেন না। নিন্দূক পর্কত ও সমুদ্র হইতেও দুর্ব্বল। আবার সকল নীতিপ্রবক্তার শিরোমণি মহামনা সেক্সপীরও নিন্দূকের নিন্দা-চ্ছলে অতি মৰ্ম্মস্পর্শবাক্যে এই বলিয়া আক্ষেপ করিয়াছেন যে,—

“যে আমার ধনরাশি অপহরণ করে, সে আমার কিছুই অপহরণ করে না। উহা অবস্থামধ্যে পরিগণনীয়। উহা আমার ছিল, এইক্ষণ তাহার হইল, এবং পূর্বেও উহা সহস্র সহস্র লোকের ভোগে আসিয়াছিল। কিন্তু যে আমা হইতে আমার স্মৃতিমাটি অপহরণ করে, সে আপনি ধনী হয় না, অথচ আমায় প্রকৃতই দরিদ্র করে।”

এইরূপে দৃষ্ট হইবে যে, সমাজে সকলেই নিন্দূকের উপর খড়াহস্ত; সকলেই নিন্দূককে হৃদয়ের সহিত ঘৃণা করেন। নিন্দূকের জিহ্বার নাম বিষ, নিন্দূকের সাহচর্য্যের নাম নরক, নিন্দূকের কথোপকথনের নাম ভাষার কলঙ্ক। ইহা কেন ? নিন্দা যদি এমনই এক মহাপাতক, তবে এ পাপে কে না লিপ্ত ? মনুষ্যানিবাসে কে না পরের নিন্দা করে ? মনুষ্যের সহিত মনুষ্যের যত যত বিষয়ে আলাপ হয়, তাহার প্রধান এক ভাগই কি পর-নিন্দা নহে ? দুখানি জিহ্বা আর চারিটা কণ একস্থানে হইলেই

প্রায়শঃ একজন না একজনের নিন্দাবাদ আরম্ভ হয়, ইহা কি অস্বাকার করিবার কথা ?

আর একপ্রকারে দেখিতে গেলে নিন্দা অপরিহার্য্য। তুমি এই সংসারে যে কোন কার্য্যে লিপ্ত হও, তাহাতেই তোমাকে অল্প অধিক পরিমাণে নিন্দুক হইতে হইবে। যাঁহারা ধর্ম্মসংস্কারক, কি কোন বিশেষ সত্যের প্রচারক, তাঁহারা সকলেই নিন্দুকের অগ্রগণ্য। সম্প্রদায় বিশেষের নিগ্রহ বিনা, সাম্প্রদায়িক বিজয়পতাকা কোন দেশে উড্ডীন হয় নাই। লোকে লুণ্ঠরের কতই না প্রশংসা করে ; কিন্তু বিচারতঃ তাঁহার প্রধান প্রশংসা এই যে, পোপ এবং পোপের শিষ্যবর্গকে নিন্দা করিবার সময়ে, তিনি একাই একসহস্র জিহ্বা এবং সহস্রাধিক ভেরীর কার্য্য করিতেন। ক্যাথলিকগণ যেখানে তাঁহার একগুণ নিন্দা করিতেন, তিনি সেখানে অযুতগুণে তাঁহাদিগের নিন্দা করিয়া ঋণ পরিশোধে বস্ত্র পাইতেন। এইরূপ ঐতিহাসিক, এইরূপ চরিতাখ্যানক, এইরূপ রাজনীতিবেত্তা এবং এইরূপ সংবাদপত্রাদির সম্পাদক ও সাহিত্যসমালোচক। কেহ লোকান্তরবাসী রাজা ও রাজমহিষী এবং মৃত গ্রন্থকারদিগকে মন্তবলে পুনর্জীবিত করিয়া তাঁহাদিগের উপর নিদারুণ কশাঘাত করিতেছেন ;— কেহ জীবিত রাজপুরুষ, জীবিত গ্রন্থকার অথবা অথ কোন শ্রেণীর জীবিত প্রধান ব্যক্তিদিগকে ক্রীড়াপুত্তলের মত নিজ্জীব বিবেচনার যথেষ্ট গালি দিতেছেন। অধিক আর কি, কল্পনামাত্র যাঁহাদিগের সম্বল, সেই কবিগণও অতি সূক্ষ্ম কৌশলে লোকের নিন্দা করিয়া জগতে নিন্দার সার্থকতা দেখাইতেছেন। যখন সকলেই এই প্রকার কাহারও না কাহারও নিন্দা করিতে বাধ্য হইতেছেন, বল তবে নিন্দুকের আর নিন্দা করিব কেন ?

এই প্রশ্নটি প্রথমে যত সহজ বোধ হয়, বস্তুতঃ তত সহজ

নহে। ইহার প্রভাত্তরে অনেক কুট কথার আন্দোলন হইতে পারে। আমরা তথাপি সহজপথ অবলম্বন করিতেই চেষ্টা করিব।

আমাদিগের বিবেচনায় স্তুতি ও নিন্দা উভয়েরই সীমারেখা সত্য। সত্যকে উল্লঙ্ঘন করিয়া স্তুতি করিবে না, এবং সত্য উল্লঙ্ঘন করিয়া কখনও কাহারও নিন্দা করিবে না। কিন্তু যদিও একমাত্র সত্যই এই উভয়ের শেষ সীমা, কিন্তু একমাত্র কর্তব্য-বুদ্ধিতেই উভয়ের প্রবর্তনা নহে। মনুষ্য প্রণয়ের অধীন হইয়া, প্রিয়জনের স্তুতিবাদ করিতে পারে, ভক্তিরসে বিগলিত হইয়া, ভক্তিভাজনের গুণানুবাদ করিতে পারে। তাদৃশ স্থলে সত্যের মর্যাদা রক্ষা হইলেই হইল। আমরা তখন স্তুতি ও গুণানুবাদের প্রয়োজন ও অপ্ৰয়োজনের প্রতি দৃষ্টিপাত করিব না। উদ্বেল-হৃদয় অন্তরীক হৃদয়ের প্রতি প্রধাবিত হইলে, তাহাতে সংসারের সুখসমষ্টির হ্রাস হয় না, বরং বৃদ্ধি হয়। কিন্তু বিনা প্রয়োজনে ও বিনা বিবেক ও কর্তব্যবুদ্ধির শাসনে, মনুষ্য মনুষ্যের নিন্দা করিতে অধিকারী নহে। নিন্দা গরল; চিকিৎসক যেমন শুধু ঔষধার্থেই গরল ব্যবহার করিতে পারেন, উহা লইয়া খেলা করিতে পারেন না, যাহারা বিশেষ কোন মনুষ্য, কি বিশেষ কোন সমাজের উপকার করিতে চাহেন, তাঁহারাও শুদ্ধ সেই এক প্রয়োজনেই নিন্দার ব্যবহার করিতে পারেন, উহা লইয়া খেলা করিতে তাঁহাদিগের অধিকার নাই। তাঁহাদিগের কথা কেবল সত্য হইলেই হইবে না, কিন্তু যে কথা তাঁহারা বলিতেছেন, তাহাতে প্রয়োজন এবং ন্যায়পরতার শাসনও আছে কি না, তাহাও প্রগাঢ় দৃষ্টিতে দর্শন করিতে হইবে। যাহারা নিন্দুক বলিয়া পরিচিত, সাধারণ্যে তাহাদিগের যে এত নিন্দা, ইহাই তাহার এক প্রধান হেতু। তবে নিন্দারও প্রকার আছে, প্রকৃতি

আছে, এবং যেখানে উহার অন্ততলে বিবেক নাই, সেখানে অন্ত কোন গুঢ় কারণ আছে। কেহ আহুত নিন্দুক, কেহ অনাহুত নিন্দুক, কেহ বা রবাহুত নিন্দুক\*। নিন্দুককে কি পরিমাণে নিন্দা করিতে হইবে, তাহা অবধারণ করিবার পূর্বে সেই প্রকার, প্রকৃতি ও কারণের প্রতি দৃষ্টি করা আবশ্যিক।

নিন্দার এক কারণ সহানুভূতির অভাব। যাহার সহিত তোমার মতে মিলে না, হৃদয়ে মিলে না, তুমি তাহার নিন্দা কর এবং সেও তোমার নিন্দা করে। তাহার আত্মা তোমার নিকট এক গভীর অন্ধকার কূপ, তোমার আত্মাও তাহার নিকট এক গভীর অন্ধকার কূপ। ছুইয়েই ছুইয়ের বহিরাবরণ মাত্র দেখিয়া থাক, এবং শুদ্ধ বহিরাবরণ দেখ বলিয়াই, ছুইয়ে, ছুইয়ের সম্বন্ধে একে আর এক অর্থ কর। সাম্প্রদায়িকদিগের পরস্পর নিন্দা এই শ্রেণির,—যাহাদিগের মধ্যে অবস্থার পার্থক্য নিতান্ত বৃহৎ, তাহাদিগের পরস্পর নিন্দাও এই শ্রেণির, এবং বৃদ্ধ ও যুবজনের যে পরস্পর নিন্দা হইয়া থাকে, তাহাও প্রধানতঃ এই শ্রেণির। বৃদ্ধ, যুবার প্রতপ্ত ও প্রমত্ত হৃদয়ে প্রবেশ করিতে পারেন না—সে কেন হাসে, কেন কাঁদে, সে কি উৎসাহে উৎসাহিত হয়, কি হুঃখে জ্বলিয়া পড়ে, তিনি কোন দিন বুঝিয়া থাকিলেও, এখন আর তাহা বুঝেন না।

---

\* যাহাদিগকে সদস্য সমালোচনের জন্ত আহ্বান করা হয় অথবা লোকে স্বকৃত কর্মের দ্বারা ডাকিয়া আনে, তাহাদিগকে আহুত নিন্দুক বলি, যাহাদিগকে কেহ ডাকিয়া আনে নাই, জিজ্ঞাসা করে নাই, অথবা নিন্দার বিষয়ের সঙ্গে যাহাদিগের কিছুমাত্র সম্পর্ক নাই, তাহারা অনাহুত অথবা অনিমন্ত্রিত নিন্দুক। আর যাহারা পরের যশোধনি অথবা স্মৃতিতির রব শুনিয়া, আপনা হইতে আসিয়া উপস্থিত হয়, তাহারা রবাহুত নিন্দুক।

আবার, যুবজনেরা বৃদ্ধের শীতসঙ্কুচিত সাবধান প্রাণের মর্শ্বস্থান দর্শন করিতে সমর্থ হন না। তাঁহারা এক পা অগ্রসর হইবার পূর্বে কেন শতবার চিন্তা করেন, তাহাদিগের তরল বুদ্ধিতে প্রবেশ করে না। সহানুভূতির অভাবে কিরূপে নিন্দার সৃষ্টি হয়, আমরা তাহার প্রকারমাত্র দেখাইয়া দিলাম। চিন্তাশীল ব্যক্তির। ইহা হইতেই বহুবিধ কথার তাৎপর্য্যগ্রহ করিতে পারিবেন। সহানুভূতির অভাবমূলক নিন্দা কথঞ্চিৎ সহনীয়। কারণ, ইহার অভ্যস্তরে খলতার ভাগ অত্যন্ত। ইহা অনাহুত হইলেও ক্ষমাযোগ্য।

নিন্দার আর এক কারণ শক্তির অভাব অথবা অক্ষমতা। অশক্ত ও অধম ব্যক্তির। আপনা হইতে উচ্চতর ব্যক্তিদিগের নিকটে পৌঁছিতে পারে না,—তাঁহারা চিন্তার যে গ্রামে অবস্থান করেন, কল্পনার সহায়তায় যেখানে উড্ডীন রহেন, সেখানে উঠিতে সামর্থ্য পায় না, এবং সূতরাং তাঁহারা কেন কি করেন, তাহা ইহাদিগের নিকট কার্য্য ও কারণের শৃঙ্খলে দৃঢ়বদ্ধ বলিয়াই প্রতীয়মান হয় না। তাঁহাদিগের অতি সুন্দর কার্য্যও ইহাদিগের নিকট সুন্দর দেখায় না। ইহারা এই নিমিত্তই রূপাপাত্র। পৃথিবীর এক অসাধারণ পুরুষ মরণমুহূর্ত্তেও এই শ্রেণির নিন্দুক ও অত্যাচারিদিগকে আশীর্ব্বাদ করিতে পারিয়াছিলেন।

আপাততঃ এইরূপ বোধ হইতে পারে যে, যাহারা শক্তির অভাব কি ন্যূনতাহেতু নিন্দুক, তাহাদিগের দ্বারা সমাজের অনিষ্টসাধন হয়; কিন্তু প্রকৃত প্রস্তাবে তাহা হয় না। স্বাভাবিকী প্রতিভা, প্রথমতঃ যত কেন প্রচ্ছন্ন থাকুক না, উহা পাবকতুল্য। তুণরাশি কখনও উহাকে ঢাকিয়া রাখিতে পারে না। তুণ আপুনিই দগ্ধ হইয়া যায়। শক্তি ও অশক্তিতে, আলোকে ও

অন্ধকারে, জ্ঞানে ও অজ্ঞতায়, এবং পুরুষে ও অপুরুষে যেখানে বিরোধ হইয়াছে, ইতিহাসে সেখানেই এই কথা স্বর্ণাক্ষরে লিখিত রহিয়াছে।

নিন্দার তৃতীয় কারণ অতৃপ্ত ক্রোধ। ক্রোধ জিবাংসার অপক্ক ফল। কাহারও সম্বন্ধে মনে ক্রোধ জন্মিলে, স্বভাবতঃই তাহার অনিষ্ট সংসাধনে প্রবৃত্তি জন্মে। যেখানে সে প্রবৃত্তি পরিতৃপ্ত হইতে পারে না, সেখানকার পরিণাম নিন্দাবাদ। যদি কাহারও আচারে কি ব্যবহারে অথবা কোন কথায় আত্ম-দিগের অভিমান আহত হয়, এবং সেই আহত অভিমান, আহত সর্পের ছায়, তাহাকে ফিরিয়া দংশন করিতে না পারে, তাহা হইলেই আমরা সেই ব্যক্তির নিন্দা করিয়া থাকি। এই প্রবন্ধে নিন্দার যে সকল উদাহরণ দেওয়া হইয়াছে, আহার অনেকটাই এই শ্রেণিতে স্থান পাইবে। আর, সমৃদ্ধ ও সম্পন্ন ব্যক্তিরা যে হীনাবস্থ ব্যক্তিগণকর্তৃক অনেক সময়ে নিন্দিত হইয়া থাকেন, তাহারও কারণ এই বলিতে হইবে। নীতিনিপুণ পণ্ডিতেরা এই জন্তই উপদেশ করিয়াছেন যে, কাহারও অভিমানে অকারণে আঘাত করিও না, কাহারও ক্রোধান্বিতেও বিনা প্রয়োজনে ঘৃণাহৃতি দিও না। ইহা ছায়েই চক্ষে অসহ্য, ইহা দয়ার চক্ষে নিষ্ঠুরের কার্য্য, ইহা বুদ্ধির চক্ষে অশুভকর। যাহারা আহত হইয়া নিন্দা করে, তাহারা আহত নিন্দুক বলিয়া গণ্য হইতে পারে। কারণ, তাহারা কথায় আহত না হইলেও কৰ্ম্ম দ্বারা আহত।

নিন্দার চতুর্থ কারণ জাতীয় বিদ্বেষ। ইহার অভ্যন্তরে সহানু-ভূতির অভাব আছে, অজ্ঞতা আছে, এবং তদতিরিক্ত বিদ্বেষ আছে। ইহাও আহত মধ্যোই পরিগণনীয়। এই বিদ্বেষবুদ্ধির বশবর্তী হইয়াই ফরাশি, পুশীয়ানের সর্ব্বাঙ্গে কালিমা দেখেন,



এবং ইহারই প্রণোদনায় পুণীয়ার পরমধার্মিক ব্যক্তিও ফরাশির নিন্দাবাদে জিহ্বাকে কলুষিত করেন। ইহার আরও অনেক দৃষ্টান্ত অঙ্গুলিনির্দেশ সহকারে প্রদর্শন করিতে পারি; কিন্তু চক্ষুখানের জন্য তাহা অনাবশ্যক।

নিন্দার পঞ্চম ও শেষ কারণ পরশ্রীকাতরতা। ইহাকে স্বশ্রীকাতরতা বলিলেও ভাষায় গুরুতর দোষ ঘটে না। কেননা ইহা স্বজাতি ও পরজাতির মধ্যে স্বজাতীয় ও সন্নিহিত প্রতিবেশীকেই বিশেষতঃ লক্ষ্য করে, এবং বলিব কি—ইহা দূর সম্পর্কিত অপেক্ষা নিকট সম্পর্কিতকে, যথার্থ পর অপেক্ষা মনগড়া পর—আপনার জনকেই বরং অধিকতর স্পর্শ করে। নিন্দার অন্ত অন্ত কারণ সম্বন্ধে যে কোন কথাই কেন বল না, বোধ হয়, যুক্তির কোনরূপ আকুঞ্চেই পরশ্রীকাতরতামূলক জঘন্য নিন্দাবাদের পক্ষ সমর্থন করা সম্ভব হইবে না। যাহারা পরশ্রীকাতরতার বিষমজ্বালায় দগ্ধ হইয়া, স্বদেশীয় কি স্বজাতীয় উন্নত ব্যক্তিদিগের অনর্থক নিন্দা করে, যেখানে অমৃতের প্রত্যাশা, সেখানে গরল ঢালিয়া দেয়, সম্মুখে স্তুতিবাদ করিয়া, পরোক্ষে আঘাত করিতে থাকে, তাহারা যেমন খলস্বভাব, তেমনই ক্ষুদ্রপ্রাণ। যদি নিন্দুক শব্দের কিছুমাত্র অর্থ থাকে, তবে ইহারাই সেই নিন্দুক। ইহারাজ্যোৎস্না দেখিলেই চক্ষু মুদিয়া রহে, এবং সমস্ত দিনও যদি ইহার প্রফুল্ল কুসুমকাননে পরিচারণ করে, তথাপি ইহার করে কতিপয় কণ্টকমাত্র লইয়াই গৃহে প্রত্যাগত হয়। ইহারাই প্রকৃত রবাহৃত নিন্দুক। অভ্যুদয়ই ইহাদিগের চক্ষে অপরাধ এবং উন্নতিই ইহাদিগের চক্ষে পাপ। ইহার অভিমানশূন্য,—কারণ, যেখানে অভিমান আছে, সেখানে বিনা আঘাতে পরকীয় সমৃদ্ধিতে কাতরতা হয় না। ইহার কাপুরুষ—কারণ যেখানে পৌরুষ-তেজস্বিতার কণিকা মাত্রও বিদ্যমান

থাকে, সেখানে অশ্রুদীপ্ত শক্তি, সামর্থ্য ও সম্পদরাশিতে আনন্দ বই কখনও দীর্ঘা ও অন্তর্দাহ জন্মে না।

মনুষ্যসমাজে অদ্যাপি নিন্দায় কর্তব্যবুদ্ধি ও ত্রায়পরতায় একাধিপত্য প্রতিষ্ঠিত হয় নাই। বিবেকের বশবর্তী হইয়াই মনুষ্য মনুষ্যের নিন্দা করে না। যেদিন তাহা হইবে, সে দিন মনুষ্যসমাজে অর্ধেক দুঃখভার কমিয়া যাইবে।

---

# ভালবাসা

---

ভালবাসা এক মহাযজ্ঞ ; এ যজ্ঞের আহুতি স্বার্থ, এ যজ্ঞের দক্ষিণা মান। যেখানে স্বার্থ রক্ষা করিতে চাও, সেখানে ভালবাসিতে চেষ্টা করিও না ; যেখানে মানে মানে রহিতে অভিলাষী হও, সেখানেও ভালবাসা দেখাইও না।

অনেকেই অনেকের সহিত ভালবাসা আছে বলিয়া গৌরব করেন, এবং ভালবাসা প্রসঙ্গে শতমুখে শতকথা বলেন। কিন্তু ভালবাসা কাহাকে বলে, তাহা অন্তরে অনুভব করা দূরে থাকুক, ক্ষণকালও তাঁহারা ভাবিয়া দেখেন না। যেমন সমুদ্র মছন করিয়া অমৃত, তেমন ভাষারূপ অনন্তজলধি মছন করিয়া ভালবাসা। মনুষ্যের ভাষায় ইহা অপেক্ষা মিষ্টতর শব্দ নাই, মনুষ্যের করণা কি ভোগের জন্তও ইহা অপেক্ষা মহত্তর সামগ্রী নাই। তুমি আমি স্বার্থের দাস, মানের ভিখারী, আমরা কিরূপে ভালবাসিব ? যিনি ভালবাসিতে পারেন, তিনি মহাযোগী. মহাদেব ; তাঁহার পদরেণু স্পর্শ করিতে পারিলেও আমি আমাকে কৃতার্থ মনে করি।

দয়া আর ভালবাসা এক কথা নহে। আমরা অনেককে দয়া করি, কিন্তু ভালবাসি না। তাহাদিগের অবস্থা দেখিয়া আর্দ্রচিত্ত হই, অশ্রুমোচন করি, এবং উপকার পক্ষেও সাধ্যানুরূপ যত্নশীল রহি ; অথচ তাহাদিগকে হৃদয়ের অভ্যন্তরে আনিয়া পুষিতে চাহি না। তাহাদিগের অতিনিকটস্থ হইলেও আপনাকে দূরস্থ বলিয়া মনে করি, এবং মিশিবার জন্ত শত চেষ্টা

করিলেও আপনা হইতে ফিরিয়া আসি। তখন কে যেন কোথা হইতে পশ্চাদিকে আকর্ষণ করে, এবং কি কারণে যেন মধ্যে এক বৃহৎ ব্যবধান আসিয়া উপস্থিত হয়। ভালবাসায় কি বিকর্ষণ ও ব্যবধান আছে? যে সকল দীনদুঃখীরা কোন দিন নানাবিধ পাপাচরণ করিয়া, এইক্ষণে রাজপথের উভয় পার্শ্বে উদরান্নের জন্ত অনবরত চীৎকার করিতেছে, যে সকল বারবিলাসিনীরা এক সময়ে রূপর্যোবন এবং নানাবিধ গুণপনার পণ্যবীথিকায় বাণিজ্য করিয়া, আজি কালের শাসনে হৃতসর্বস্ব ও অস্পৃশ্য হইয়া পড়িয়াছে, যাহাদিগের ললাটপট্টের প্রত্যেক রেখায় হিংসা, দ্বেষ ও অশ্লিষ্ট অশেষবিধ দুঃপ্রবৃত্তির করলেখা অঙ্কিত রহিয়াছে,—অধিক আর কি, যাহারা দুদিন পূর্বেও অকারণে তোমার অনিষ্ট চেষ্টা পাইয়াছে এবং মনুষ্যের স্নেহের পথে অপ্রয়োজনে কণ্টক দিয়াছে, যদি তোমার হৃদয় থাকে, তবে তুমি তাহাদিগকেও দয়া করিতে বাধ্য। বস্তুতঃ, তাহারাই দয়ার প্রকৃত পাত্র, এবং যে না তাহাদিগকে দয়া করে, সে আপনিই দয়ার্হ দীনাশ্রা। কিন্তু, তাহাদিগকে যেমন দয়া করিতে পার, সেইরূপ কি ভালবাসিতেও পার?

কাম, অপভ্যাস্নেহ এবং আসঙ্কলিপ্সা প্রভৃতি দুর্নিবার পাশব প্রবৃত্তির প্রণোদনাতোও এক প্রকার ভালবাসা জন্মে। কিন্তু আমরা তাহাকেও যথার্থ ভালবাসা বলিতে সাহসী হই না। আদৌ, এ প্রকার প্রবৃত্তিজন্ত ভালবাসায় সাগরাভিসারিণী বর্ষাকালীন স্রোতস্বিনীর বেগবত্তা থাকিলেও, স্বাধীনতা নাই। আত্মা ইহাতে আপনার হইয়া আপনি চলিতে পারে না, ইচ্ছা নিরঙ্কুশ বিহার করিতে সমর্থ হয় না। শৃগাল, কুকুর, পণ্ড, পক্ষী, কীট, পতঙ্গ ইত্যাদি যাবতীয় প্রাণীই ঐদৃশ ভালবাসার অধীন হইয়া, অহোরাত্র যন্ত্রবৎ চালিত হইতেছে, অথচ তাহারা

ইচ্ছা কি অনিচ্ছা কিছুই করিতেছে না । যেমন চালনা হইতেছে, তেমন তাহারা চলিতেছে, যেমন প্রেরণা হইতেছে, তেমন তাহারা প্রেরিত হইতেছে । যেই প্রবৃত্তির বিরাম, সেই আস-  
ক্তিরও বিরাম । তার পর কে আর কোথায় ? যদি এই প্রকার ইচ্ছাসম্পর্কশূন্য অপকৃষ্ট অনুরাগকেও ভালবাসা নাম দিতে অভি-  
লাষী হও, তবে জলের প্রতি তৃষ্ণাতুরের, অগ্নির প্রতি বৃত্ত-  
কুর এবং ভেকের প্রতি ভুজঙ্গেরও ভালবাসা আছে বলিতে  
অপরাধ কি ?

উল্লিখিত প্রবৃত্তিচয় মনুষ্যহৃদয়ে অপেক্ষাকৃত উন্নত । মনুষ্য  
শিক্ষা ও সভ্যতার মাহাত্ম্যে, উচ্চতর মনোবৃত্তিসমূহের ক্রমিক  
বিকাশের সঙ্গে সঙ্গে, যে পরিমাণে উন্নত হইয়া থাকে, মনুষ্যের  
নিকৃষ্ট প্রবৃত্তিসকলও মার্জনার পর পরিমার্জিতায়, সংস্কারের পর  
পুনঃসংস্কারে, সঙ্গে সঙ্গে সেই পরিমাণে উন্নতি লাভ করে ।  
তখন স্মরাক্রান্তাও প্রীতির স্রায় সুন্দর প্রতিভাত হয়, অন্ধ অপ-  
ত্যম্বেহও অকৃত্রিম বাৎসল্যের মূর্তি ধারণ করে, এবং যে প্রকার  
আসক্তলালসা কোন হেতুতেই ভালবাসার মধ্যে পরিগণিত  
হইতে পারে না, তাহাও ভালবাসা বলিয়া ভ্রান্তি জন্মাইয়া থাকে ।  
কিন্তু বুদ্ধির স্মৃতিষ্ক দৃষ্টি ইহাতে একবারে ভুলিয়া যাইবে কেন ?  
দেখিয়াছি, মনুষ্য যাহাকে অন্তরের সহিত ঘৃণা করে, যখন আর  
কেহ নিকটে না থাকে, তখন তাহাকে নিকটে পাইলেও সে  
আত্মদানে অধীর হইয়া উঠে । ইহাও দেখিয়াছি, মনুষ্য প্রবৃত্তি-  
বিশেষের অনুশাসনে এই মুহূর্ত্তে যাহাকে রত্নহার বলিয়া হৃদয়ে  
ভুলিয়া লয়, পরমুহূর্ত্তেই তাহাকে কলঙ্কপঙ্কিল জঘন্ম বস্তু জ্ঞানে,  
পাদদলিত কুসুম বিবেচনায়, দূরে ফেলিয়া পলায়ন করে ।  
যেখানে স্বার্থানুসারিণী ভোগ-স্পৃহা এত বলবতী এবং স্বস্বার্থের  
প্রতি এত দৃষ্টি, সেখানে কেমন করিয়া ভালবাসা থাকিতে

পারে ? এ কথা মানি যে, অনেকে আগে সুখের জন্ত কি ভোগের জন্ত, অথবা অন্য কোন ক্ষণিক উত্তেজনায় কাহারও সহিত সম্পৃক্ত হয় ; তাহার পর ক্রমে ক্রমে তাহাকে ভালবাসিতে শিক্ষা করে ; শেষে প্রাণের সহিত তাহাকে ভালবাসে । কিন্তু গুপ্তিতে মুক্তা জন্মে বলিয়া, গুপ্তি আর মুক্তা এক নহে, এবং পুষ্করিণীর কর্দমময় আবিল জল হইতে নয়নবিনোদিনী ভুবনমোহিনী পদ্মিনী ফুটিয়া উঠে বলিয়া, ঐ কর্দম আর ফুল পদ্মিনীও অভিন্নভাবাপন্ন এক পদার্থ নহে ।

কৃতজ্ঞতা এবং ভালবাসাতেও স্পষ্ট পার্থক্য আছে । উহা ভালবাসার অতিসন্নিহিত, তথাপি ভালবাসা হইতে বিভিন্ন । যদি কোন অশ্রদ্ধেয় মনুষ্যও নিয়ত তোমার উপকার করে, তুমি তাহার নিকট জন্মের মত কৃতজ্ঞ থাকিবে, এবং তদীয় প্রত্যপকার সাধনের জন্ত চিরদিন যত্নপর রহিবে । তবে, এইরূপ করিলেই ভালবাসা হয় কি না, তাহার সাক্ষী তোমার হৃদয় । হৃদয় কৃতজ্ঞতার দুর্ব্বলভারে অনেক সময়ে একবারে ছলিয়া পড়ে ; কিন্তু প্রতিদানে আপনাকে অর্পণ করিতে পারে না বলিয়া, অহর্নিশ তুষানলে দগ্ধীভূত হইতে থাকে । উহার তদানীন্তন মুগ্ধরূদাহ কেহ দেখিতে পায় না, কেহ অহুভব করিতেও সমর্থ হয় না । যদি তাহা কখনও প্রকাশিত হয়, সে প্রকাশ দীর্ঘনিঃশ্বাসে ; যদি তাহা কখনও দুঃখ হয়, সে দর্শন পরিম্লান মুখচ্ছবিতে । পৃথিবীতে অনেক ব্যক্তি পিতার স্নেহ-ঋণ পরিশোধ করিতে না পারিয়া, চিরকাল বিলাপ করিয়াছেন, অনেকে প্রেমতীর পদারবিন্দকে প্রীতিপবিত্র বাষ্পবারিতে বিধৌত করিতে না পারিয়া, কতই পরিতাপ করিয়া গিয়াছেন । কিন্তু মনুষ্যে যাহা থাকিলে, মনুষ্য তাহাকে ভালবাসিতে পারে, তাঁহার পিতা কি প্রেমতীরে তাহা না দেখিয়া, কেবল হৃৎখের

অন্তর্গত বিষয়শনই ভোগ করিয়াছেন। কৃতজ্ঞতার ইহা অপেক্ষা আর উচ্চতর সম্পর্ক কোথায় সম্ভবে ?

এদেশে এখন আর পরিণয়ে স্বাধীনতা নাই, এবং প্রণয়ে পাণিদান বিষয়ে কুলকামিনীগণের আপনার উপর আপনার আধিপত্য নাই। তাঁহারা অভিভাবকগণ কর্তৃক ভোজ্যানের ন্যায় উৎসৃষ্ট হয়েন, এবং ভোজ্যানের মত ব্যবহার পাইলেই সর্বথা চরিতার্থ রহেন। তাঁহারা পিঞ্জররুদ্ধ বিহঙ্গীর মত,— অন্ন আশা, অন্ন আকাঙ্ক্ষা এবং অন্ন তৃষ্ণা ; সুতরাং অতি অল্পেতেই তাঁহাদিগের পরিতৃপ্তি। কৃতজ্ঞতার আর ভালবাসায় কত প্রভেদ, তাহা তাঁহারা কিরূপে বুঝিতে পারিবেন ? এক মুষ্টি তণ্ডুল, কি একখানি স্বর্ণভরণ পাইলেই যে আত্মাদে অবশ হইয়া পড়ে, কদাচিৎ কোন সময়ে পতিমুখে রূপার পরিচয় স্বরূপ একটি প্রিয় কথা শুনিলেই, যাহার হৃদয় অননুভূতপূর্ব সৌভাগ্যগর্বে নাচিয়া উঠে, যে প্রতিদিন প্রতি মুহূর্ত্তেই আদর ও অনাদর এবং অনুগ্রহ ও নিগ্রহের চঞ্চল-দোলায় দোলায়িত হইয়া থাকে, কাহারও প্রতি কৃতজ্ঞ হইলেই যে তাহাকে ভাল-বাসা হয় না, তাহার সংকীর্ণ অন্তঃকরণ কেমন করিয়া তাহা ধারণা করিতে সক্ষম হইবে ? কিন্তু যে দেশে প্রণয়, পরিণয় ও আত্মসমর্পণ বিষয়ে মনুষ্যমাত্রেরই স্বাধীনতা আছে, সেখানে পুরুষন্দরীরা সকলেই এই পার্থক্য ও প্রভেদ বুঝিতে সমর্থ হইয়াছেন, এবং বুঝিয়া গীতে, কাব্যে, উপন্যাসে ও অশ্রুজলে তাহার পরিচয় দিতেছেন।

প্রশংসার বিনিময়ে প্রশংসাদানে, এবং স্তুতির বিনিময়ে স্তুতিবাদপ্রদানেও এক প্রকার ভালবাসা জন্মিয়া থাকে। মনুষ্য যত কেন চেষ্টা করুক না, সে যশঃস্পৃহার অসহ্য কণ্ডূয়ন হইতে কখনই অব্যাহতি পাইবে না। শৈশবে উহা বালসহচরীর মত

তাহার সহিত ক্রীড়া করে, যৌবনের প্রমত্ততার সময়ে উহা তাহার হৃদয়ে আর এক প্রকার মদিরা ঢালিয়া দেয়, পৌচাবস্থায় পরিণামচিন্তার দিনে উহা তাহাকে পুতুলের মত নৃত্য করায়, এবং বার্কিক্যের চরমশয্যাতেও উহা তাহাকে সুখশীতল হস্তাবলম্ব দিয়া, ক্ষণকালের তরে উঠাইয়া বসায়। এমন যে বশঃস্পৃহা, ইহা যাহার দ্বারা পরিপুষ্ট লাভ করে, তাহাকে প্রিয়জ্ঞান হইলে, দুর্বলচেতা মনুষ্যকে দোষী বলিব কেন ? যদি তুমি কর্তব্যের কঠোরব্রত হইতে স্থলিত না হইয়া, হৃদয়ের সহিত কাহারও প্রশংসা করিতে পার, সে অবশ্য তোমাকে ভালবাসিবে ; এবং যে ঐক্লপ সাধুহৃদয়ে তোমার প্রশংসা করিতে পারিবে, তুমিও তাহাকে ভাল মনে করিবে। তাহার আত্মা তোমার অভিমান-বহ্নিতে ইন্ধন দিবে, এবং তুমিও তাহার অভিমানে উপযুক্ত ইন্ধন দান করিয়া, তদীয় সম্পর্কে সম্মান-কর বিবেচনায় আনন্দে ক্ষীত হইবে। কিন্তু এক্লপ ভালবাসা অকলঙ্ক হইলেও উচ্চতম শ্রেণির নহে, এবং ইহাতে মনুষ্যের মন ইহলোকেই স্বর্গের পূরস্বাদ প্রাপ্ত হয় না।

যথার্থ ভালবাসা এই সকল ক্ষুদ্রভাবের বহু উর্দ্ধে অবস্থান করে। উহাতে দয়ার আর্দ্রতা আছে, উপেক্ষা নাই ; কামাদি সংযোজনী বৃত্তির প্রবল বেগবন্তা আছে, আবিলতা নাই ; কৃতজ্ঞতার নম্রতা আছে, নীরসতা নাই ; এবং অন্ত্রোত্তস্তাবকতার দান আছে, প্রতিগ্রহ নাই। ফলাফল বিবেচনা, ক্ষতিলাভ গণনা এবং ভূতভবিষ্যদ্বাবনা উহার জ্যোতির্শ্বের নিম্নল সান্নিধ্যে কখনও পঁহুঁছিতে পারে না। যে ভালবাসে, তাহার পক্ষে অন্য আর কল্য কি ? লাভ আর অলাভ কি ? এবং সুখ দুঃখই বা কি ? ভালবাসিয়া কি কেহ কোন দিন সুখী হইয়াছে ? না ভালবাসিয়া কেহ কোন দিন প্রতিরোমপ্রসূত দুর্বিসহদুঃখকেও দুঃখ



বলিয়া জ্ঞান করিয়াছে ? যখন মহাত্মা ভবভূতি সীতাস্পর্শ-মুক্ত প্রেমবিহ্বল রামচন্দ্রের মুখে বলিয়াছিলেন যে,\*—“এ আমার কি হইল ! একি আমি সুখানুভব করিতেছি, না দুঃখে জর্জরিত হইতেছি ; একি আমি জাগরিত রহিয়াছি, না নিদ্রায় অবসন্ন হইয়া পড়িতেছি ; একি আমার শরীরে বিষসঞ্চার হইতেছে, না মদধারা প্রবাহিত হইতেছে !” তখন তিনি বুঝিয়াছিলেন যে, ভালবাসা কি । যেমন মেঘাচ্ছন্ন নভোমণ্ডলে প্রতিভাময়ী ক্ষণ-প্রভার ক্ষণিক চমক, তেমন মোহাচ্ছন্ন মনুষ্যমনে প্রীতির প্রাণ-গতরসস্বরূপ প্রকৃত ভালবাসার ক্ষণিক বিকাশ । উহা যাহার হৃদয়ে যতক্ষণ থাকে, সে অনন্ততঃ ততক্ষণের জন্য দেবত্ব পায়, ততক্ষণ দিব্যচক্ষে দর্শন করে এবং জীবনমৃত্যুর সন্ধিস্থলে দণ্ডায়মান হইয়া, ততক্ষণ আপনার ভাবে আপনি পরিপূর্ণ रहे ।

লোকে ভালবাসাকে অনুরাগ বলে, আমি উহাকে বৈরাগ্য বলি । ভালবাসা অনুরাগে বৈরাগ্য, বৈরাগ্যে অনুরাগ । যে ভালবাসে, সে নিষ্কাম, নিঃস্পৃহ, নিরিন্দ্রিয় । সে তৃপ্তির জন্য লালায়িত নহে, কারণ তাহার হৃদয়ে অনন্ত অতৃপ্তি । সে যাহা দেয়, তাহা পাইবার জন্য প্রত্যাশা করে না, এবং দিয়াও আপনি পরিতৃপ্ত হয় না । যদি তদীয় জীবনের বর্তমান মুহূর্ত্ত হইতে সেই সৃষ্টিবিপ্লাবক মহাপ্রলয় পর্য্যন্তও সে ভালবাসিতে পারে, তথাপি তাহার আকাজ্জিকা ফুরায় না । কি ভয়ঙ্কর তৃষ্ণা ! কি অচিন্তনীয় যাতনা ! কে কুসুমদামসংস্থিত শিশিরবিন্দুর ন্যায় মনুষ্যের হৃদয়বিন্দুতে এই অনন্তের প্রতিমাকে প্রতিবিস্তিত

---

\* “বিনিশ্চেতুং শক্যে ন সুখমিতি বা দুঃখমিতি বা ;

প্রবোধো নিদ্রা বা কিমু বিষবিসর্পঃ কিমু মদঃ ।

তব স্পর্শে স্পর্শে মমহি পরিমূঢ়েন্দ্রিয়গণো-

বিকারশ্চৈতন্যং ভ্রময়তি সমুন্মীলয়তি চ ॥”

করিয়া রাখিল? কে তাহাকে সেই দুর্নিরীক্ষ্য অলৌকিক জগতের আভা মাত্র দেখাইয়া, হায় ! এইরূপ উন্মাদিত করিল ? প্রকৃতির মর্ম্মার্থদর্শী কবিগুরু সেক্ষপীয়র, কবি, প্রেমিক আর পাগল, এই তিনকে এক শ্রেণিতে নিবিষ্ট করিয়াছেন । ইহাতে তাহার কি কবিত্ব, কি প্রেমিকতা, আর কি প্রমত্তহৃদয়তাই প্রদর্শিত হইয়াছে ! কবি প্রকৃতিকে ভালবাসে, প্রেমিক আপনার হৃদয়-পুত্তলকে ভালবাসে, আর পাগল আপনার ভাবকে আপনি ভালবাসে । তিনই ভালবাসার দাস । ইহাকে এইরূপ বলিলেও হয়, যে ভালবাসে, সেই কবি, আর যে কবি, সেই ভালবাসে ; যে ভালবাসে, সেই পাগল, আর যে পাগল, সেই ভালবাসে । ভালবাসায় নিত্যযৌবন, নিত্যবসন্ত, নিত্যানুতনত্ব ! কবি না হইলে, আর পাগল হইতে না পারিলে, সেই মন্দাকিনীদ্বীপে অমৃতনিকেতনে—প্রেমময়ী প্রকৃতির সেই নিভৃত কুঞ্জকাননে কে প্রবেশ করিতে পারে ?

সাধনায় সিদ্ধি আছে, এবং তপশ্চর্য্যায়ও মুক্তি আছে । ভালবাসা অতি দুঃসাধ্য সাধনা, অতি দুষ্কর তপশ্চর্য্যা ; কিন্তু ইহাতে সিদ্ধি, মুক্তি, কিছুই নাই । শ্রোতের জল সাগরে গিয়া বিরাম লাভ করে । যে ভালবাসে, তাহার হৃদয়ের শ্রোত চিরকাল চলিতে থাকে, চিরকাল চলিতে থাকিবে, কোথাও গিয়া উহার বিরাম নাই । কেন যে, সে ভালবাসে, স্বার্থের এই স্বল্প প্রশ্ন কখনও তাহার মনে উদিত হয় না ; হইলেও তাহার দ্বারা এই প্রশ্নের উত্তর হয় না । যদি প্রশ্ন এবং উত্তর করিতেই সে সমর্থ হইবে, তবে আর তাহার ভালবাসা কিসে ? এবং সে ভালবাসিবেই বা কেন ?

তবে কি ভালবাসায় কোন পুণ্য নাই ?—আছে । সে পুণ্য অতি মহামূল্য পদার্থ, দেবহুর্ভব রত্ন । যাহার ভাগ্যে তাহা

ঘটে, সে তাহা ভোগ করে, অথচ জানিতে পায় না । জানিলে আর উহা তাহার ভোগে আসে না । ভালবাসার এক অসামান্য গৌরব এই যে, উহা মনুষ্যকে মহত্ত্ব প্রদান করে । পূর্বেই ইহা বলিয়াছি যে, এ যজ্ঞের আহুতি স্বার্থ, ইহার দক্ষিণা মান । যে ভালবাসে, তাহাকে অবশ্যই স্বার্থ ত্যাগ করিতে হয়, নহিলে সে ভালবাসিতে পারে না ; এবং যে ক্রমে ক্রমে স্বার্থ ত্যাগ করিতে শিক্ষা করে, সে অবশ্যই মহত্ত্ব লাভ করিয়া পূর্ণকাম হয় । মনুষ্যহৃদয়ের বিকাশের পথে যত প্রকার অন্তরায় আছে, স্বার্থ চিন্তাই তাহার প্রধান । স্বার্থচিন্তা শীতের মত ; উহা মনুষ্যকে একটুকু একটুকু করিয়া সংকুচিত করে, একটুকু একটুকু করিয়া কমাইয়া আনে, এবং কমাইতে কমাইতে, সংকুচিত করিতে করিতে, তাহাকে অবসানে একবারে প্রাণহীন, মনুষ্যত্বহীন জড়পিণ্ড করিয়া ফেলে । ভালবাসার স্বর্গীয় বহি তাহাকে কোন মতেই কমিতে দেয় না । উহা তাহার হৃদয়কে একটু একটু করিয়া বাড়াইতে থাকে, একটু একটু করিয়া প্রসারিত করে, এবং এইরূপ বাড়াইয়া ও এইরূপ প্রসারিত করিয়া, পরিণামে তাহার ঐ একই হৃদয়কে শত সহস্র হৃদয়ের আশ্রয়ক্ষেত্র এবং তৃপ্তিস্থল করিয়া তুলে । যে এক জনকেও যথার্থ ভালবাসিতে পারে, সে সমস্ত জগৎকেই ভালবাসে । সমুদ্রের জল যখন পূর্ণপরিবাহে উথলিয়া উঠে, তখন নদ, নদী, হ্রদ ও সরোবর সর্বত্রই তাহা প্রবাহিত হইয়া পড়ে । মনুষ্যের পক্ষে ইহা অপেক্ষা আর শ্রেষ্ঠতর সম্পদ কি ? ভাল না বাসিলে, তুমি তোমার আপনার ক্ষুদ্রতাতে আপনি কোনমতে লুক্কায়িত হইয়া, যেন নাই এই ভাবে, অবস্থান করিবে ;—কৃষ্ণশাবক যেমন শুণ্ড সংকোচন করিয়া আপনাতে আপনি প্রবিষ্ট হইয়া রহে, মনুষ্যজন্ম লাভ করিয়া, ভুমিও সেইরূপ রহিবে । আর,

যদি হৃদয়কে খুলিয়া দিয়া ভালবাসিতে পার, তবে সংসারে কত হৃদয়কেই না তুমি 'তোমার' করিয়া কিনিয়া রাখিবে, কত হৃদয়ের উপরই না তোমার হৃদয় ছড়াইয়া দিবে। ভালবাসার নাম 'মমতা'। তুমি যাহাকে ভালবাসিলে, সেই তোমার হইল ;—যাহাকে যে ক্ষণ হইতে যে পরিমাণে ভালবাসিলে, সেই সেই ক্ষণ হইতে সেই পরিমাণে তোমার হইয়া রহিল। সে জানুক আর না জানুক, সে ইচ্ছা করুক আর না করুক, তাহাতে তোমার অধিকার পঁহছিল। সে তোমার ভালবাসুক আর শাই বাসুক, তোমার মমতা, চন্দ্রমার লক্ষ্যযোজন দূরস্থ স্নেহ-কৌমুদীর আয়, দূরে থাকিয়াও তাহাতে গিয়া ছাইয়া পড়িল। যদি তাহাকে ইহজন্মেও দেখিতে না পাও, তথাপি তোমার হৃদয়, দেশ ও কালের আবরণ ভেদ করিয়া, তাহার হৃদয়ে গিয়া স্পৃষ্ট হইবে ; এবং সে যেখানে যে অবস্থায় অবস্থিত থাকুক, তোমাকে তাহাতে লইয়া যাইবে।

ভালবাসার আর এক গৌরব চাই, উহা মনুষ্যকে পূর্ণাঙ্গ ও পূর্ণবিকশিত করে। যে ভালবাসে না, তাহাতে পুরুষ আছে, প্রকৃতি নাই ; সে অর্দ্ধাঙ্গ, অর্দ্ধবিকশিত। যে ভালবাসে, তাহাতে পুরুষ ও প্রকৃতি উভয়ই বিরাজ করে ; সে পূর্ণাঙ্গ, পূর্ণবিকশিত। হে অভিমানগুপ্তিত পাষণচিত্ত পুরুষসিংহ ! হে বাহুবলদৃপ্ত দৃকপাতশূন্য বীরবর ! হে জ্ঞানমাত্রপরায়ণ গুস্তা-র্গবমগ্ন ধীর ! তুমি নানাবিধ পৌরুষ গুণে যেমন উচ্চশ্রেণীর মহাপুরুষই কেন হও না, আপনার অধ্যাত্মবলের উপর বত কেন নির্ভর কর না, যদি তুমি সর্বাঙ্গসম্পন্ন 'মনুষ্য' হইতে অভিলাষী হও, যদি তুমি 'সুন্দর' হইতে ইচ্ছা কর, তবে ভালবাস ;—আপনাকে পরের করিয়া, পরমুখপ্রেক্ষিণী অবলার মত ভালবাস। যে ভালবাসায় অবলা নহে, সে ধ্যান, ধারণা,

আরাধনার কিছুই জানে না। তাহার জীবন উপাসনামূলক ; সে নাস্তিক। পৌত্তলিকতা আর কি? ভালবাসাই পৌত্তলিকতা। যে ভালবাসে, ঘোর পৌত্তলিকও তাহা অপেক্ষা অধিকতর পৌত্তলিক নয়। কিন্তু যে হৃদয়ে এই পৌত্তলিকতা নাই, সেখানে সর্বদাই অমাবস্তার আতঙ্কজনক গভীর অন্ধকার।

---

## লোকারণ্য ।



মনের আকাঙ্ক্ষা বিষয়ে কাহারও সহিত কাহারও একতা নাই। কেহ সাগরের তরঙ্গবিলোল সুনীল বক্ষে ফেনাশিত অট্টহাস দর্শনে পুলকিত হয় ; কাহারও হৃদয়, ফুল, ফল, লতা, পাতা ইত্যাদি ক্ষুদ্র ক্ষুদ্র বস্তুর স্নকুমার সৌন্দর্য্যের জন্তই সতত লালায়িত থাকে। আমি এই উভয়বিধ শোভাই সমান আদরের সহিত নয়ন ভরিয়া পান করিয়া থাকি ; কিন্তু একত্র বহুসহস্রলোকের সমাবেশ দেখিলে, আমার যাদৃশ অনির্ব্বচনীয় আনন্দ বোধ হয়, জড়প্রকৃতির কোন পদার্থই আমায় সে আনন্দ প্রদান করিতে সমর্থ হয় না। আমি বিলাসীর প্রমোদকাননে পরিভ্রমণ করিয়াছি ; নদ, নদী, সরোবর, বন, উপবন ও পর্ব্বতের নৈসর্গিক কান্তি অনিমেষলোচনে অবলোকন করিয়াছি ; পূর্ণিমার প্রফুল্ল চন্দ্র, তরুর পত্রে পত্রে, মেঘের পটলে পটলে কিরূপ মনোহর ক্রীড়া করে, তাহাও দর্শন করিয়াছি ; ইহার কিছুই আমার নিকট লোকারণ্যের সেই বিন্ময়জনক ভয়ঙ্কর সৌন্দর্য্যের সমান বলিয়া প্রতীয়মান হয় নাই।

জড়প্রকৃতির সৌন্দর্য্যে প্রাণ নাই, উহা নিস্তেজ ও নির্জীব ; লোকারণ্যের সৌন্দর্য্য প্রাণবিশিষ্ট, উহা সতেজ ও সজীব। সংসারে লোকারণ্যের ভ্রায় অদ্ভুতদৃশ্য কি আছে, জামি না। বাহার চিত্ত লোকারণ্য দেখিলেও নাচিয়া না উঠে, সে মনুষ্য-সমাজের কেহই নহে, এবং মানবজাতির সুখ, দুঃখ,

হর্ষ ও বিষাদের সহিত তাহার কখনও সহানুভূতি থাকিতে পারে না।

ত্রিতন্ত্রী, এসার, বীণা, বেণু, মন্দিরা ও মৃদঙ্গ প্রভৃতি বহুবিধ যন্ত্রের ধ্বনি একীভূত হইয়া নিঃসৃত হইলে, শ্রোতৃবর্গ যেরূপ অনুপম সুখানুভব করেন ; ভাবকের মন, লোকারণ্যের সমবেত কণ্ঠধ্বনি শ্রবণ করিয়া, তাহা অপেক্ষাও গভীরতর সুখ অনুভব করে। কেহ হাসে, কেহ গায়, কেহ দূর হইতে বন্ধুজনকে তারস্বরে আহ্বান করে, কাহারও কণ্ঠ হইতে ক্রোধের ঐতি-কর্কশ কম্পিত স্বর বহির্গত হয়, কেহ বা পার্শ্বস্থিত প্রণয়িজনের চিরপিপাসু কর্ণে মৃদু মৃদু মধুধারা বর্ষণ করিতে থাকে ;—ঐ সমুদয় ধ্বনি একস্রোতের স্রায় মিশ্রিত হইয়া, মানবজীবনের জয়ধ্বনিক্রমে গগনভিমুখে উথিত হয় এবং ভাবুক ব্যক্তি, শ্রবণ করিতে করিতে, উত্তর, দক্ষিণ, পূর্ব, পশ্চিম সমস্ত ভুলিয়া গিয়া, ঐ স্রোতেই আপনার হৃদয় ঢালিয়া দেয়। সে আছে কি নাই, তাহাও তখন তাহার মনে থাকে না।

তরু লতার অরণ্য নয়নেরই বিনোদন করে, প্রকৃতপ্রস্তাবে হৃদয়ের উদ্দীপন করিতে সমর্থ হয় না। লোকারণ্য নয়নের প্রীতিকর, এবং হৃদয়েরও উদ্দীপক। যে অসংখ্য লোক একত্র মিলিত হইয়া, ঐরূপ অপূৰ্ণমূর্ত্তি ধারণ করে, তাহাদিগের প্রত্যেকেই এক এক খানি কাব্য, অথবা এক এক খানি ইতিহাস। প্রতিজনের মানসপটে কতই বা সুখের কথা এবং কতই বা দুঃখের কথা লিখিত রহিয়াছে, প্রতিজনের মস্তকের উপর দিয়া বিষমবিপদের ঝঙ্কার বায়ু কতভাবে ও কতবার প্রবাহিত হইয়াছে, সংসারের প্রতিকূলস্রোতে প্রতিজনই কত বিড়ম্বনা ভোগ করিয়াছে, তাহা চিন্তা করিলে, মন লৌকিক জগতের কত উর্দ্ধে উত্থান করে, তাহা কখনই বাক্যে নির্বচন করা যায়

না। এই নিমিত্তই লোকারণ্যরূপ বিচিত্র দৃশ্য দর্শন করিয়া, কবি ও দার্শনিক উভয়েই সমান মুগ্ধ হন এবং কল্পনা ও চিন্তা উভয়েই তখন যুগপৎ জাগরিত হইয়া সমানভাবে ক্রীড়া করে।

মনুষ্যের আলস্য, ঔদাস্য এবং অকর্ম্মণ্য জীবন অবলোকন করিলে, মানবজাতি যে জীবিত আছে, এ বিষয়েই সংশয় হয়, এবং সংশয়ের সঙ্গে এক ভয়ানক নৈরাশ্রের ভাব আসিয়া, মনকে অবসন্ন করিয়া ফেলে। কিন্তু যখন দৈবাৎ কোন স্থলে হলহলাময় লোকধ্বনি শ্রবণ করি, এবং লোকারণ্যের ভৈরব-চ্ছবি প্রত্যক্ষ সন্দর্শন করি, তখন সেই সংশয় এবং সেই নৈরাশ্র আপনা হইতেই অপনীত হইয়া যায়। বহু সহস্র লোক কেন প্রমত্তভাবে একত্র হয়, কেন বহুলোকের হৃদয়যন্ত্র একভাবে একসঙ্গে বাজিয়া উঠে, ইত্যাদি চিন্তাসূত্র আবলম্বন করিয়া, লোকসংগ্রহের মূলানুসন্ধানে প্রবৃত্ত হও, একবারে মানবপ্রকৃতির মূল প্রস্রবণের সন্নিধানে উপস্থিত হইবে, এবং যাহা কখনও জানিতে পাও নাই, তাহা সাক্ষাৎ উপলব্ধি করিয়া, আশায় ও আনন্দে অশ্রুধারা বর্ষণ করিবে।

বুদ্ধি মনুষ্যের প্রকৃত জীবন নহে, জীবনের পথপ্রদর্শিকা অথবা আলোকবর্তিকা। মনুষ্যের প্রকৃত জীবন হৃদয়। হৃদয়ের প্রবাহ রুদ্ধ হইলে, অনুরাগ, বিরাগ, স্নেহ, দুঃখ, নিদ্রা, জাগরণ সকলই স্বপ্নবৎ অলীক হইয়া উঠে। মনুষ্যজাতির সেই হৃদয় আছে, না শুকাইয়া গিয়াছে, তাহার প্রধান পরীক্ষাস্থান লোকারণ্য। লোকারণ্যে কোথাও ভক্তির স্রোত প্রবলবেগে প্রবাহিত হইতেছে, কোথাও দেশানুরাগ, যুগান্তের মোহ হইতে সহসা উদ্ভিত হইয়া, ঝটকাবায়ুর ভীমস্বরে গর্জ্জন করিতেছে, কোথাও বহুদিনের অপমান, ক্রোশ ও দুঃখযন্ত্রণা, অকস্মাৎ বেলাভূমি



অতিক্রম করিয়া, প্রলয়পর্যোধির উচ্ছ্বাসের জ্বালায় সংসার ডুবা-  
ইয়া দিতেছে, এবং পুরাতন ও নূতন, ভাল ও মন্দ, যাহা কিছু  
সম্মুখে পড়িতেছে, সমুদ্রের ভাসাইয়া লইতেছে ।

পৃথিবীর কতকগুলি জাতি মৃত, আর কতকগুলি জীবিত ।  
মৃতজাতীয় মনুষ্য সকল বিষয়েই নির্লিপ্ত, তাহারা ভোগরত হই-  
য়াও যোগী, কারণ কিছুতেই আসক্ত নহে; গৃহী হইয়াও বানপ্রস্থ  
এবং বিলাসী হইয়াও উদাসীন । তাহাদিগের প্রধান লক্ষণ  
এই, তাহারা আপন বই বুঝে না, স্ত্রীপুত্র বই আর চেনে না,  
এবং বর্তমান ক্ষণে বর্তমান সুখ বিনা আর কিছুই চিন্তে ধারণা  
করিতে সমর্থ হয় না । তাহাদিগের হৃদয় তড়াগের বন্ধজলের  
জ্বালায়; উহাতে চাঞ্চল্য, প্রবাহ ও তরঙ্গ কিছুই নাই; এবং  
আপনার ও বর্তমান ক্ষণের সহিত যে বস্তুর সাক্ষাৎ সম্বন্ধ নাই,  
তাহা তাহাদিগের নিকট সর্বদা অবস্থকণে প্রতিভাত হয় ।  
তাদৃশ লোকেরা লোকারণ্যের মহিমা কোন প্রকারেই বুঝিতে  
পায় না, এবং লোকসমুদ্রে ঝাঁপ দিয়া সাধারণের অদৃষ্টের সহিত  
আপনাদিগের অদৃষ্ট মিশ্রিত করিতে, সাধারণের একান্ত হইয়া  
সংসারের গতি পরিবর্তনের কারণ হইতে, কখনই ইচ্ছুক হয় না ।  
যাহা আছে, তাহা ক্রোড়ে লইয়া, খট্টার তলে কোন এক  
কোণে মাথা লুকাইয়া, প্রাণে প্রাণে কুশলে থাকিতে পারিলেই,  
তাহাদিগের সকল তৃষ্ণা চরিতার্থ হয় । যে সকল জাতি জীবিত  
রহিয়াছে, যাহাদিগের হৃদয়ের শ্রোত অদ্যাপি তর তর ধারে  
প্রবাহিত হইতেছে, তাহাদিগের লক্ষণ ইহার সম্পূর্ণ বিপরীত ।  
তাহারা প্রমত্ত, স্তবরাগ; অতিসহজেই উত্তেজিত হয় । তাহারা  
জীবন্ত বারুদ-গৃহ, অগ্নির স্ফুলিঙ্গমাত্র পতিত হইলেই, ধগ্ ধগ্  
করিয়া জলিয়া উঠে । তাহারা হাসিতে জানে, কাঁদিতে জানে,  
লোককে প্রশংসা করিতে জানে, লোককে নিন্দা করিতে জানে,

এবং কোন্‌ স্থত্রে গ্রহণ করিলে সকলের হৃদয় একটি স্তবকের  
আর গ্রথিত হইতে পারে, তাহাও বিলক্ষণরূপে জানে। মৃত-  
জাতীয়দিগের মধ্যে কখনও লোকারণ্য দেখিতে পাওয়া যায় না;  
জীবিতজাতীয় মনুষ্যদিগের বাসস্থলই লোকারণ্যের যথার্থ  
স্থান।

ফরাশিদেশ লোকারণ্যের এক প্রধান প্রদর্শনক্ষেত্র। সপ্তদশ  
শতাব্দীর ফ্রাঙ্ক নামক সুপ্রসিদ্ধ বিপ্লবের কাল হইতে অন্য  
পর্যন্ত, ফ্রান্সে নিত্যই নূতন লোকারণ্য লোকের নয়নগোচর  
হইতেছে। ইহার অর্থ এই, ফরাশির বিপদের পর বিপদে  
আক্রান্ত হইয়াছে, কখনও ভূতলে পড়িয়াছে, কখনও উপরে  
উঠিয়াছে, কখনও বা যাই যাই হইয়াছে, কিন্তু একবারে মরিয়া  
নয় নাই। তাহাদিগের লোকারণ্য অভিমানিনী এনের নিদ্রা-  
ভঙ্গ করিয়াছে, ষোড়শ লুইকে শান্তির শয্যা হইতে চমকিত  
করিয়া উঠাইয়াছে, এবং বৃটিশ পার্লামেন্টে বার্ক প্রভৃতি  
প্রশান্তচিত্ত, সুস্থির, সুগভীর, বুদ্ধিমান ব্যক্তিকেও পাগল  
বানাইয়া তুলিয়াছে। ইহা কেন? না ফ্রান্স জীবিত রাজ্য।

ইংলণ্ডে, প্রজাপ্রতিনিধিনির্বাচন অথবা কোন রাজকীয়  
বিধির পরিবর্তনের সময়ে কিরূপ লোকভরস্কর তুমুল কাণ্ড  
উপস্থিত হয়, তাহা সকলেরই অবগতির বিষয়। তখন পণ্ডিত  
মূর্খ, ধনী নির্ধন, সকলেই দেশের এক প্রান্ত অবধি আর এক  
প্রান্ত পর্যন্ত ফেপিয়া উঠে। বোধ হয়, যেন সমস্ত দেশ উৎসন্ন  
হাইতেছে। এক এক স্থলে পঞ্চাশং সহস্রেরও অধিক লোক  
মিলিত হইয়া চীৎকার করে, আর সেই চীৎকারে সমুদয় ইয়ুরোপ  
কাঁপিতে থাকে। ইংলণ্ড কি সভ্য নয়? ইংলণ্ডে কি বিদ্যান ও  
বুদ্ধিমান লোক বর্তমান নাই? কিন্তু ইংলণ্ডের বিদ্যা, বুদ্ধি,  
সভ্যতা, সামাজিকতা, কিছুই উহার হৃদয়াবেগ এবং লোকারণ্য

অবরোধ করিতে পারে না। কারণ, ইংলণ্ড জীবিত রহিয়াছে।

ভারতবর্ষ যখন জীবিত ছিল, তখন ভারতবাসীরা লোকারণ্য দর্শন করিয়া আফ্লাদে ঢল ঢল হইত। ইদানীং তাহা হয় না, কারণ, ইদানীং ভারতবর্ষ জীবিত নাই। পৃথ্বীরাজের পর হইতেই ভারতবর্ষ প্রাণহীন হইয়া, এক ভয়ানক শ্মশানের বেশ ধারণ করিয়াছে; চাহিয়াও দেখিতে ইচ্ছা হয় না। ভারতবর্ষে ভক্তির স্রোত অদ্যাপি প্রবহমান রহিয়াছে; এই হেতু, অদ্যাপি তীর্থস্থলে লোকারণ্যের মাহাত্ম্য কিয়দংশে অনুভূত হয়। কিন্তু অত্ৰ কোন এক ভাবে, কি কোন এক কথাতেই এ দেশীয়েরা এতকণ আর একহৃদয়বৎ নাচিয়া উঠে না, অথবা একত্র দণ্ডায়মান হয় না।

---

## রাজা ও প্রজা ।

৭৬৭

রাজা ও রাজপদ কোন্ সময়ে প্রথম প্রতিষ্ঠিত হয়, তাহা অবধারণ করা অত্যন্ত কঠিন। রাজত্বের উৎপত্তি বিষয়ে পণ্ডিত-দিগের ঐকমত্য নাই। পণ্ডিতেরা সমাজসংস্থাপনবিষয়েও যেরূপ নানাবিধ বিচিত্র কল্পনার আশ্রয় লইয়াছেন, রাজশাসনের প্রথম প্রতিষ্ঠাবিষয়েও সেইরূপ বহুপ্রকার কপোলকল্পিত মতকে অভ্রান্ত সত্য বলিয়া প্রচার করিয়াছেন। কেহ বলেন, অতি পূর্বকালে মনুষ্যসমাজে কোন ব্যক্তিই রাজপূজা প্রাপ্ত হইত না। যেমন এখন এক এক পরিবারে এক এক জন কর্তা থাকে, পূর্বকালেও এক এক পরিবারে ঐরূপ এক এক জন কর্তা থাকিত। ঐ পারিবারিক প্রভুতাই নানাকারণবশতঃ কালে বহুপরিবারের উপর প্রসারিত হইয়া, রাজশক্তির মূর্তি ধারণ করে। কাহারও মত এই যে, সামাজিকেরা, পরাক্রান্ত প্রতিবেশীর অত্যাচার হইতে আত্মরক্ষার নিমিত্ত, শারীরিক বল, অস্ত্রনৈপুণ্য এবং সাহসাদি গুণের পরীক্ষা লইয়া, আপনাদিগের মধ্যে এক জনকে রাজপদে অভিষেক করিত, এবং অভিষেকের পরক্ষণ হইতে তিনিই সকল বিষয়ে সকলের অগ্রণী হইতেন। কোন মহাত্মা সিদ্ধান্ত করেন, ইদানীং সংসারে অধর্মের যেরূপ ভয়ানক প্রভাব হইয়াছে, পূর্বে সেরূপ ছিল না। পূর্বকালের লোকেরা অসহ্যবহার জানিত না, অসাধুপথে পাদচারণা করিত না, এবং পরকালের আশায় জ্বালাজ্বলি দিয়া, ইহকালের সেবা

করিত না । তাহারা যাহাকে সর্বাপেক্ষা ধার্মিক এবং পরমার্থ-পরায়ণ বিবেচনা করিত, তাহাকে গুরু বলিয়া পূজা করিত । ক্রমে পারত্রিক মঙ্গলের সঙ্গে সঙ্গে ঐহিক মঙ্গলের রক্ষণাবেক্ষণ-ভারও ঐ গুরুদিগের হস্তে ত্রস্ত হইল ; এবং এই হেতু গুরুরাই পরিশেষে রাজা হইলেন । অরণ্যচারী আরব, তাতার, এবং দ্বীপ ও পর্বতবাসী অসভ্যজাতিসমূহের বর্তমান রীতিপদ্ধতির পর্যালোচনা করিলে, এই সকল বিভিন্ন মতের অনুকূল নানারূপ নিদর্শন সঙ্কলিত হইতে পারে । কিন্তু তাহা এইক্ষণ আমাদের অতিপ্রেরিত নহে । কিরূপে রাজপদের সৃষ্টি হয়, তাহার অনু-সন্ধান পরিত্যাগ করিয়া, রাজা ও প্রজা পরস্পর কি সম্বন্ধে বদ্ধ, এই দুইয়ের মধ্যে কে প্রভু, কে সেবক, তাহাই আমরা এই প্রবন্ধে আলোচনা করিতে ইচ্ছা করি ।

যে সকল রাজ্য, উদিত ও বিকশিত হইয়া, কালশাসনে পুনরায় লয়প্রাপ্ত হইয়াছে, তৎসমুদয়ের ইতিবৃত্ত আলোচনা করিলে দৃষ্ট হয় যে, মনুষ্যজীবনের যেমন বাল্য, যৌবন, এবং বার্দ্ধক্য এই তিনটি পৃথক্ পরিচ্ছেদ আছে, রাজনীতিরও বয়ঃ-কালভেদে সেইরূপ তিনটি পৃথক্ যুগ নিরূপিত রহিয়াছে । সংজ্ঞা দিতে হইলে, প্রথম কালকে রাজযুগ, মধ্যম কালকে মিশ্রযুগ, এবং রাজনীতির পরিপক্ব প্রৌঢ় কালকে প্রাকৃতযুগ বলিয়া নির্দেশ করা যাইতে পারে ।

মনুষ্য অতিপ্রথমে নিরাকার নীতির মাহাত্ম্য অনুভব করিতে পারে না । তখন সে সকল বিষয়েই সাধ করিয়া দণ্ড-ধারী পুরুষের অধীন হইতে ইচ্ছুক হয় । আমরা রাজ্যসংস্থানের ঐ কালকে রাজযুগ বলিয়া ব্যাখ্যা করি । রাজযুগে রাজারাই সর্ব্ব সৰ্ব্বা,—প্রজা কিছুই নহে । ব্যবস্থাপকেরা সে সময়ে রাজার সূত্র, রাজার সম্মান, এবং রাজকীয়শক্তির সীমাবদ্ধির

জন্তু কায়মনোবাক্যে যত্নপর হয়েন, প্রজাকে কোন বিষয়েই গণনাস্থলে উপস্থিত করেন না। অধিক কি, প্রজা যে মনুষ্য এবং তাহার যে মনুষ্যোচিত কতকগুলি স্বত্ব ও কতকগুলি স্বাভাবিক স্পৃহা আছে, তাহাও তাঁহারা ভুলিয়া মনে করেন না। রাজনীতি বিষয়ে মনুষ্যসংহিতার ব্যবস্থাকেই অতিপ্রাচীন অনুশাসন বলিয়া স্বীকার করা যাইতে পারে। মহর্ষি মনু বলিয়াছেন,—

\* “জগৎ অরাজক হইলে, সকলেই বলবানের ভয়ে বিচলিত হইবে, এই হেতু বিধাতা সমুদয় চরাচরের রক্ষার জন্ত ইন্দ্র, বায়ু, যম, সূর্য্য, অগ্নি, বরুণ, চন্দ্র, কুবের এই অষ্টদিক্‌পালের সারভূত অংশ গ্রহণ করিয়া, রাজার সৃষ্টি করেন। যেহেতু

---

\* “অরাজকে হি লোকেহস্মিন্ সর্ব্বতো বিদ্রতে ভয়াৎ ।  
 রক্ষার্থমশ্রু সর্ব্বশ্রু রাজানমসৃজৎ প্রভুঃ ॥  
 ইন্দ্রানিলয়মার্ক্যণামগ্বেশ্চ বরুণশ্চ চ ।  
 চন্দ্রবিত্তেশয়োশ্চৈব মাত্রা নিহত্য শাস্বতীঃ ॥  
 যম্মাদেবাং সুরেন্দ্রাণাং মাত্রাভ্যো নিশ্শ্রিতো নৃপঃ ।  
 তস্মাদভিভবতোষ সর্ব্বভূতানি তেজসা ॥  
 তপত্যাদিত্যবচৈষ চক্ষুংষি চ মনাংসি চ ।  
 নৈচনং ভুবি শক্ৰোতি কশ্চিদপ্যভিবীক্ষিতং ॥  
 সোহগ্নির্ভবতি বায়ুশ্চ সোহর্কঃ সোমঃ স ধর্ম্মরাট্ ।  
 স কুবেরঃ স বরুণঃ স মহেন্দ্রঃ প্রভাবতঃ ॥  
 বালোহপি নাবমন্তব্যো মনুষ্য ইতি ভূমিপঃ ।  
 মহতী দেবতাহেষা নররূপেণ তিষ্ঠতি ॥  
 একমেব দহতাগ্নিনরং দুরূপসর্পিণং ।  
 কুলং দহতি রাজাগিঃ সপশুদ্রব্যসঞ্চয়ং ॥  
 বশ্য প্রসাদে পদ্মাশ্রীবিজয়শ্চ পরাক্রমে ।  
 মৃত্যুশ্চ বসতি ক্রোধে সর্ব্বতেজোময়ো হি সঃ ॥  
 তং যন্তু দ্বৈষ্টি সংমোহাৎ স বিনশ্যতাসংশয়ং ।  
 তন্তুহাশুবিনাশায় রাজা প্রকুরুতে মনঃ ॥”

রাজা ইন্দ্ৰাদি প্রধান দেবতাদিগের অংশে নিৰ্মিত হইয়াছেন, অতএব তিনি স্বকীয় তেজে সকল প্রাণীকেই অভিভব করিতে পারেন। রাজা, সূর্য্যের জ্বায় দৰ্শকবৃন্দের চক্ষু ও মনকে সন্তোষিত করেন ; পৃথিবীতে কোন ব্যক্তিই রাজাকে আশ্রিত্ত্বার্থে অবলোকন করিতে সমর্থ হয় না। শক্তির আতিশয্য হেতু, তিনি অগ্নি, তিনি বায়ু, তিনি সূর্য্য, তিনি চন্দ্র, তিনি যম, তিনি কুবের, তিনি বরুণ এবং তিনিই মহেন্দ্র। রাজা বালক হইলেও, তাঁহাকে মনুষ্যজ্ঞানে অবজ্ঞা করিবেন না, যেহেতু তিনি প্রধান দেবতা নররূপে অবস্থান করিতেছেন। যে ব্যক্তি অসাধন হইয়া, অগ্নির অতিনিকটে গমন করে, অগ্নি কেবল তাহাকেই দগ্ধ করেন ; কিন্তু রাজরূপী অগ্নি পুত্রদারদ্রাদিরূপ কুল, গো, অশ্ব, মেঘাদি পশু, এবং স্ত্রবর্ণাদি ধনসঞ্চয় সমুদয়ই দহন করেন। রাজা সর্ব্বতেজোময়। তিনি প্রসন্ন হইলে মহতী শ্রীলাভ হয়, তাঁহার পরাক্রমে দুৰ্দ্দম শত্রুকেও দমন করা যায়, এবং তিনি কাহারও প্রতি ক্রুদ্ধ হইলে, তাহার নিশ্চয়ই মৃত্যু ঘটে। যে ব্যক্তি মোহবশতঃ রাজার অপ্রীতিকর কার্য্য করে, সে নিঃসংশয় বিনাশ প্রাপ্ত হয়, যেহেতু রাজা স্বয়ং তাহার বিনাশের জন্ত মনোযোগ করেন।”

এই বচনগুলি পাঠ করিবার সময়, কেহই রাজা ও প্রজাকে একজাতীয় মনুষ্য বলিয়া, সিদ্ধান্ত করিতে পারে না। মনে আপনা হইতেই এইরূপ ধারণা হয় যে, সমস্ত মনুষ্য জাতি ইতর প্রাণী, আর রাজমুকুটমণ্ডিত মহাপুরুষেরা কোন এক বিশেষ প্রকারে অলৌকিক জীব। তাঁহাদিগের শক্তির ইয়ত্তা নাই, ইচ্ছার নিয়ামক নাই, এবং অনুষ্ঠিত কার্য্যকলাপেরও বিচার-স্থান নাই। তাঁহাদিগের নিরঙ্কুশ প্রবৃত্তি, যে দিগে বল, সেই দিকেই প্রধাবিত হইতে পারে। উহার গতিপথে কেহই কোন-

রূপ বাধা দিতে অধিকারী কিংবা সমর্থ নহে। মনুসংহিতায় যদিও ইন্দ্রিয়সুখাসক্ত, দুর্ন্যস্ত্রিপরিবৃত, দুর্কিনীত রাজার অত্যাতি ও বিনাশসম্ভাবনার কথা লিখিত আছে ; সে লেখা, স্মার্তভট্টাচার্য্যের ব্যবস্থার মত, লেখা মাত্র। কারণ রাজা রাজধর্ম লঙ্ঘন করিয়া, প্রজার স্বত্ব ও অধিকারের উপর আক্রমণ করিলে, সমবেত প্রজাবর্গ তাঁহাকে অপরাধীর হ্রায় বিচারস্থলে আনয়ন করিয়া, যথারীতি দণ্ডবিধান করিতে পারিবে, এমন কোন স্পষ্ট বিধি মনু কিংবা মনুর উত্তরকালবর্তী ধর্মশাস্ত্রপ্রবর্তক ঋষিদিগের গ্রন্থমধ্যে পরিলক্ষিত হয় না।

ইয়ুরোপেও পুরাকালে রাজারা দেবাংশসম্ভূত বলিয়া পরিগণিত হইতেন, এবং রাজশক্তি সর্বথা অপ্রতিহত ও উচ্ছৃঙ্খল ছিল। মনু যেমন বলিয়াছেন, “মহতী দেবতাহেমা নররূপেণ তিষ্ঠতি,” ইয়ুরোপের কবিও সেইরূপ দেশীয়দিগের জন্মের অনুবাদ করিয়া বলিয়াছেন, “দৈবী শক্তি আপনিই আবরণ হইয়া, রাজার রক্ষা করেন।” ইংলণ্ডীয় রাজনীতিশাস্ত্রের শিরঃস্থানে অদ্যাপি জ্বলদন্ধরে লিখিত রহিয়াছে, “রাজা কোনরূপ অন্ত্রায় কার্য্য করিতে পারেন না।” এ কথার মর্ম্মার্থ এই, রাজা, প্রভাব ও প্রকৃতি উভয় বিষয়েই, লৌকিক জগতের এত উর্দ্ধে অবস্থান করেন যে, তদীয় চরিত্রে কখনও কোনরূপ দোষস্পর্শ সম্ভবে না।

পূর্বে রোম, পরে ইংলণ্ড, ফ্রান্স, রুসিয়া প্রভৃতি রাজ্যের অধিপতিরা কোন দিনও আপনাদিগকে কৃতকর্ম্মের জন্ত মনুষ্যের নিকট দায়ী বিবেচনা করিতেন না। তাঁহারা যাহা ইচ্ছা তাহাই করিয়াছেন, দেশের কোন শক্তি তাঁহাদিগের সর্বগ্রাসিনী প্রভুশক্তির সম্মুখীন হইতে পারে নাই। লোকের মান, মর্যাদা, বিষয়, বৈভব, সমস্তই সম্পূর্ণরূপে তাঁহাদিগের তরঙ্গামিত চঞ্চল-



মতির উপর নির্ভর করিত । তাঁহাদিগের রূপাকটাক্ষ নিপতিত হইলে, অতিক্রিয়ান্বিত অধম ব্যক্তিও একরাত্রির মধ্যে দেশে সর্বপ্রধান বলিয়া গণ্য হইয়া উঠিত, এবং তাঁহাদিগের অরূপা হইলে বহুদিনের সম্ভ্রান্ত, বহুলোকপূজিত ব্যক্তিও দেখিতে দেখিতেই ধনে প্রাণে অপার দুঃখার্ণবে ডুবিয়া যাইত ।

রাজশক্তির আধিপত্য-সময়ে সকল রাজাই প্রজার স্বত্বকে পদতলে দলন করিয়াছেন, এইরূপ বলা আমাদের অভিপ্রেত নহে, এবং ইহা বস্তুতঃ ইতিহাসবিরুদ্ধ । মনুষ্য সিংহাসনেই শোভা পাউক, অথবা জীর্ণবস্ত্রে আবৃত হইয়া, পর্ণকুটীরেই অবস্থান করুক, তাহাকে অবশ্যই মনুষ্য বলিব । এবং মনুষ্য হইলেই, সে মানবজাতির স্বতিনিন্দারূপ সূদৃঢ় শাসনের অধীন হইল । যদি পৃথিবীস্থ সমস্ত স্বেচ্ছাচার রাজা, নিরো ও কেলি-গুলি প্রভৃতি অমানুষ নরপতিদিগের মত, লোকপীড়নকেই নিজ নিজ জীবনের একমাত্র ব্রত জ্ঞান করিত, যদি তাহারা সকলেই ত্রায়কে অত্যায, এবং অত্যাযকে ত্রায়রূপে প্রতিপাদন করিতে যত্নপর হইত,—যদি প্রজার সুখ দুঃখকে রাজার প্রবৃত্তিসাগরে ডুবাইয়া দেওয়াই রাজনীতির প্রধান সূত্র হইয়া উঠিত, তাহা হইলে মানবসমাজের একীভূত হৃদয়ের অন্তস্তল হইতে এক ভরজ্বর আর্তিনাদ উথিত হইয়া, সমুদয় জগৎকে চমকিত করিত, সন্দেহ নাই । যে সকল রাজা কোন রূপ নিয়মের অধীন নহেন, তাঁহাদিগের মধ্যেও যে, অনেকে বিনীত, প্রজারঞ্জনরত ও সদাচারপরায়ণ হইয়া, জগতের হিতানুষ্ঠানে জীবন উৎসর্গ করিয়াছেন, প্রাপ্তকাল লৌকিকশাসনই তাহার কারণ । ইংলণ্ডীয় এলফ্রেড পার্লামেন্টের অধীন ছিলেন না, অথচ পার্লামেন্টের নিয়মাবলী কোন রাজাই ন্যায়পরতা কিংবা প্রজাবৎসলতা বিষয়ে এলফ্রেডের সমকক্ষ বলিয়া, গণ্য হইবার যোগ্য-

ব্যক্তি নহেন। সকল দেশের রাজবংশাবলীতেই এইরূপ দুই একটি সর্বস্বলক্ষণাক্রান্ত সাধুপুরুষের নাম প্রাপ্ত হওয়া যায়। কিন্তু রাজা সদাচারনিষ্ঠ হইলেই যে, রাজশক্তি খর্বীকৃত হইল এবং প্রজার ক্ষমতা বাড়িল, এমন নহে।

আমরা যে কালকে রাজনীতির মিশ্রযুগ বলিয়া উল্লেখ করিয়াছি, তাহার অভ্যদয় হইলেই, প্রজাবর্গের মনুষ্যসংখ্যায় গণনারম্ভ হয়। এস্থলে মনুষ্য বলিবার তাৎপর্য্য এই যে, পূর্বের রাজ্যের শাসনপ্রণালী, আয় ব্যয়ের সংস্থাপন, রাজপুরুষনিয়োগ এবং পররাজ্যের সহিত শত্রুতা কি মিত্রতা ইত্যাদি কোন বিষয়েই প্রজার মতামত থাকে না;—সিংহাসনাক্রুত এক ব্যক্তি যেক্ষপ ইচ্ছা করে, এক কোটি লোকের অনিচ্ছা হইলেও তাহাই কার্য্যে পরিণত হয়, এবং সেই ইচ্ছা পূর্ণ করিবার জন্ত যদি সকলকে সর্বস্বে বঞ্চিত হইয়া, হৃদয়ের শোণিত অজস্রধারায় ঢালিতে হয়, তাহাতেও কিছু আসে যায় না। এই সময়ে সেই ভাব অল্পে অল্পে পরিবর্তিত হইয়া, আসে। রাজার শক্তি অল্প অল্প করিয়া কমিতে থাকে এবং প্রজার ক্ষমতা অল্প অল্প করিয়া বৃদ্ধি পায়। রাজা এবং রাজকীয় শক্তি যখন একবারে প্রজার শক্তিতে বিলীন হইয়া যায়, তখনই যথার্থ প্রাকৃতযুগ প্রতিষ্ঠিত হয়।

ভারতবর্ষীয় রাজারা যদিও শাস্ত্রানুসারে স্বেচ্ছাচারী ছিলেন, কিন্তু বস্তুগত্যা তাঁহারা কখনও অনিয়ন্ত্রিত ক্ষমতা ব্যবহার করিতে অবসর পান নাই। ভারতবর্ষ চিরকালই ধর্ম্মনীতিপ্রিয় ও পুণ্যভূমি বলিয়া প্রসিদ্ধ, এবং হিন্দুরাজগণের আর কোন গুণ না থাকুক, দয়াপরতা এবং দেবলোকোচিত মাহাত্ম্য প্রদর্শন বিষয়ে কোন দেশের রাজার সহিত তাঁহাদিগের তুলনা হয় না। তাঁহারা সকলেই শ্রদ্ধা সহকারে ধর্ম্মশাস্ত্রের অনুশাসন

পালন করিতেন, এবং পাছে প্রজাপালক নামে কোন প্রকারে  
কলঙ্করেখা নিপতিত হয়, এই ভয়ে সকলেই সতত ভীত থাকি-  
তেন । ভারতবর্ষীয় সম্রাটের নিকট প্রজার সন্তোষ অসন্তোষের  
আদর ছিল কি না, রাজা রামচন্দ্রের অলোকসাধারণ অদ্ভুত  
কীর্তিই তাহার প্রমাণ । আর একটি কথা এই, এ দেশের  
ক্ষত্রকুলতিলকেরা প্রতাপে যতই বড় হইয়া থাকুন, তাঁহারা  
রাজনীতিষটিত মন্ত্রণা এবং রাজশক্তির প্রয়োগকালে তপোরত  
ও দয়ামূল ঋষিসমাজের বাক্য লঙ্ঘন করিতে কখনই সাহসী  
হইতেন না, এবং ঋষিবাক্যই সকল সময়ে তাঁহাদিগের প্রবৃতি-  
স্রোতে ভয়ানক প্রতিবন্ধকের কার্য্য করিত । অতি দুর্দ্বৈষ  
সম্রাটগণও প্রজাবৎসল সামান্য ঋষিদিগকে দেবতার মত পূজা  
করিতেন, এবং তাঁহাদিগের আদেশ ও উপদেশ শিরোধার্য্য  
করিয়া লইতেন । এই সমস্ত কারণবশতঃ ভারতবর্ষের প্রজা  
কোন সময়েই একবারে পশুবৎ নিষ্পেষিত হয় নাই । কিন্তু  
তাঁহাদিগকে যে, কোন সময়েও রাজশক্তির আদি প্রস্রবণ  
বলিয়া স্বীকার করা হইয়াছে, এমন আমরা দেখিতে পাই না ।

রাজা ও প্রজা, সেব্যসেবকসম্বন্ধ পরিত্যাগ করিয়া, স্বদেশের  
সেবায় মিলিতভাবে কার্য্য করিলে, কিরূপ আশ্চর্য্য ফল ফলিয়া  
থাকে, ইংলণ্ডই তাহার প্রধান উদাহরণস্থান । কিন্তু ইংলণ্ড  
অন্যাপি মিশ্রযুগের ছায়ায় অবস্থান করিতেছে । ইংলণ্ডের  
প্রজা স্বাধীন, কিন্তু প্রভু নামবিবর্জিত ; ইংলণ্ডের প্রজা এখনও  
রাজা হয় নাই । যে সকল দেশে প্রজার রাজশক্তি অর্থাৎ  
প্রাকৃতযুগ সর্ব্বতোভাবে প্রতিষ্ঠিত হইয়াছে, তন্মধ্যে আমেরি-  
কাই ইদানীং সর্ব্বাংশে অগ্রগণ্য । আমেরিকায় ছোট বড়  
সকল ব্যক্তিই রাজা, যাহারা রাজপুরুষ বলিয়া পরিগণিত,  
তাঁহারা সেবকমাত্র ।

রাজযুগ, মিশ্রযুগ এবং প্রাকৃতযুগ এই তিনের কোনটি বিধিনির্দিষ্ট, এবং পৃথিবীর মঙ্গলকর, তাহার বিচার করা এইক্ষণ আমাদের বিষয় নহে। কিন্তু আমরা ইহা অসঙ্কচিত চিন্তে নির্দেশ করিতে পারি যে, মানবজাতির চিন্তাস্রোতের গতি আজ কাল প্রাকৃতযুগের অনুকূল। মনুষ্যের সামাজিকশক্তি, যাহাতে একের হস্তে ন্যাস্ত না থাকিয়া, যথাযথরূপে সকলের মধ্যে বিভক্ত হয়, এই অক্ষুট আকাঙ্ক্ষাই বর্তমান সময়ের বিশেষ লক্ষণ। পূর্বে রাজারা প্রভু এবং সকল শক্তির আকর ছিলেন, এইক্ষণ প্রজাই সকল দেশে প্রকৃতপ্রস্তাবে প্রভু এবং সকল শক্তির মূলাধার বলিয়া পরিগণিত হইতেছে।

---

## বিনয়ে বাধা ।

এ জগতে বিনীত বলিয়া লোকের নিকট প্রশংসিত হইতে কাহার না সাধ হয় ? কত কঠোর কশ্মের অনুষ্ঠান করিয়াও, যে কীর্ত্তি উপার্জন করা যায় না, যদি দুটি কথা বিক্রয় করিলেই, সেই কীর্ত্তি সঞ্চয় করা যায়, তবে কাহার প্রবৃত্তি না তাহাতে উন্মুখ হয় ? তবে সকলেই বিনয়ে অবনত হয় না কেন ? ইহাই এই প্রবন্ধের আলোচ্য, এবং ইহা হৃদয়রহস্য অথবা প্রকৃত দর্শন-শাস্ত্রের কথা ।

আমরা যতদূর দেখিয়াছি, তাহাতে এই বোধ জন্মিয়াছে যে, বিনয়ের পক্ষে অনেকেরই কতকগুলি বাস্তব কি অবাস্তব, কল্পিত কি অকল্পিত বাধা আছে। মনুষ্য সেই বাধাগুলিকে যতক্ষণ না অতিক্রম করিতে পারে, ততক্ষণ পর্য্যন্ত তাহার প্রকৃত বিনয়ী হওয়া অসম্ভব ।

কাহারও মন স্বভাবতঃ বিনয়ের দিকে, কিন্তু তিনি বিনীত হন না,—লজ্জায় । লোকের নিকট বিনীত হইলে, পাছে লোকে তাঁহাকে ছোট মনে করে, খাট মনে করে, অথবা শক্তি-হীন, সামর্থ্যহীন ও ক্ষমতাশূন্য কি সমাজের নিম্নশ্রেণিস্থ বিবেচনায় উপেক্ষা করে, এই লজ্জাতেই তিনি সর্বদা সঙ্কুচিত থাকেন, এবং যেখানে ঔদ্ধত্যে কিছুমাত্র সার্থকতা নাই, সেখানেও ঔদ্ধত্য দেখাইয়া, যেখানে ছুরক্ষরের কোন প্রয়োজন নাই, সেখানেও ছুরক্ষর বলিয়া, যেখানে ভ্রুকুঞ্জন, বিষদৃষ্টিবর্ষণ, ও লদর্প পদবিক্ষেপে, কোন আবশ্যকতা নাই, সেখানেও কুক্ষিত্র,

কঠোরচক্ষু এবং দান্তিকভাবভঙ্গি ও কঠিনতা প্রদর্শন করিয়া বৃথা দুর্কিনীত হন । এই শ্রেণিস্থ ব্যক্তির প্রকৃত দীনাশ্রা, প্রকৃত দরিদ্র । বিধাতা ঐহাদিগের অঙ্গে জ্যোৎস্নারশির শ্রায় রূপ-রাশি ঢালিয়া দিয়াছেন, রূপের কৃত্রিম ছটা দেখাইবার জন্ত ঐহাদিগের যত্ন থাকে না ; এবং বিধাতা ঐহাদিগকে শক্তি, সামর্থ্য, ক্ষমতা ও অশ্রু প্রকারের বৈভব দিয়াছেন, কৃত্রিম অভিমানের আবরণ দিয়া অঙ্গ ঢাকিয়া রাখিতেও, ঐহাদিগের মতি জন্মে না । ঐহাদিগের আছে, ঐহাদিগের আবার প্রদর্শন কি ? প্রদর্শন দরিদ্রের জন্ত । ঐহাদিগের অন্তরে অভিমানের অমলজ্যোতিঃ, সাগরগর্ভনিহিত অমূল্যরত্নের শ্রায়, লোকচক্ষুর অগোচরে লুক্কায়িত রহে, বিনয়ে ঐহাদিগের আবার লজ্জা কি ? লজ্জা হীনজনের জন্ত ।

বিনয়ের আর এক বাধা ভয় । অনেকের বিনয়ী হইতে লজ্জা নাই । ঐহারা জানেন যে, গরিমা আর বিনয়, কাঞ্চন-ময়ী প্রতিমায় কাঙ্ক্ষি ও দৃঢ়তার শ্রায় অনায়াসে ও অতিসুখে একত্র অবস্থান করিতে পারে । তথাপি ঐহারা বিনীত হন না,—ভয়ে । ভয় এই, পাছে বিনয়ের দিকে নাবিতে নাবিতে ক্রমে আত্মাবমাননা হয়, এবং আভ্যন্তরীণ সামর্থ্য দিন দিন ক্ষীণ হইয়া পড়ে । এই ভয়ের অর্থ, আপনাতে অবিশ্বাস । হা ! বিড়ম্বনা ! মানবপ্রকৃতির যে সমস্ত ক্ষমতাকে পৃথিবী ‘শক্তি’ বলিয়া পূজা করিয়াছে, লোকসন্নিবর্ষে ও সৌজন্য শিক্ষায় তাহার ক্ষয় হয়, না বৃদ্ধি হয় ? বুদ্ধির স্বাভাবিকী প্রতিভা, মনস্ত্বিতার অপরিহার্য্য গৌরব, আত্মার উচ্চতা, উদার হৃদয়ের মহিমা, এ সকল যদি বিনয়েই কমিবার বস্তু হয়, তবে আর ইহাদের দুর্কহ ভারবহনের প্রয়োজন কি ? তুমি যদি যথার্থ বড় লোক হও, নিশ্চয় জানিও যে, লোকের পাদপ্রান্তে

পড়িয়া থাকিলেও, তুমি মুকুটমণির স্থায় শোভা পাইবে, এবং সকলকে আপনার ক্ষমতায় বাধিয়া রাখিবে। আর যদি তুমি যথার্থ ক্ষুদ্র লোক হও, তাহা হইলে ইহাও নিশ্চয় জানিও যে, তোমায় লোকের মস্তকে কি স্বর্ণসিংহাসনের শীর্ষস্থলে তুলিয়া দিলেও, তোমার স্বাভাবিকী ক্ষুদ্রতা সমস্ত আচ্ছাদনভেদ করিয়া, বাহির হইয়া পড়িবে। অদীনসত্ত্ব খ্রীষ্ট তাঁহার শিষ্যদিগের পদপ্রক্ষালন করিয়াছিলেন ; তাঁহারা মস্তমূণ্ডের স্থায় তদীয় আজ্ঞা পালন করিতেন এবং তাঁহাদিগের পরবর্তীরা অদ্যাপি তাঁহাকে জগতে অতুল, অনন্তসাধারণ দেবত্ব-সম্পন্ন বলিয়া আরাধনা করেন। নীরো রোমবাসীদিগকে তাঁহার প্রতিমূর্তি পূজা করিতে আজ্ঞা দিয়াছিলেন। লোকে অদ্যাপি তাঁহার নাম হইলেই, ঐ নামের উপরে, অন্ততঃ কল্পনাও, পাছকাঘাত করে। বড় আর ছোট, লোহ আর চৌষক ; চৌষককে উল্টে রাখ, অধোতে রাখ, উত্তরে রাখ, দক্ষিণে রাখ, লোহ অবধারিতরূপেই উহার আকর্ষণীর অধীন হইবে। কারণ, চৌষকে অন্তর্নিহিত শক্তি আছে। বড় আর ছোট, বহি আর তৃণস্তূপ ;—বহিষ্কুলিঙ্গকে তৃণস্তূপের উপর রাখ আর নীচে রাখ, তৃণ-সংযোগে বহি আপনা হইতেই জলিয়া উঠিবে। কারণ, বহিতেও চৌষকের মত অদৃষ্ট শক্তি আছে।

বিনয়ের তৃতীয় বাধা স্বার্থচিন্তা। মনে লজ্জাও নাই, ভয়ও নাই অথচ এই বিশ্বাস আছে যে, বিনয়ের অধীন হইলে স্বার্থ-রক্ষা হইবে না। যখন প্রত্যক্ষ দেখিতেছি যে, বজ্রের ন্যায় ভয়ঙ্কর আঘাত না করিলে, কার্য্যোদ্ধার হয় না, তখন বিনয়ের মধুধারাসিঞ্চনে কি পুণ্য আছে, বল ?

বিনয়ের পক্ষে এই প্রতিবন্ধককেও আমরা উপযুক্ত প্রতিবন্ধক বলিয়া স্বীকার করি না। লৌকিক কার্য্যক্ষেত্রে বজ্রের

ন্যায় আঘাত যে, সময়ে সময়ে অনিবার্য্য, তাহা আমরা মানিয়া লইতে প্রস্তুত আছি। কিন্তু জিজ্ঞাসা করি, বজ্র কি দুর্ভিনীত? বজ্রপাতের প্রথমে মেঘঘটা,—কি সুন্দর, কি সুখদর্শন, সুশীতল ছায়াপ্রদ। তার পর সৌদামিনীর মূহু হাস্ত। উহা কাহার মন না কাড়িয়া লয়? তার পর জলদমালায় মিনতি, অবনতি ও অবিরাম বারিধারা; এবং তার পর উদ্ধতমস্তকে মুহুমূহুঃ অগ্নিপাত। তবে কেন বজ্রে বৃথা আর অবিনয়ের অপবাদ দাও? যদি বাহুতে বল থাকে, তবে পুরুষের মত দৃঢ়ভাবে কার্য্য কর, অথচ পুরুষের মত বিনীত হও। ইহাতে স্বার্থরক্ষার কখনও বিঘ্ন ঘটিবে না।

বীরসমাজে বোনাপাট নিতান্ত বিনীত ছিলেন। তাঁহার এই রীতি ছিল, তিনি, সমর্যাবসানে বিজয়-বৈজয়ন্তী দোলাইয়া দিয়া, তৎক্ষণাৎই শত্রুপক্ষের নিকট অতিকাতরকণ্ঠে সন্ধি-সংস্থাপনের জন্ত প্রার্থী হইতেন। ইংলণ্ডের চতুর্থ জর্জ এবং অষ্ট্রিয়ার সম্রাটের নিকট, পুনঃপুনঃ জয়লাভের পরেও, তিনি স্বহস্তে যে সকল বিনয়পূর্ণ কাতরোক্তি লিখিয়া পাঠাইয়াছেন, হীনতর কোন ব্যক্তি তদনুরূপ বিনীত হইতে সাহস পায় না।

পুরুষসিংহ প্রথম রিচার্ডও সামাজিকদিগের সহিত কথোপকথনে ও ব্যবহারে যার পর নাই বিনয়্যাবনত থাকিতেন। তিনি আপনার অমিত পরাক্রমকে এমনই এক দুর্ভেদ্য বর্ষ্ম বলিয়া জানিতেন যে, স্বকীয় দৃঢ় দুই ভুজ এবং প্রশস্ত ললাট ভিন্ন রাজপরিচ্ছদের কিছুই আর আবশ্যক জ্ঞান করিতেন না। কিন্তু ইহাতেই তাঁহার সিংহের প্রতাপ সর্বত্র অনুভূত হইত এবং সকলে আপনা হইতে আসিয়া, তাঁহার চরণোপান্তে গড়াইয়া পড়িত। অতি দুর্দ্বন্দ্ব অভিমানীরাও তাঁহার বিনয়্যাবৃত অভিমানের নিকট পরাভব স্বীকার করিত। এদিকে তাঁহার কনিষ্ঠ,



শৃগাল জন, মানের কাল্পনিক অনুরোধে ছুঁকিনয়ের পরাকাষ্ঠা প্রদর্শন করিয়াও, লোকের নিকট অপমানিত রহিতেন। অগ্রজের অনবদ্য পৌরুষদেহে যে মাধুরী রূপমুগ্ধা কামিনীর ছায় একবারে নিলীন থাকিত, তিনি মণিমুক্তার মালা পরিয়াও তাহার ছায়া পাইতেন না।

পুরাকালে রোমের এক তেজঃপুঞ্জ সম্রাট্ একদা পারিষদবর্গ সমভিব্যাহারে রাজপথে বায়ু সেবন করিতেছিলেন। একটি দীনমূর্তি ভদ্রসন্তান দূর হইতে তাঁহার দর্শন লাভ করিয়া, তাঁহাকে সসম্মুখে অভিবাদন করিলেন। তিনি তাঁহা হইতেও অধিকতর অবনত হইয়া, তাঁহাকে প্রত্যভিবাদন করিলেন। পারিষদদিগের মধ্যে এক জন এই আচরণের অর্থগ্রহ করিতে না পারিয়া, একটুকু হাসিতেছিলেন। সম্রাট্ সেই হাসির তাৎপর্য বুঝিতে পারিয়া, তাঁহাকে বলিলেন,—“আপনার কি এই অভিলাষ যে, সকল বিষয়ে ইহাঁ অপেক্ষা উচ্চতর স্থানে অবস্থিত রহিয়া, এইক্ষণ বিনয়ে আমি ইহাঁর নিকট অধঃকৃত হইব ?”

বিনয়ে যাঁহাদিগের লজ্জা হয়, ভয় হয় অথবা সাহসের অভাব হয়, বুদ্ধি থাকিলে তাঁহারা এই মহানুভাব সম্রাটের নিকট শিক্ষা লইবেন। আর, যাঁহাদিগের প্রকৃতিই বিনয়-বিরোধিনী,—বিষবর্ষণী,—ছিন্নতার বীণার মত বিসংবাদিনী, তাঁহারা আত্মোৎকর্ষচিন্তায় এবং অধ্যাত্মসৌন্দর্যের গৌরবধ্যানে নিমগ্ন হইবেন।

## হরগৌরী ।

“আধ বাঘছাল ভাল বিরাজে,      আধ পটাঘর সুন্দর সাজে ;  
আধ মণিময় কিঙ্কিনী বাজে, আধ ফণিফণা ধরি রে ।  
আধই হৃদয়ে হাড়ের মালা,      আধ মণিময় হার উজালা,  
আধ গলে শোভে গরল কালা, আধই সুধা মাধুরী রে ॥  
এক হাতে শোভে ফণিভুষণ,      এক হাতে শোভে মণিকঙ্কণ,  
আধ মুখে ভাঙ্গ ধুতুরা ভঙ্কণ, আধই তাম্বুল পুরি রে ।  
ভাঙ্গে ঢুলু ঢুলু এক লোচন,      কজ্জলে উজ্জল এক নয়ন,  
আধ ভালে হরিতাল সুশোভন, আধই সিন্দূর পরি রে ॥  
কপাল-লোচন আধই আধে,      মিলন হইল বড়ই সাধে,  
ঢ়েই ভাগ অগ্নি এক অবাধে, হইল প্রণয় করি রে ।  
দৌহার আধ আধ আধ শশী,      শোভা দিল বড় মিলিয়া বসি,  
আধ জটাজুট গঙ্গা সরসী, আধই চাকু কবরী রে ॥”

কবিবর ভারতচন্দ্র পুরাণ হইতে এই চিত্রটি তুলিয়া আনিয়া-  
ছেন । কিন্তু ঐহার কল্পনায় ইহা প্রথম প্রতিভাত হইয়াছিল,  
ঐহার প্রশংসার সীমা নাই । তিনি অতি উচ্চশ্রেণির দার্শ-  
নিক, অতি প্রগাঢ় পণ্ডিত, অতি পূজনীয় কবি । তাঁহাকে  
আমরা অভিবাদন করি । তাঁহার এই লীলাময় চিত্রপটে  
সৌন্দর্যের কি বিচিত্র মাধুরী খেলা করিতেছে, মানব-প্রকৃতির  
পূর্ণাবরতা কি আশ্চর্য্য শোভা পাইয়াছে, সামাজিক সম্পদের  
কি অপূৰ্ণ প্রতিমা প্রদর্শিত হইয়াছে, এবং দাম্পত্য-প্রেমের কি  
অলৌকিক প্রতিমূর্তিই ইহাতে অঙ্কিত রহিয়াছে ! এই চিত্র  
জগতে অতুল । ইহা মনস্বী ও ভাবুক, সকলেরই সমান  
ভোগ্য ।

ইহার বহিঃস্থ পরিষ্কৃত অর্থ পূর্ণসৌন্দর্য্য । এই অনন্ত নিসর্গরাজ্য সৌন্দর্য্যের এক অনন্ত সমুদ্র । ইহার তরঙ্গে তরঙ্গে কেবলই সৌন্দর্য্যের তরঙ্গ । নয়নাভিরাম শ্রামল নভোমণ্ডলে, কুম্ভকাননে, শ্রোতস্বিনীর আবিল বক্ষে, চন্দ্রমার অমৃতময় জ্যোৎস্নায়, সূর্য্যের খরজ্যোতিতে, সূর্যালোকরঞ্জিত মেঘমালায়, সরোবরের নির্মল জলে, শৈবালে, শৈবালবেষ্টিত কুমুদ-কমলে, শস্ত্রশোভাময় রমণীয় ক্ষেত্রে, তৃণশম্পসমাচ্ছাদিত ভূখণ্ডে, বনে, উপবনে, উন্নত পাদপে, ছলিত লতিকায়, তুষারে, তুষারমণ্ডিত পর্ব্বতশৃঙ্গে, জলধির তরল-পর্ব্বতময় অসীম বিস্তারে, সর্ব্বত্রই সৌন্দর্য্যের উচ্ছ্বাস এবং সর্ব্বত্রই সৌন্দর্য্যের অবিরামবাহিনী আমোদলহরী । হৃদয়বান্ ব্যক্তি এই সৌন্দর্য্যসুধা পান করিয়া, মনুষ্যদেহেই দেবজনস্পৃহণীয় স্বর্গস্থল সম্ভোগ করেন. এবং ভাষায় তিনি কবি না হইলেও, কাবোর এই প্রাণগতরস হৃদয়ে পোষণ করিয়া কৃতার্থ হন । তাঁহার নিকট প্রভাত, সন্ধ্যা, মধ্যাহ্ন ও গভীর নিশীথিনী সকলেই সামবেদী ঋষির ভ্রায় সৌন্দর্য্যের স্ততিগীত গান করে, এবং তদীয় চিত্ত সৌন্দর্য্যসলিলে ভাসিয়া ভাসিয়াই সমস্ত হৃৎথ যন্ত্রণা ভুলিয়া থাকে, এবং সর্ব্ব-প্রকার কলুষপঙ্কিলতা, ক্ষুদ্রতা ও সঙ্কীর্ণতা হইতে বিনা প্রযত্নেই নিৰ্ম্মুক্ত রহে ।

কিন্তু এই যে সৌন্দর্য্যের উল্লেখ হইল, ইহা কি সকল স্থলেই একরূপ ?—না ইহাতে বিচিত্রতা আছে ? পর্ব্বতে যে সৌন্দর্য্য, পর্ব্বতপ্রান্তবাহিনী তরঙ্গিণীতেও কি সেই সৌন্দর্য্য ? পাদপের দৃঢ়তা ও দৃকপাতশূন্য পৌরুষে যে কান্তি, পাদপকণ্ঠশোভিনী পুষ্পময়ী ব্রততীতেও কি সেই কান্তি ? যাহার চক্ষু আছে, তিনিই বলিবেন,—না ।

যেমন কবিতায় রসবৈচিত্র্য্য, তেমন সৌন্দর্য্যেও বিচিত্র

প্রভেদ। সৌন্দর্য্য অনেক প্রকার। উহা কোথাও ভয়ানক, কোথাও কারুণ্যব্যঞ্জক,—উহাতে কোথাও ভক্তির উদ্দীপনা, কোথাও প্রীতির প্রবর্তনা। অমাবস্তার রাত্রি, ঘোরতর অন্ধকার, আকাশে নিবিড় ঘনঘটা, বায়ুর শ্বাসপ্রশ্বাসে শোকের সুগভীর নিঃশ্বন, মুসলধারে বৃষ্টি, মুহমূহঃ বিদ্যাতের ক্ষুধা, মুহমূহঃ বজ্রপাত, জলে স্থলে এক, শূন্যে অশূন্যে সমরূপতা, এই এক প্রকারের সৌন্দর্য্য,—ভয়ঙ্কর, রোমহর্ষণ, নিকরপম। এই প্রকারের সৌন্দর্য্যে হৃদয়ে বিলাসের আবেশ হয় না, হৃদয় সুখসম্পর্শেও শীতল হয় না ; উহা ক্রমশঃ কেবল স্তম্ভিত হইতে থাকে, এবং স্তম্ভিত হইয়াও ক্রমে ক্রমে ক্ষীত হইয়া উঠে। আবার লতাবৃত বিনোদকুঞ্জে কৌমুদীর ক্রীড়াকৌতুক, দুর্কাদলে শিশির, স্নন্দরীর কমনীয় ললাটে চূর্ণকুন্তল, শিশুর সরল হাস্ত, এই সকল আর এক প্রকারের সৌন্দর্য্য,—প্রাণারাম, প্রিয়দর্শন, প্রীতিপ্রদ। হরগৌরীর অপরূপ সম্মিলনে এই উভয়বিধ সৌন্দর্য্যেরই আভা রহিয়াছে। এই জন্যই বলিয়াছি, ইহাতে পূর্ণ-সৌন্দর্য্য প্রতিবিম্বিত। অণুমাত্রায় হইলেও ইহাতে পূর্ণতার কিঞ্চিৎ ছায়া আসিয়া পড়িয়াছে,—কবির কল্পনা, পরস্পর-বিরোধিনী বিচিত্রতার একত্র সমাবেশ করিতে চেষ্টা করিয়া, অতি অল্প পরিমাণে হইলেও ইহাতে কৃতকার্য্য হইয়াছে। ইহাতে,—

“আধ গলে শোভে গরল কালা,

আধই সুখা মধুরী রে।”

স্বতরাং যাহাতে আতঙ্ক, আমরা এই মূর্তিতে তাহারও প্রতিকৃতি দেখিতে পাই ; যাহাতে আনন্দ, আমরা তাহাও এই মনোহর মূর্তিতে সন্দর্শন করিয়া প্রীত হই। ইহাতে মধুরিমা ভয়ের সহিত মিশ্রিত হইয়াছে, ভয় মধুরবেশে মন মোহিত

করিতেছে । ইহাতে কাঠিন্ত্ব কোমল হইয়া গিয়াছে, কোমলতা কাঠিন্যে পরিণতি পাইয়াছে । কে এরূপ একবার দেখিলে বিস্মৃত হইতে পারে ?—যেখানে হৃদয় যাই যাই বলিয়াও যাইতে সাহস পায় না, এবং যে অদৃষ্টপূর্ব্ব দৃশ্য হইতে চিত্ত দূরে যাইতে ইচ্ছুক হইলেও যাইতে পারে না, কে তাহার মন্ত্রমোহ হইতে মুক্ত রহিবে ?

এই হরগৌরীচিত্রের অন্তঃস্থ অক্ষুট অর্থ মানবপ্রকৃতির পূর্ণাবয়বতা । মানবপ্রকৃতির কোন কোন বৃত্তি ফণীর মত গর্জ্জন করে, কোন কোন বৃত্তি কিঙ্কিণীর কলনাদে হৃদয় মন কাড়িয়া লয় ;—কোন কোন ভাব অগ্নির মত জিহ্বা প্রসারণ করিয়া পোড়াইতে কি প্রাস করিতে আসে, কোন কোন ভাব শরীরে অমৃতধারা ঢালিয়া দেয় । যখন মনুষ্য ক্রোধে প্রজ্বলিত, তাহাকে তখনও দেখিও ; যখন সে স্নেহে বিগলিত, তাহার তদানীন্তন মাধুর্য্যও একবার দেখিয়া লইও । মনুষ্যের অভিমান সর্ব্বদাই ‘দূরে রহ’ বলিয়া, দর্প সহকারে তোমাকে ইঙ্গিত করিতেছে, মনুষ্যের মমতা জ্যোৎস্নার হিল্লোলের ন্যায় তোমার তাপিত অঙ্গে আপনা হইতে আসিয়া, গড়াইয়া পড়িতেছে । মনুষ্যচক্ষের কোনরূপ দৃষ্টি বিষাক্ত শলাকার ন্যায় তোমার মর্ম্মস্থল ভেদ করিয়া যাইতেছে, এবং উহা যতদূর প্রবিষ্ট হইতেছে, ততদূরই যেন প্রতপ্ত-লৌহ কি প্রতপ্ত-গরল-স্রোতে বহিতেছে ; আবার মনুষ্যেরই আলময়, আবেশময়, প্রাণস্পর্শী নয়নভঙ্গি তোমায় উন্মাদিত করিয়া তুলিতেছে ;—যে কল্পকানন স্বপ্নে বই কেহ দেখিতে পায় না, অন্ততঃ ক্ষণকালের জন্য তোমায় তাহার সুস্বিগ্ন শ্রামল জ্যোতিঃ দেখিতে দিতেছে । কবিকল্পিত হরগৌরী মূর্ত্তিতে এই উভয়বিধ ভাবেরই একত্র নিবেশ ; ইহাতে যেমন নানারূপ সৌন্দর্য্যের অপূর্ব্ব মিশ্রণ,

তেমন পুরুষকার ও প্রীতিরও অপূৰ্ণ সন্মিলন। ইহাই মনুষ্যের চরমোৎকর্ষ। ইহাতে ব্যাঘ্রচৰ্ম্ম ও পটাস্বর আলিঙ্গনবদ্ধ, ইহাতে ফণী ও মণি, জটাজূট ও চারুকবরী, ধবল বিভূতি ও গন্ধ কস্তুরী একাধারে জড়িত গড়িত। অলৌকিক কালিদাস এই মোহন মূর্তির আভা দর্শন করিয়াই দিলীপ বর্ণনে বলিয়াছেন, যে,—

“ভীমকাস্তৈর্নৃপগুণৈঃ স বভূবোপজীবিনাং ।

অধ্বষ্যচ্চাভিগম্যচ্চ যাদোরভৈরিবার্ণবঃ ।”

এবং কালিদাসের আদিগুরু আদিকবি বাম্বীকিও শোভা ও সামর্থ্যের এই সন্মিলন ধ্যান করিয়াই কখনও রামের কোদণ্ড-টঙ্কারে ও জলদ-গম্ভীর গর্জনে ত্রিভুবন কম্পিত করিয়াছেন, কখনও বা রামচন্দ্রের করুণবিলাপ ও অশ্রুবর্ষণে বনের পশু পক্ষীকেও বিলাপ করাইয়াছেন;—পাষাণে দ্রবময়ীর লীলা দেখাইয়া, পাষাণে কুসুমরাশি প্রস্ফুটিত করিয়া, লোককে বিস্মিত ও বিমুগ্ধ রাখিয়াছেন।

বিধাতা মনুষ্যকে ছুটি চক্ষু দিয়াছেন। কিন্তু সংসারে অধিকাংশ মনুষ্যই কাকের মত এক চক্ষে দেখিয়া থাকেন, এবং একাঙ্গি মাত্র দেখিতে পান বলিয়া, মানবমহিমার একাক্ষেরই উপাসনা করেন। তাঁহাদিগের মধ্যে কাহারও নিকট শুধু পৌরুষ গুণেরই গৌরব ও সম্মাননা। তাদৃশ ব্যক্তিদিগের বিবেচনায় যে কোন ভাব, যে কোন বিষয় এবং যাহা কিছুতে হৃদয়ের গন্ধ আছে, অবলাপ্রকৃতির সম্পর্ক আছে এবং অবলা-জনমূলভ সারল্য, কোমলতা, পরস্বপ্নপ্রেক্ষিতা, ও পরের প্রতি নির্ভরের ছায়া আছে, তাহাই দুষণীয়, তাহাই জঘন্য। তাঁহারা আত্মীয়জনের উপকার করিতে প্রস্তুত, কিন্তু আত্মীয় জনকে আদরে পরিতুষ্ট করিতে তাঁহারা লজ্জা অনুভব করেন। তাঁহারা

বন্ধুতার অনুরোধে বিপৎসময়ে সাহায্য দান করিতে অসম্মত নহেন, কিন্তু কোন অনুরোধেই কাহাকেও স্নেহের সজলনয়নে অভিনন্দন করিতে তাঁহারা সম্মত হয়েন না । এ সকল তাঁহাদিগের চক্ষে যেমন অনাবশ্যক, তেমন অবজ্ঞেয়, তেমনই উপহাসনীয় । তাঁহাদিগের আদর্শ পুরুষ আপনাতে আপনি দৃঢ় হইয়া, লৌহস্তম্ভের মত দণ্ডায়মান থাকিবেন, কখনও পরের কণ্ঠে ভর করিবেন না ; তিনি শত্রুমর্দনে একে এক সহস্রের মত কার্য্য করিবেন, কিন্তু কখনও সূহৃৎসমাগমে চলিয়া পড়িবেন না ; তাঁহাতে মার্ত্তণ্ডের প্রথর দীপ্তি থাকিবে, কিন্তু কখনও চন্দ্রমার স্নিগ্ধ কাস্তি বিলাসিত হইবে না ; তিনি স্নেহে স্মৃখী হইতে পারেন, কিন্তু স্নেহে কখনও কৃতজ্ঞ হইবেন না ; এবং বিরহ, বিয়োগ প্রভৃতি দুঃখ তাঁহার চরণোপান্তে প্রবাহিত হইয়া যাইবে, কিন্তু কখনও তাঁহাকে স্পর্শ করিবে না ।

পক্ষান্তরে, এমনও অনেক ব্যক্তি আছেন যে, তাঁহারা পৌরুষ-ধন্থে পূজার উপযুক্ত সামগ্রী কিছুই দেখিতে পান না, কিন্তু প্রীতির মোহিনী মায়া এবং ঢল ঢল লাবণ্যরাশিকেই সর্ব্বস্ব মনে করেন । তাঁহাদিগের অভিধানে বিষয়লিপ্সা ও কার্য্যকুশলতার নাম কপটতা, পরাক্রমের নাম পাপ, বীরগর্ব ও অভিমান অধোগতির প্রশস্ত পথ । যে সকল পুরুষ আঘাতের উত্তরে প্রতিঘাত করিয়া, পৃথিবীতে চিরকাল কেবল মল্লযুদ্ধেই জীবন অতিবাহিত করিয়াছেন ; যাহারা স্থচির ত্রায় কুটচক্র ভেদ করিয়াছেন, রিপুকুলের মস্তকে বজ্রের ত্রায় ভীমশব্দে নিপতিত হইয়াছেন, এবং কোথাও বা ঝটিকার ত্রায় সম্মুখস্থ সমস্ত বিষয় বাধা বেগে উড়াইয়া লইয়াছেন, তাঁহাদিগের চক্ষে তাদৃশ ক্ষণ-জন্মা ব্যক্তিরও অপদেবতার অবতারণা । এই সম্প্রদায়ের আদর্শ পুরুষ কুসুমের ন্যায় কোমল হইবেন, কিন্তু তাঁহাতে কণ্টকের

কোন লক্ষণ থাকিবে না ; তাঁহার নেত্রযুগল হইতে স্নেহে চুঃখে সকল সময়েই ধারায় বাষ্পবারি বিগলিত হইবে, প্রণয় তাঁহার হৃদয়কে একবারে ডুবু ডুবু করিয়া রাখিবে, এবং তাঁহার দৃষ্টি ও কথায় কেবলই মধু ফরিবে। তিনি বিনীত, তিনি শান্ত, তিনি ক্রোধাদিবিকাররহিত। তিনি সংসারে নিরীপ্ত। তিনি শত্রুর নিকটও পদানত। তিনি মৃত্যুর সজীব প্রতিমূর্তি।

যাহারা পূর্ণতার উপাসক, তাঁহারা এই উভয় সম্প্রদায়েরই আংশিক অনুসরণ করেন, অথচ এই উভয়ে পৃথক্ পৃথক্ রূপে যাহা অনুভব করিতে না পান, তাহা অনুভব করিয়া, উভয়েরই অগম্য এক উচ্চতর গ্রামে আরুঢ় হন। তাঁহাদিগের বিবেচনায় যে পৌরুষে প্রীতি নাই, কেবল স্বার্থ আছে, তাহা শাশানসদৃশ ; এবং যে প্রীতিতে পৌরুষের অবলম্বন নাই, কেবল অসার মৌরভ আছে, তাহা শুষ্ক ও দলিত পুষ্পদলসদৃশ। তাঁহারা এই নিমিত্ত পৌরুষ ও প্রীতির সম্মিলিত অবস্থাকেই পরমপুরুষার্থ বলিয়া পূজা করেন, এবং যাহাতে প্রতিমনুষ্যেই এই উভয় ভাবের সমুচিত বিকাশ হয়, যাহাতে প্রত্যেকেই অংশতঃ পুরুষ ও অংশতঃ অবলা-স্বভাব হইয়া, গঙ্গাসাগরসঙ্গমের স্থায় এক তীর্থ-স্বরূপ হইতে পারেন, ইহাই তাঁহারা সর্বান্তঃকরণে কামনা করেন। তাঁহাদিগের আদর্শ এই হরগৌরীমূর্তি, একাক্ষে প্রলয়, অপরাঙ্কে প্রাণদান—একাক্ষে সমাধির নিস্তরু গান্তীর্থ্য, অপরাঙ্কে ঈষদ্বসিত প্রফুল্লতার প্রিয় আকর্ষণ। তাঁহাদিগের ধর্ম্মনীতি কাপুরুষকে অবজ্ঞা করে ; যে ভীকু, যে নিরভিমান, যে আঘাতে উত্তেজিত হয় না, অপমানের নিদারুণ দংশনেও জলিয়া কি জাগিয়া উঠে না, যাহার চিত্ত কোনরূপ কঠোর সাধনাতেই সাহস পায় না, যাহার মন কার্য্যের সময় ফুৎকারেরও ভর সহে না, তাহাকে উহা মনুষ্যগণনারই বাহিরে রাখে। অথচ, যাহারা



ক্রুরকৰ্ম্মা, যাহারা নিষ্ঠুর, যাহারা কিছুতেই আর্জ হন না, কিছুতেই কাহাকেও আর্জ করিতে পারেন না, যাহারা প্রাণ খুলিয়া ভালবাসিতে জানেন না, প্রাণ দিয়া পরের পূজা করিতে ইচ্ছা করেন না,—যাহারা ঐশ্বর্য্যের আনন্দ চাহেন, কিন্তু স্নেহের অধীনতায় কি অনির্ব্বচনীয় আনন্দ আছে, তাহা বুঝিতে চাহেন না, ঐ প্রশস্ত নীতি তাঁহাদিগকে অধম পুরুষ বলিয়া ঘৃণার চক্ষেই নিরীক্ষণ করে ।

মনুষ্যের একটি আশ্চর্য্য ক্ষমতা আছে । মনুষ্য আপনার অভাব ও অপূর্ণতাকে আচ্ছাদন করিয়া রাখিবার জন্ত ভাষাকে দাসীর ত্রায় ব্যবহার করে, এবং নূতন নূতন শব্দের সৃষ্টি করিয়া, ঐ সমস্ত নূতন শব্দের আবরণেই আপনার রুগ্নতা ও ক্ষীণতা ঢাকিয়া রাখিতে যত্নশীল রহে । আমরা উপরে পৌরুষ-বিরোধী ও হৃদয়-বিরোধী এই দুইটি বিভিন্নশ্রেণিস্থ ব্যক্তিদিগের মতি ও গতি সম্বন্ধে যাহা বলিয়াছি, তাহাতেই এ কথার অতি সুন্দর নিদর্শন আছে । যাহারা পৌরুষ-বিরোধী, তাঁহাদিগের মুখে আমরা সকল সময়েই শান্তি, ক্ষমা, নির্ব্বেদ, বৈরাগ্য, শত্রুর প্রতি দয়া, বিশ্বজনীন প্রীতি ইত্যাদি কতকগুলি পবিত্র শব্দ শুনিতে পাইয়া থাকি । তাঁহারা দীর্ঘ নিঃশ্বাস সহকারে এই সমস্ত শব্দ উচ্চারণ করেন, এবং এই সকল শব্দের সহায়তা লইয়াই পৃথিবীর রক্তভূমি হইতে পৌরুষ ও পরাক্রমের সকল প্রকার ক্রীড়া এবং সঙ্গে সঙ্গে আপনাদিগের অপবাদ ও কলঙ্ক দূর করিবেন বলিয়া আশাবিত্ত হন । তাঁহারা যখন আহত হইয়া শয্যাগত থাকেন, তখন উহা পরকাল-চিন্তা ; তাঁহারা যখন ভয়ে কণ্টকিত হইয়া অঞ্চলের আশ্রয় লন, তখন উহা বিরোধবিশ্মুগ্নতা । হায় ! এই ধর্ম্মই যদি মনুষ্যজাতির পরি-  
ত্ৰাণের ধর্ম্ম হইত, তবে ইতিহাস কাহাদিগের কাহিনী শুনাইয়া

মমুষ্যের চিত্ত বিমোহিত করিত ? ভীষ্ম, দ্রোণ, কর্ণাজুন, সেকেন্দর, সিজর, হানিবাল ও বোনাপার্ট প্রভৃতি ধুরন্ধর পুরুষদিগের দিগন্তবিস্তৃত নাম কোথায় থাকিত ? ধর্মপোলীর অতুল কীর্তি স্মরণ করিয়া, কে আনন্দে উচ্ছলিত হইত ? আর, জগতে অদ্যাপি যে সকল অবদান পরম্পরা অহরহ অমুষ্টিত হইতেছে, কোথায় তাহার চিহ্ন থাকিত ? কিন্তু সৌভাগ্যের বিষয় এই, যাহারা পৌরুষের নিন্দা করেন, তাঁহারা শব্দের সৃষ্টি করিতে যেমন বিচক্ষণ, মানবপ্রকৃতির পরিবর্ত-সাধনে তেমন সক্ষম নহেন। তাঁহারা তাঁহাদিগের শব্দসম্পদ লইয়া সুখে নিদ্রাভোগ করুন।

যে শ্রেণির ব্যক্তির হৃদয়গত উৎকর্ষের বিরোধী, তাঁহাদিগের প্রধান কথা, ‘দুর্বলতা’। তাঁহারা সকল করিতে পারেন ও সকল সহিতে পারেন, কিন্তু কিছুতেই হৃদয়ের দুর্বলতা প্রদর্শন করিতে পারেন না। তাঁহাদিগের দ্বারে ভিখারী রোদন করিতেছে, দিনান্তে মুষ্টি ভিক্ষা পায় নাই বলিয়া, কাতরকণ্ঠে চীৎকার করিতেছে, কিন্তু তাঁহারা তাহার প্রতি ক্লপাকটাক্ষ নিক্ষেপ করিবেন না। কারণ, ইহা হৃদয়ের দুর্বলতা। যে তাঁহাদিগের মুখে একটি প্রিয়কথা শুনিলেই আক্সাদে অবশ হয়, তাঁহারা তাহাকে প্রাণান্তেও প্রিয় সম্বোধনে সম্বাষণ করিবেন না। কারণ, ইহা হৃদয়ের দুর্বলতা। জীবনের চির-সঙ্গিনী, অশেষ মানসিক যন্ত্রণায় জর্জরিত হইয়া, প্রণয়-পিপাসু নয়নে পুনঃপুনঃ দৃষ্টিপাত করিতেছেন ; তাঁহারা তাঁহার প্রতি কিরিয়া চাহিবেন না। কারণ, ইহা হৃদয়ের দুর্বলতা। যে সকল কার্য্যে লোকে প্রীত হয়, পরিতপ্ত হয়, লোকে অন্তরের সহিত কৃতজ্ঞতা ও সাধুবাদ দেয়, তাঁহারা ইচ্ছাপূর্বক তাহাতে পরাশ্রয় রহিবেন। কেন না, ইহাও হৃদয়ের দুর্বলতা। অহো

মনুষ্য ! কিছুই তোমার অসাধ্য নহে । যাহা ঘোরতর পাতক, ভূমি তাহাতে পুণ্যের কমনীয়চ্ছবি প্রদান করিতে পার, এবং যাদৃশ আচরণে দয়া অশ্রুবর্ষণ করে, ধর্ম নিপীড়িত হন, তুমি তাহাও পৌরুষের নিশ্চল নাম লইয়া অনুষ্ঠান কর ।

হৃদয়ের দুর্বলতা ? দুর্বলতা এ শব্দ কে কোথা হইতে আনিল ? আর, যদি মনুষ্যের হৃদয় স্বভাবতঃই দুর্বল হয়, তবে উহা দোষ না গুণ ? হৃদয় বিবেকের অগ্রবর্তী । বিবেক যেখানে পছঁ ছিতে পারে না, হৃদয়ের গতি সেখানেও অব্যাহত । হৃদয়ের দুর্বলতাতেই অচিস্তনীয় বল । ইহা সত্য যে, মনুষ্য হৃদয়ের দুর্বলতা বশতঃ প্রণয়ে পরতন্ত্র হয়, পরের স্মৃতি হানে, পরের হৃৎথে কাঁদে, পরের বিচ্ছেদবেদনায় ক্লিষ্ট হয়, পরচিত্ত-বিনোদনের জন্ত নানাবিধ উপায় অবলম্বন করে । কিন্তু ইহাও সত্য যে, এই হৃদয়ের দুর্বলতা বশতঃই সে গিরিসাগর লঙ্ঘন করিয়া, সাধারণের অসাধ্য কার্য সকল অবহেলায় সাধন করিয়া উঠে ; এই দুর্বলতার সামর্থ্যেই সে বিপদরাশির মধ্যে ঝাঁপ দিয়া পড়ে ; এই দুর্বলতার মহিমাবলেই সে আপনার অস্থিচর্ম বিক্রয়দ্বারা জাতি বিশেষের উদ্ধারের পথ উন্মোচন করিয়া দেয় । হৃদয়ের দুর্বলতা জ্ঞানে তাহার সহায়, জগতের হিতজনক যশস্কর কার্যে তাহার উদ্দীপনা, সমরাস্রমে তাহার মনোমাদি শঙ্খধ্বনি, ধর্ম্মে তাহার বীজমন্ত্র, প্রেমে তাহার প্রাণ । মনুষ্য প্রবৃত্তির সজীবতা বৃদ্ধির জন্ত যতবিধ মদিরা পান করিয়া থাকে, হৃদয়ের দুর্বলতাই তন্মধ্যে তাহার প্রধান মদিরা । সংসার যাহাদিগের নিকট ঈশ্বরী রহিয়াছে, তাঁহারা সকলেই এই মদিরা-পানে বিভোর থাকিতেন ।

মনুষ্যের প্রকৃতিকে তুমি স্তম্ভর বল । কিন্তু উহার সৌন্দর্য্য কিসে ?—না হৃদয়ের দুর্বলতার । মনুষ্য অনেক কার্যেই দৈত্য-

দানবের উপমাগুলি বলিয়া বর্ণিত হইয়া থাকে ; কিন্তু দেবতার সহিত যে, তাহার উপমা হয়, তাহা শুধু হৃদয়ের দুর্বলতায়। যখন দেখিবে যে, বোদ্ধা ধূমান্ধকার যুদ্ধক্ষেত্রে বিপক্ষের অস্ত্রাঘাতে নিপতিত হইয়া, প্রাণ যায় যায় এমন সময়েও করধৃত বারিপাত্র আপনার মুখের নিকট হইতে অপসারণপূর্বক অধিকতর তৃষ্ণাতুর অন্ত একজনের মুখে তুলিয়া দিতেছেন, তখন ইহা মনে রাখিও যে, হৃদয়ের দুর্বলতাই সেখানে তাঁহার বল বিধান করিয়াছে। যখন দেখিবে যে, কোন স্থানে অগ্নির জ্বলন্ত জিহ্বা, মৃত্যুর করাল জিহ্বার ন্যায়, চতুর্দিক ব্যাপিয়া লক্ লক্ ধক্ ধক্ করিতেছে, সকলেই আপনাকে মাত্র বাঁচাইয়া সে স্থান হইতে দূরে পলাইতেছে ; কিন্তু একটি ক্ষীণাঙ্গী ললনা সেই অগ্নি ও সেই সাক্ষাৎ মৃত্যুকে ভয় না করিয়া, একটি সুকুমার শিশুর জীবন রক্ষার জন্য উহার মধ্যে অগ্নানবদনে প্রবিষ্ট হইতেছে, এবং আপনি অর্দ্ধদগ্ধ হইয়াও ক্রোড়স্থ শিশুটিকে আবরিয়া রাখিতেছে, তখন জানিও যে, তাহার যাহা কিছু সামর্থ্য, হৃদয়ের দুর্বলতা হইতেই সে তাহা প্রাপ্ত হইয়াছে। যখন দেখিবে যে, যাহার পদাঘাতে পৃথিবীতে ভূকম্প হইত, যাহার ঝলসিত অন্তর্চালনে বিদ্যুৎরাশি খেলা করিত, পর্বতের মেঘস্পর্শী মস্তকও যাহার অভ্যর্থনা ও আজ্ঞাপালনের জন্য অবনত হইয়া আসিত, সেই তেজঃপুঞ্জ মহাবীর লোকলীলার অস্তিমক্ষণেও আপনাকে বিস্মৃত হইয়া, স্বজাতির অধোগতি স্মরণেই অশ্রুজলে পরিপ্লুত হইতেছেন, — যিনি কাতরতা কাহাকে বলে, তাহা কখনও বুঝিতেন না, তিনি আজি জননী ও জন্মভূমিকে কাহার হাতে তুলিয়া দিয়া যাইবেন, এই চিন্তাতেই বালিকার মত কাতর হইয়া পড়িয়াছেন, তখন জানিও যে, হৃদয়ের দুর্বলতাই তাঁহার রোমে রোমে প্রসৃত হইতেছে ; হৃদয়ের দুর্বলতাই সেই মহামুহূর্ত্তে তাঁহাকে আত্মহুঃখে

অন্ধ রাধিয়া, পরজুখে দাহন করিতেছে । হৃদয় অমৃতের অনন্ত প্রস্রবণ । একটি বালুকণাকে চঞ্চল সৃষ্টিশক্তি তুলিয়া দিলে উহা যতক্ষণ সেখানে অবস্থান করিতে না পায়, যদি ততক্ষণের জন্যও সমগ্র মনুষ্য জাতির হৃদয়প্রস্রবণ একবারে শুকু রহে, তাহা হইলে এই অবনীর অন্তস্তল হইতে এমন এক অশ্রুতপূর্ব হাহাকার ধ্বনি সমুথিত হয় যে, দূরস্থ গ্রহ নক্ষত্রও তাহাতে চমকিয়া উঠে । হে ধীর ! তুমি ইহার পরও কি হৃদয়ের দুর্বলতায় লজ্জিত হইবে ? যিনি এই নিখিল সংসার মধ্যে কেবল আপনাকেই সার জ্ঞান করিয়াছেন, তিনিই মনুষ্যহৃদয়ের দুর্বলতার উপহাস করুন ; কিন্তু যিনি আপনার ক্ষুদ্রতাকে পূর্ণতায় প্রসারিত করিতে ইচ্ছা করেন, হৃদয়ের দুর্বলতা তাঁহার চক্ষে লজ্জার নহে । হৃদয়ের দুর্বলতা হেতুই তুমি আমার, আমি তোমার,— এই আমার বন্ধ, এই আমার বান্ধব, এই আমার আত্মীয় স্বজন, এই আমার স্বজাতি ও স্বদেশ । হৃদয়ের দুর্বলতা দূরীভূত হইলে, কাহার সহিত আর কাহার কি সম্পর্ক থাকে, বল ।

আমরা হরগৌরী মূর্তির স্ফুট ও অস্ফুট দুইটি অর্থের ব্যাখ্যা করিয়াছি, এইক্ষণ ইহার আর একটি অর্থও সংক্ষেপে বিবৃত করিব ; এবং যেমন হৃদয়ে অবমাননায় মনুষ্য মাত্রেরই বিভ্রম হয়, হৃদয়ের অবমাননায় সমাজেরও যে, সেইরূপ কি ততোধিক বিভ্রম হইতেছে, তাহা বুঝাইতেই এস্থলে প্রধানতঃ যত্নপর হইব । আমাদিগের বুদ্ধিতে এই হরগৌরী মূর্তিতেই মনুষ্য সমাজের ভাবী সম্পদ প্রতিভাসিত ।

মনুষ্যসমাজ পৃথিবীর সর্বত্রই নিতান্ত রুগ্ন, জীর্ণ ও বিকৃত অবস্থায় রহিয়াছে । সামাজিক জীবনে কোথাও শান্তি নাই, কোথাও সুখ নাই, কোথাও ভবিষ্যতে বিশ্বাস নাই । যাহারা আশা করেন, তাঁহারা নিরাশ হইয়া দীর্ঘ নিঃশ্বাস নিষ্ক্ষেপ

করেন ; যাঁহারা প্রথম হইতেই নিরাশ, তাঁহারা আশাভঙ্গের  
তীব্র হুঃখ অনুভব না করিলেও, চিরদিন নিরুৎসাহ ও নিরানন্দ  
রহেন। ইহা কেন ? সমাজ অবিরত আবর্তিত হইতেছে,  
অথচ ইহার উন্নতি হয় না ;—মনুষ্য সমাজসংস্করণের জন্য,  
ইতিহাস, অর্থবাদ, বিজ্ঞান, দর্শন প্রভৃতি সকল শাস্ত্রের সাহায্য  
লইতেছে,—কখনও কাব্যের সুধারসস্বাদে দিব্য-শক্তি লাভ  
করিয়া নূতন সৃষ্টি করিতেছে, কখনও বিবেকের অক্লুশতাড়নে  
অধীর হইয়া, যাহা পুরাতন, তাহা ভাঙ্গিয়া ফেলিতেছে ; কিন্তু  
তথাপি মনুষ্যের মনস্তাপ ঘুচিতেছে না, মনে তৃপ্তি হইতেছে  
না। ইহার কারণ কি ? এই কুটসমস্ত্রা সমাজবিজ্ঞানের বীজ-  
সূত্র ; আর যাঁহারা পণ্ডিত, তাঁহারাই ইহার আলোচনা করিতে  
সমর্থ, এবং তাঁহারাও ইহার প্রকৃত মীমাংসায় অসমর্থ। তাঁহা-  
দিগের মধ্যে প্রত্যেকেই এই প্রশ্ন অবলম্বনে এক এক অভিনব  
তত্ত্বের অবতারণা করিয়াছেন ; এবং কেহ রাজনীতি, কেহ ধর্ম-  
নীতি, কেহ বা সমাজনীতির শত শাখায় বিচরণ করিয়া, পরি-  
শেষে বেথান হইতে আরম্ভ, সেখানেই অবসন্নচিত্তে ফিরিয়া  
আসিয়াছেন।

আমাদিগের বিশ্বাস এই যে, মনুষ্যসমাজে যত যত প্রকারের  
দুরবস্থা ও বিকার পরিলক্ষিত হইতেছে, তাহার সমুদয় গুলিই  
এক-কারণ-সম্ভূত নহে। অতএব একটি কারণ নির্দেশ করিলেই  
সমাজের বাহ্য ও অভ্যন্তরীণ সমস্ত ব্যাধির কারণ নির্দেশ হইবে,  
এমন সম্ভব হইতে পারে না। একদিকে দেখিতেছি আভিজাত  
অভিমান কুসুমকোরকস্থ কীটের মত সমাজের মর্ম্মস্থানে দংশন  
করিতেছে, সামাজিক-শক্তির বিকাশের পথে সহস্র প্রতিবন্ধক  
জন্মাইয়া, সমাজ বিশেষকে শতাব্দী পশ্চাৎ রাখিতেছে,—আর  
একদিকে দেখিতেছি, পশুশক্তি ত্রায়ের উপর আধিপত্য স্থাপন

করিয়া স্বাধীনতাকে স্বেচ্ছাচারে পরিণত করিয়া তুলিতেছে, এবং যাহা লজ্জাকর, ঘৃণাকর ও লোকের অহিতকর, তাদৃশ কার্যনিচয়কেও অতি মনোহর পরিচ্ছদ দিয়া, সমাজে প্রচলিত করিয়া উঠাইতেছে। এখানে দেখিতেছি, মনুষ্য, পাশে প্রবর্তনার জন্ত, বহুবিধ কৃত্রিম বস্তুর বিপণি সাজাইয়া, মনুষ্যকে তাহাতে আত্মন করিতেছে; স্থানান্তরে দেখিতেছি, যাহারা অপরাধী, তাহারা নির্দোষ নিরপরাধ ব্যক্তিদিগের স্বন্ধে সকল ভার চাপাইয়া দিয়া, আপনারা অস্পৃষ্ট শরীরে সরিয়া পড়িতেছে। সমাজে বিভিন্নজাতীয় ব্যাধির এইরূপ বিভিন্ন কারণ। কিন্তু যদি তথাপি সোপানের পর সোপানে আরোহণ করিয়া, বহু কারণের এক-কারণ নির্দেশ করা আবশ্যক হয়, আমরা অক্ষুণ্ণ মনে বলিব যে, সমাজে হরগৌরীর বিচ্ছেদ, অথবা নরনারীর অসামঞ্জস্যই সমস্ত সামাজিক ব্যাধির মূল। যাবৎ না ইহা তিরোহিত হয়, তাবৎ কি কখনও সমাজশক্তির পূর্ণবিকাশ হইবে?

কি উন্নত-ইউরোপ, কি উন্নত-আমেরিকা, কি গৌরব-দ্রষ্ট এশিয়া, কি তিমিরাবৃত আফ্রিকা, ইহার সকল দেশে এবং সকল সমাজেই আমরা মনুষ্যের সমবেত-বুদ্ধি এবং সমবেত-বাহুবলের বিবিধ কার্য দেখিতে পাইতেছি, কোথাও সমবেত-হৃদয়ের কোনরূপ কার্য দেখিতে পাই না। সুতরাং যে দেশ ও যে সমাজ বুদ্ধিবলে ও বাহুবলে সমৃদ্ধ হইয়া উঠিতেছে, সেই দেশ ও সেই সমাজই জগতের পূজা ও পুষ্পাঞ্জলি পাইতেছে, এবং যে দেশ ও যে সমাজ বুদ্ধিবল ও বাহুবল বিষয়ে ক্ষীণ হইয়া পড়িতেছে, সেই দেশ ও সেই সমাজই সৰল প্রতিবেশীর পাদ-পীড়নে দিন দিন অধঃপাতে যাইতেছে। তোমরা যাহাকে উন্নতি বল, যাহাকে সভ্যতা বল, যে সকল কার্যকে উনবিংশ

শতাব্দীর অক্ষয় গৌরব বল, তত্তাবতের অন্তঃপ্রবাহেও কি বুদ্ধি-  
বল এবং বাহুবল ব্যতীত আর কোনরূপ সামাজিকবল দৃষ্টি-  
গোচর হয় ? মনুষ্য উত্তরোত্তর বুদ্ধিবলে বলীয়ান্ হইয়া, সাগরের  
গর্ভ হইতে মণি, মুক্তা, প্রবাল ও রত্ন আহরণ করিতেছে,—  
অদ্রিয় পাষণবন্ধঃ ভেদ করিয়া, আপনার পথ খুলিতেছে ; এবং  
মনুষ্য উত্তরোত্তর বাহুবলে বলীয়ান্ হইয়া, দুর্কলের নিষ্পেষণে  
নিত্য নূতন মহিমা দেখাইতেছে,—যে দরিদ্র, তাহার সর্বস্ব লুণ্ঠন  
করিয়া, যে ধনী, তাহার ভাণ্ডার পূর্ণ করিয়া দিতেছে । সমাজে  
ইহা ছাড়া আর কি হইয়া থাকে ? পুরাবৃত্তের স্তবকে স্তবকে কি  
এই একই কাহিনীরই নানারূপ বর্ণনা নহে, এবং লোকের  
কণ্ঠেও কি এই একই কথাই ভ্রমণ করে না ? ইংলণ্ড, ফ্রান্স, জার্মানী  
ও রুসিয়া প্রভৃতি সুসভ্যরাজ্যে কোটি কোটি প্রাণী উদরের  
জ্বালায় অসংখ্য চক্ষু দ্বারা অবনীকে কলুষিত করিতেছে ;  
কোন স্থানে গো মহিষের ঞ্চায় পুত্রকণ্ঠা বিক্রয় হইতেছে ;  
কোন স্থানে গণিকাবৃত্তির স্রোত ভয়ঙ্করবেগে বহিয়া যাইতেছে ;  
কোথাও আকাশের চন্দ্র তারা ক্রনহত্যাদি দেখিয়া দেখিয়া, ভয়ে  
থর থর কাঁপিতেছে ; এবং কোথাও স্ত্রীহত্যা, মাতৃহত্যা ও পিতৃ-  
হত্যা পাপের অসহভারে পৃথিবী বসিয়া পড়িতেছে ; অথচ ঐ  
সমস্ত রাজ্যের অধিনায়কেরা কেবল নিজ নিজ বাহুবলবুদ্ধি ও  
অত্মকে বঞ্চনা করিবারই আয়োজন করিতেছেন, সমাজে আর  
কি হয় না হয়, তৎপ্রতি ক্রক্ষেপ করিবারও অবসর পাইতেছেন  
না । ইহাই কি মনুষ্যসমাজের প্রাকৃত অবস্থা ? বিধাতা কি  
মানবজাতিকে বুদ্ধি ও বাহু এই দুইটি মাত্র শক্তিই প্রদান  
করিয়াছিলেন ?—না, মনুষ্যসমাজের সঙ্কাজ্ঞীণ বৈভবের জন্ত,  
তাহাতে অসংখ্য শক্তিরও অঙ্কুর রোপণ করিয়াছিলেন ?

সামাজিক মনুষ্য এ সকল কথার উত্তর দিতে অক্ষম । সে



বাক্তিবিশেষের চারিত্রবিকাশের জন্য হৃদয়ের আবশ্যকতা স্বীকার করিলেও, সমগ্র সমাজের জন্য তাহা স্বীকার করে না ; সে হৃদয়হীন আটলা ও বরজিয়াকে পশু বলিয়া ঘৃণা করিতে প্রস্তুত হইলেও, হৃদয়হীন মনুষ্যসমাজকে পশুসমাজ বলিতে তাহার ইচ্ছা হয় না । তাহার এই কামনা যে, স্বার্থই প্রত্যেক সমাজের একমাত্র লক্ষ্য থাকিবে, বুদ্ধি সেই স্বার্থের অনুসরণ করিবে, এবং বাহ্যল বুদ্ধির সহায় ও সেবক হইয়া, যথেষ্ট বিচরণ করিতে রহিবে । সে এই নিমিত্তই সমাজের একাধিকে সর্ববিধ সামাজিক সম্পদে বঞ্চিত করিয়া, গভীরতম অন্ধকারে ফেলিয়া রাখিয়াছে ;—এবং সে এই নিমিত্তই, যাহারা ক্ষতদেহে প্রেলেপ, যাহারা রোগে ঔষধ, শোকে সাহসনা, দুঃখে সহানুভূতি, এবং পরার্থচিন্তায় মূর্ত্তিমতী প্রীতি, আজি সমাজের হৃদয়স্বরূপ সেই অবলাজাতিকে ক্রীড়ার পুতুল কি পদসেবার দাসীভাবে নিয়োজিত রাখিয়া নিশ্চিন্ত রহিয়াছে ।

সমাজের এই অবস্থা কতদূরে পরিবর্তিত হইবে, তাহা বলিতে পারি না । সমাজে বণিগৃহীতি ও বঞ্চনা দিন দিন যেরূপ আদর পাইতেছে, কাব্যে লোকের যেরূপ অশ্রদ্ধা জন্মিতেছে, মুদ্রাময়ী মহাদেবতার প্রভাব ও প্রভুত্ব যেরূপ বাড়িয়া উঠিতেছে, এবং পরপীড়নাদি অস্বরবাবহারে লোকের অবজ্ঞার ভাব যেরূপ কমিয়া যাইতেছে, তাহাতে শীঘ্র যে কোন মৌলিক পরিবর্তন উপস্থিত হইবে, এমন আশা করি না । কিন্তু ইহা অকুতোভয়ে নির্দেশ করিতে পারি যে, যে দিন মনুষ্য প্রকৃতির কশাঘাতে উদ্বোধিত হইয়া, সামাজিক-যন্ত্রচালনে বুদ্ধিবল ও বাহুবলের সঙ্গে হৃদয়বলেরও আবশ্যকতা স্বীকার করিবে, সমাজের হরগৌরী সে দিন রিযুক্ত ও বিচ্ছিন্ন না রহিয়া, পরস্পর মিলিত হইবে । আর যে দিন হইতে এই হরগৌরী-সম্মিলনে সমাজের উভয়ার্দ্ধ এক

হইয়া, সমাজের সম্পদ-বর্ধনে ও সম্ভাপ-হরণে, সমাজের শাসনে ও গঠনে সমানরূপে ত্রুতী রহিবে, সে দিন হইতে মনুষ্যের শোণিত শোষণ অপেক্ষা মনুষ্যের শরীর-পোষণেই মানবজাতি অধিকতর মনোযোগ দিবে ;—বিজ্ঞান সে দিন হইতে হত্যাকাণ্ডে সহায়তা না করিয়া, সামাজিক দুঃখ-ভার-মোচনেই অনুকূলতা করিতে থাকিবে,—বীরের অস্ত্র অকারণ প্রযুক্ত না হইয়া, অনাথ, অশ্রয় ও দীন দুর্বলের বল বিধান করিবে ;—এবং সে দিন হইতে শ্বেত কৃষ্ণে তারতম্য, অবস্থাভেদে ব্যবস্থাভেদ, ক্ষুধা তৃষ্ণা ও দারিদ্র্য-পাপের প্রায়শ্চিত্তে কারাবাস, কারাগৃহের নরক, এবং স্বজাতির শ্রীবৃদ্ধির জন্য পরজাতির অস্থিচর্কণ প্রভৃতি কলঙ্করাশি পৃথিবী হইতে প্রক্ষালিত হইয়া যাইবে ।

---

# শক্তি ।

তান্ত্রিকেরা যে মূর্তিকে শক্তি বলেন, এবং বাহার পদসেবাকে প্রত্যক্ষ স্বর্গের সোপান বলিয়া উপদেশ করেন, এই প্রবন্ধে তাঁহার উল্লেখ হইতেছে না। আমরা যে শক্তির প্রসঙ্গ করিব, উহা নিরাকার হইয়াও সাকার, এবং সাকার হইয়াও নিরাকার। উহা এক অখচ বহু। উহার চক্ষু নাই, অখচ বিশ্বের সকল চক্ষু উহার শাসনের অধীন। উহার হস্ত নাই, অখচ উহাকে উল্লঙ্ঘন করিয়া, জগতের একখানি হস্তও পরিচালিত হয় না। উহার চরণ নাই, অখচ তাড়িতবেগও উহার নিকট পরাজিত। কিন্তু আমরা কিরূপে এই নিত্য-অমুভূত, অখচ অনির্বচনীয় পদার্থের ব্যাখ্যা করিব? শব্দের অর্থ প্রকাশের জন্য দার্শনিকগণ যেরূপ সংজ্ঞাপ্রণালী অবলম্বন করেন, আমাদিগের নিকট এস্থলে তাহা ভাল বোধ হইতেছে না। সংজ্ঞা দ্বারা মনোগত ভাব পরিষ্কৃত করা বড়ই কঠিন। বাহারা পারেন, তাঁহারা কৃতী। আমরা এই নিমিত্ত, ‘শক্তি’ এই শব্দটির সংজ্ঞা করিতে যত্নবান্ না হইয়া, কতিপয় উদাহরণ দ্বারা উহার অর্থ প্রকাশ করিতে প্রয়াস পাইব।

মনে কর, কেহ তাপিত কলেবরে গৃহপ্রাঙ্গণে উপবিষ্ট রহিয়াছেন; আর সমীরণের মৃদুমন্দ হিলোল, যেন ক্রীড়াচ্ছলে, স্পর্শে স্পর্শে, তাঁহার সেই তাপিত অঙ্গ শীতল করিতেছে। সেই সুখোপবিষ্ট ব্যক্তি, হয় ত এতক্ষণ সমীরণের সুশীতল স্পর্শসুখই অনুভব করিতেছেন;—সমীরণ, কিরূপ সমস্তোচ্চ ভাবে, উদ্যা-

নের লতায় লতায় কুসুম চুষন করিয়া, বিচরণ করিতেছে,—  
কিরূপ আদরের সহিত সম্মুখস্থিত তরুরাজির নবোদগত পত্রাবলী  
ক্ষণে ক্ষণে বিকম্পিত করিতেছে,—কিরূপ প্রণয়িজনোচিত যত্নের  
সহিত তাঁহার শরীরের স্বেদবিন্দুচয় অপনয়ন করিতেছে, তাহাই  
দেখিতেছেন ও ভাবিতেছেন। উহা যে, জড়প্রকৃতির একটি  
অতিপ্রধান শক্তি, তাহা তাঁহার মনে প্রতিভাত হইতেছে না।  
কিন্তু তিনি যখন আবার সেই মূছবাহিসমীরণকে ভয়ঙ্কর বেগে  
প্রবাহিত হইতে অবলোকন করেন,—যখন দেখিতে পান যে,  
উহা আর তরুর পত্রে পত্রে এবং ফুলের দলে দলে খেলিতেছে  
না, কিন্তু ঘোরগভীর গর্জনে বিশ্ব চমকিত করিয়া, মূলের সহিত  
তক উৎপাটন করিতেছে এবং তরুর সহিত লতার বন্ধন ছিন্ন  
বিছিন্ন করিয়া ফেলিতেছে; তখন তিনি, স্বভাবতঃই উহার  
শক্তিগত্বা অনুভব করিয়া, ভয়ে ও বিস্ময়ে স্তম্ভিত হন। প্রকৃতির  
শক্তি মূর্তিমতী হইয়া প্রকাশিত হইলে, কে তাহার অস্তিত্বে  
সন্দেহান্বিত হইতে পারে?

শুধু সমীরণ নহে, জড়জগতের সকল শক্তিই এইরূপ স্বতঃ-  
প্রতীয়মান। উষার শিশিরবিন্দু ছুঁদাদলে মুক্তাহারের স্ত্রায়  
শোভা পায়;—প্রভাতের দীপশিখা নিভু নিভু জ্বলিতে থাকে,  
এবং কি এক অপূর্ব সৌন্দর্য্য ধারণ করে। দেখিয়া, লোকের  
দেখিবার জন্ত আরও ইচ্ছা হয়। তৎকালে, জল কিম্বা অগ্নির  
শক্তি একবারও মনে সমুদিত হয় না। কিন্তু গিরিপ্রস্থ হইতে  
প্রলয়-ধারার স্ত্রায় প্রপতিত জলধারা অবলোকন করিলে; অথবা  
পৰ্য্যটনক্রমে, কোন সময়ে দাবদাহের ভয়ঙ্কর মূর্তির সম্মুখীন  
হইলে, সেই বিস্ময়জনক বেগ,—সেই ত্রাসের ধ্বজাধিপতী  
লোলজিহ্বা, জল এবং অগ্নিকে সহজেই সৃষ্টির দুটি অতিপ্রধান  
শক্তি বলিয়া প্রতীতি জন্মায়। জড়জগতের যে সকল শক্তি

নিয়ত আমাদিগের উপর কার্য্য করিতেছে, আমরা এইরূপে বিনা যত্নেই তাহাদের পরিচয় পাইতে পারি। দিবসে যামিনীতে, জাগ্রত কি নিদ্রিত সকল অবস্থাতে আমরা উহাদের অধীন। মৎস্ত যেমত জলরাশির অভ্যন্তরে অবস্থান করে,—ওষ্ঠে পৃষ্ঠে ললাটে সকল দিকেই জল; জলে ভাসে, জলে ডুবিয়া যায়, জড়শক্তির শক্তি নিচর সম্বন্ধেও আমাদিগের অবস্থা ঠিক সেইরূপ। জড়শক্তি জলের ত্যাক্ষরশীভূত হইয়া, আগাদিগকে সৰ্ব্বতোভাবে পরিবেষ্টন করিয়া রহিয়াছে; আমরা মৎস্তের ন্যায় উহার অভ্যন্তরে সঞ্চরণ করিতেছি। অগাধ অনন্ত জড়শক্তি-সাগরে আমরা প্রাক্ষিপ্ত কুসুমের ন্যায় ক্ষণে ভাসিতেছি, ক্ষণে ডুবিতেছি; ক্ষণে ক্ষণে ইতস্ততঃ পরিচালিত হইতেছি। আমরা ছাড়িলেও; উহা আমাদিগকে ছাড়ে না। আমরা শৃঙ্খলচ্ছেদ করিয়া, দূরে পলায়ন করিতে চাহিলেও, উহা আমাদিগকে পলায়ন করিতে দেয় না।

কিন্তু আমরা কি জড়শক্তির বন্দনা কি বর্ণনার জন্য এই প্রজ্ঞাবের অবতারণা করিয়াছি? তাহা নহে। আমরা জড়শক্তিকে অপরিহার্য্য বলিয়া জানিলেও, আরাধ্য বলিয়া মানি না। উহার আরাধনায় আমাদিগের মন আপনা হইতে প্রধাবিত হয় না। উহা অন্ধ এবং অতীব নিষ্ঠুর। উহার কাল অকাল জ্ঞান নাই, পরের সুখ দুঃখ সম্পদ বিপদ, কিছুতেই দৃকপাত নাই। মাতা, মেষের বাহুবলী প্রসারণ করিয়া, সন্তানকে ক্রোড়ে তুলিয়া লইতে অগ্রসর হন; জড়শক্তি, উহার লোহ হস্ত বাড়াইয়া, সেই সন্তান কাড়িয়া লয়। যুবতী, প্রেমভরে কণ্টকিতকলেবরা হইয়া, অনিমেঘনয়নে প্রিয়তমের নয়নপানে নিরীক্ষণ করিতে থাকে, জড়শক্তি, কুংকার দিয়া, সেই নয়নালোক জন্মের মত নির্বাপন করিয়া ফেলে। জড়শক্তির নিয়ত স্তুতিপাঠক-

বৈজ্ঞানিক পণ্ডিতগণ শতমুখে উহার স্তুতিগীত গান করিতেছেন,—উহার উপাসনায় অহোরাত্র নিবিষ্ট থাকিয়া, পৃথিবীতে উহার পূজাপদ্ধতি প্রচার করিতে সর্বতোভাবে মত্তপর হইতেছেন। বিজ্ঞানশাস্ত্রের ক্ষুদ্র ও বৃহৎ সমস্ত গ্রন্থই জড়শক্তির গুণানুবাদে পরিপূর্ণ রহিয়াছে। জড়শক্তি সম্বন্ধে আমরা সাহা লিখিলাম, তাহা শুদ্ধ উদাহরণের অনুরোধে। মানব-লোক অথবা মনোজগতের অভ্যন্তর-নিহিত যে সকল শক্তি জড়শক্তি নহে, অথচ সর্বত্র সর্বথা অনুভূত হইতেছে; যে শক্তিচয়কে সমীরণের ন্যায় স্পর্শন অথবা জল কিংবা অগ্নির ন্যায় দর্শন করা যায় না, অথচ আছে বলিয়া প্রতিক্ষণ স্বীকার করিতে হয়, সেই অজড়শক্তির অস্তিত্বচিন্তার পথপ্রদর্শনই আমাদের প্রধান উদ্দেশ্য।

কোন স্থানে বৃহৎ এক শিলাখণ্ড নিপতিত রহিয়াছে; কেহ, বাহবলে তাহা উত্তোলন করিয়া, অবহেলায় শতপাদ দূরে ফেলিয়া দিল। এই কার্যে সকলেই পূর্বোন্নিখিত জড়শক্তির প্রয়োগ স্বীকার করিবে। ইহাতে মানুষী শক্তির সংশ্রব আছে, এইরূপ বিশ্বাস করিবার কিছুমাত্র কারণ নাই। আবার কল্পনা কর, কোন স্থানে সহস্র লোক একত্র হইয়া, প্রমত্তের ন্যায় কোলাহল করিতেছে। কে কাহার বক্ষোবিদারণ, কে কাহার শোণিত পান করিবে, এই চিন্তাতেই সকলে ব্যতিব্যস্ত। নিক্ষেপিত তরবারি চতুর্দিকে ধ্বনিত হইতেছে, এবং রবির কিরণ-স্পর্শে তৎসমুদয় আবার এমন ভয়ঙ্করভাবে ঝলসিতেছে যে, দর্শকবৃন্দ ভয়ে চিত্তিত পুত্তলের ন্যায় স্পন্দহীন। এমন সময়ে, এক প্রশান্তমূর্ত্তি পুরুষ, নিরস্ত্র করে, নিঃশব্দ মনে, তথায় উপস্থিত হইলেন। তিনি কাহারও নিকটবর্ত্তী হইলেন না, কাহাকেও ছুঁইলেন না, এবং কাহারও হস্ত হইতে একখানি তরবারি

কাড়িয়া লইলেন না। কিন্তু তাঁহার সেই প্রশান্ত চক্ষু হইতে সকলের উপর পুনঃপুনঃ দৃষ্টিপাত হইতে লাগিল, তাঁহার জিহ্বা হইতে গুটিকত ধ্বনি বিনিঃসৃত হইল, আর অমনি সমস্ত কোলাহল নিবৃত্ত। একখানি বাহুও আর নড়ে না; একখানি তরবারিও আর সঞ্চালিত হয় না। যেন কি এক মন্ত্রপ্রয়োগে সেই মহাত্মা সকলকে একবারে মুগ্ধ করিয়া ফেলিলেন। অথবা মনে কর, কোন স্থানে সৈনিকগণ, শত্রুসেনা সমাগতপ্রায় দেখিয়া, ভয়ে কাঁপিতেছে; কি করিবে, কোথায় যাইবে, স্থির করিতে না পারিয়া, আপনার অঙ্গে আপনি লুকায়িত হইতেছে, সম্মুখ-সংগ্রামে শত্রুর নিকটবর্তী হওয়া অপেক্ষা আত্মহত্যাও শ্রেয়স্কর জ্ঞান করিতেছে। ঈদৃক্ বিপদের অবসরে, এক বোনা-পাটি, সহসা তাহাদিগের মধ্যে প্রবিষ্ট হইয়া, ধীরগম্ভীরস্বরে গুটিকত কথা দ্রবীভূত লোহের ন্যায় তাহাদিগের হৃদয়ে ঢালিয়া দিলেন;—স্বকীয় তাড়িতদৃষ্টির সঞ্চালন দ্বারা সকলের মানস-ক্ষেত্রে এক নূতন তেজ প্রেরণ করিলেন। আর, ভীকু বীরমদে গর্জিয়া উঠিল। যে, ক্ষণপূর্বে, শত্রুকে সিংহ মনে করিয়া, থর থর কাঁপিতেছিল, এক্ষণ তাহাকে তৃণজ্ঞানে আপনার প্রদীপ্ত ক্রোধহতাশনে আহুতিস্বরূপ অর্পণ করিতে উদ্যত হইল। উল্লিখিত ঘটনাদ্বয়ে জড়শক্তির সম্পর্ক নাই। উহাতে যে শক্তির অনির্লস্কণীয় মহিমা প্রকাশিত হইয়াছে, তাহারই নাম মানুষ্য শক্তি। মানুষ্য যদি মানুষ্যত্ব লাভে কৃতার্থ হইতে চাহে, তাহা হইলে মানুষ্য শক্তিরও আরাধনা হউক।

ইহা বলা বাহুল্য যে, এই উভয় উদাহরণই ইতিহাস হইতে সঙ্কলিত। অনুসন্ধান করিলে ইতিহাসে এইরূপ শক্তিপ্রয়োগের দৃষ্টান্তস্বরূপ সহস্র সহস্র ঘটনার উল্লেখ দৃষ্ট হইবে। বস্তুতঃ ইতিহাসে অনুসন্ধান না করিয়াও, আমরা মনঃশক্তির

অসংখ্য দৃষ্টান্তস্থল প্রাপ্ত হইতে পারি । এক শত লোক একত্র হইয়া, কোন এক কার্যে প্রবৃত্ত হয় ; একজন তন্মধ্যে আপনা হইতে কর্তা হইয়া বসে । সে কাহারও নিকট কর্তৃত্বের সনন্দ পায় নাই, কর্তা বলিয়া কখনও অভিহিত হয় নাই ; তথাপি সে আপনার বলে আপনিই কর্তা । এক সময়ে যাহারা তাহার সঙ্গী ও সহচর ছিল, এইক্ষণ তাহারা তাহার অধীন । ইচ্ছা করিলেও অধীন, ইচ্ছা না করিলেও অধীন । তাহার দাসত্ব-শৃঙ্খল সকলের গলদেশে আভরণের স্থায় হুলিতে থাকে ; এবং নিজ নিজ অস্তিত্ব তাহার অস্তিত্বে ডুবাইয়া দিয়া, নিজ নিজ মনুষ্যত্ব তাহার মনুষ্যত্বে মিশাইয়া ফেলিয়া, সকলে তাহারই কর্ণে শ্রবণ করে ।

এইরূপে উপলব্ধ হইবে যে, জড়শক্তিও যেমন বাস্তব পদার্থ, কাহারও কল্পনার কথা নহে ; মনঃশক্তিও সেইরূপ প্রত্যক্ষ-পরিজ্ঞাত বাস্তব পদার্থ, শুদ্ধ একটি বাক্য নহে । জড়শক্তির নিকটও সমস্ত জগৎ যেমন আপনা হইতে শাক্ত, অজড় মনঃশক্তির নিকটও মনুষ্যমাত্রেই সেইরূপ স্বয়মিচ্ছু ভক্ত । রাজা, প্রজা কেহই কোন সময়ে মনঃশক্তির সেবা না করিয়া থাকিতে পারেন নাই । পুরাকালেও লোকে মনঃশক্তির নিকট কৃতাজ্ঞালিপুটে দণ্ডায়মান হইয়াছে, আজও সেইরূপ হইতেছে, এবং শক্তি ও শাক্তের এই নিকট সম্বন্ধ ভবিষ্যতেও অব্যাহত থাকিবে, সন্দেহ নাই ।

মানুষী শক্তির কার্যক্ষেত্র দুই ;—জড়জগৎ এবং মনো-জগৎ । জড়জগতের উপর উহা কিরূপে আপনার আধিপত্য বিস্তার করিয়াছে, তাহা সকলে প্রত্যক্ষ করিতেছে । অনন্ত জড়জগতে মনুষ্য শুদ্ধ দুখানি হাত, দুখানি পা লইয়া প্রবেশ করিয়াছিল । এইক্ষণ দেখ, মনুষ্যই জড়জগতের রাজা । জড়-



রাজ্যের সকল বিভাগ হইতেই তাহার রাজকর গৃহীত হইতেছে ; তদীয় জয়-বৈজয়ন্তী সর্বত্র শোভা পাইতেছে । আকাশের বজ্র বিদ্যুৎ তাহার বার্তাবাহকের কার্য্য করে ; সাগর স্বকীয় উন্নিবক্ষে তাহার দেশদেশান্তর-যাতায়াতের পর ধুলিয়া দেয় ; জল, অগ্নি, বায়ু প্রভৃতি সমস্ত ভূতশক্তি ভূতোর হ্রায় তাহার দ্বারে বন্ধাঞ্জলি দণ্ডায়মান ।' যখন যাহার প্রতি যে আদেশ হইতেছে, মস্তক নত করিয়া, তৎক্ষণাৎ সে তাহা প্রতিপালন করিতেছে । যে এক সময়ে শত্রু ছিল, সে এইক্ষণ মিত্র হই-  
 যাচ্ছে । যে এক সময়ে প্রত্ন ছিল; সে এইক্ষণ সেবকের হ্রায় পরিচর্যা করিতেছে ।

প্রসঙ্গের অতিক্রম হয় বলিয়া, এ বিষয়ে আমাদিগের অধিক কিছু বক্তব্য নাই । মানুষী শক্তি মনোরাজ্যে কিরূপ কার্য্য করে, তাহাই আমরা এইক্ষণ অতিসংক্ষেপে আলোচনা করিতে ইচ্ছা করি ।

একটুকু চিন্তা করিলেই প্রতীতি হয় যে, মনের খেলার জন্ত মনোরাজ্যই সর্বাপেক্ষা উৎকৃষ্ট স্থান । মানুষী শক্তি মানব-জগতে যেরূপ বিকাশ লাভ করিতে পারে, অন্য কুত্রাপি সেরূপ সম্ভবে না । জড়রাজ্যে উহার গতি অব্যাহত, স্তব্ধাংশ শিথিল । কিন্তু মানবজগতে উহাকে সর্বদাই প্রতিবন্ধকের সহিত সাক্ষাৎ সংগ্রাম করিতে হয় । মনুষ্যে মনুষ্যে নিয়ত প্রতিদ্বন্দ্বীর ভাব বিদ্যমান রহিয়াছে । মুখে একের সহিত অন্তরের বিরোধ না থাকুক, বাহিরের আচরণে বিরোধের কোন লক্ষণ লক্ষিত না হউক, অথবা স্থলদর্শীরা তাহাদিগকে পরস্পর প্রণয়বদ্ধ বলিয়াই বিশ্বাস করুক ; তাহাদিগের অভ্যন্তরীণ শক্তিগত বিরোধ তথাপি চলিতে থাকিবে । জল যেমন স্বভাবতঃ নিম্নদিকে প্রধাবিত হয়, মনুষ্যও তেমন স্বভাবতঃ স্বাধীনতা ভালবাসিয়া

থাকে। স্বাধীনতা তাহার প্রাণের প্রাণ। মানুষের আত্মা জ্ঞানস্বারে হউক, আর অজ্ঞাতসারে হউক, আশানাস্ত চিকিৎসা না করিয়া, স্বাধীনতা বিসর্জন করে না। জল, অগ্নি, বায়ু প্রভৃতি জড়পদার্থ নিচয়ের উপর আধিপত্য স্থাপন করা যেমন সহজ, মানুষের উপর আধিপত্য স্থাপন করা মানুষের পক্ষে সত্য সত্যই তেমন সহজ নহে। সম্বন্ধে যিনি বতদূর গৌরবাসিত, ঘনিষ্ঠ, কিম্বা প্রিয় হউন, মানুষের মন, শেষ পর্য্যন্ত না দেখিয়া, কখনই সাধ করিয়া তাঁহার অধীন হইবে না। ইহা মানবজাতির প্রকৃতিবিরুদ্ধ ভাব। এইরূপে মানুষো মানুষো যাতপ্রতিঘাত চলিতে থাকে; পরিশেষে, যিনি পরীক্ষাতে অধিকতর শক্তিসম্পন্ন বলিয়া অনুভূত হন, তিনি প্রভুর পদ লাভ করেন; এবং হীনশক্তি ব্যক্তি আপনা হইতেই তাঁহার নিকটে কৃতাজ্ঞলিপুটে শাক্ত অথবা সেবক বলিয়া দণ্ডায়মান হয়। অনেক মানুষের বাহিরের জীবন পর্যালোচনা করিয়া, আপাততঃ এইরূপ সংস্কার হইতে পারে যে, তাহাদিগের প্রকৃতিতে শক্তির কণামাত্রও বর্তমান নাই। তাহারা পরপ্রভুতার শৃঙ্খল এমন প্রিয়জ্ঞানে বহন করে যে, তাহাদিগকে অমানুষ বলিলেও কোন দোষ হইতে পারে না; কিন্তু ইহা আমাদের দেখিবার ভ্রম। আমরা যে সকল পুরুষকে একবারে শক্তিহীন মনে করি, তাহারাও বস্তুতঃ শক্তিহীন নহে। তবে কথা এই, তাহাদিগের শক্তি অতি দুর্বল। যেমন বর্তিকার ক্ষীণ আলোক স্বায়ুর প্রতিকূলে বহুক্ষণ দণ্ডায়মান থাকিতে পারে না, তাহাদিগের দুর্বল শক্তিও প্রবলতর শক্তির সংঘাতে তেমন বহুক্ষণ তিষ্ঠিতে সমর্থ হয় না।

কবি ও দার্শনিকগণ, মানুষী শক্তির গণনা করিতে হইলে, প্রধানতঃ বুদ্ধি, হৃদয়, সাহস, বিবেক এবং চারিত্রের উল্লেখ

করিয়া থাকেন। ইহাদিগের অনেক অবাস্তর ভেদ কল্পিত হইতে পারে, এবং ইহারা প্রত্যেকেই বহুমূর্ত্তিতে লোকলোচনের গোচর হইয়া থাকে। আমাদিগের প্রয়োজনের জন্য এই বিভাগই সম্প্রতি প্রচুর। যে সকল কাব্যে, উপন্যাসে, কিস্বা ইতিহাসে মানবচরিত্র সূচাক্রমে চিত্রিত হইয়াছে, তাহার পত্রে পত্রে, পংক্তিতে পংক্তিতে, মনুষ্যপ্রকৃতির এই সকল শক্তির পরিচয় প্রাপ্ত হওয়া যায়। জনপ্রবাদও শতমুখে ইহাদিগের মহিমার সাক্ষ্যদান করিতেছে। অমুকে অমুকের বুদ্ধির নিকট পরাজিত হইয়াছে, অমুকের হৃদয় শত্রুকেও মুগ্ধ করিতে সমর্থ হয়, অমুকের লাহসের নিকট কেহই অগ্রসর হইতে পারে না, অমুকের চারিত্র্যগুণে সংসার বশীভূত, ইত্যাদি গভীর অর্থবৃক্ষ বাক্য লোকের মুখে মুখে ভ্রমণ করিতেছে।

মনুষ্যের এই সমস্ত শক্তি নামমাত্র গ্রহণ সময়ে আমাদিগের হৃদয়কে কম্পিত করে না; প্রয়োগ কালে পৃথিবীও উহাদিগের ভরে বিচলিত হয়। মানব-মন এবং মানব-সমাজের গঠন, বিকাশ, স্থিতি, পরিবর্ত্ত এবং ক্ষয়বৃদ্ধির উপর ইহারাই চিরকাল কর্ত্ত্ব করিয়া আসিতেছে। ইহাদিগেরই শাসনে কেহ সিংহাসনে উঠিতেছে, কাহারও সিংহাসন টলিতেছে; কোন নূতন সাম্রাজ্য গঠিত হইতেছে, কোন পুরাতন সাম্রাজ্য, পুরাতন জীর্ণ প্রাসাদের ভাষ, চূর্ণ হইয়া পড়িতেছে; দেশে রুচির স্রোত পরিবর্ত্তিত হইতেছে; নীতি নিত্য নূতন মূর্ত্তি ধারণ করিতেছে; কোথাও সমাজ উৎপন্ন হইতেছে, কোথাও সমাজ উৎসন্ন হইয়া যাইতেছে। ইতিহাস আর কিছুই নহে, মানুষী শক্তি মানবজগতে কিরূপে স্বাধিকার প্রসারণ করিয়াছে, তাহার এক দীর্ঘকাহিনী।

## সাধনা ও সিদ্ধি ।



মনুষ্যালোকে যাহা কিছু সুখকর, যাহা কিছু বাঞ্ছনীয়, তাহাই সাধনাসাপেক্ষ । বিনা সাধনায় কিছুতেই সিদ্ধি হয় না । বিদ্যা, বৈভব, মান, প্রণয়, প্রভুত্ব, পরাক্রম, চারিত্র-বল, আত্মশোধন, স্বজাতির উন্নতি, স্বদেশের গৌরববিস্তার, স্বাধীনতা অথবা স্বর্গসুখ, ইত্যাদি সর্বপ্রকার সম্পদই সাধনার অধীন । সাধনায় বজ্রবিদ্যুৎ ভূতোর কার্য্য করে, পর্ব্বত স্বকীয় পাষাণবন্ধ বিদারণ করিয়া, সাধকের গতয়াতের জন্ত পথ খুলিয়া দেয়, অন্ধকার আলোকের আয় দৃষ্টির সহায় হয়, এবং যাহা কল্পনার চক্ষেও কেহ দেখিতে পায় না, তাহা স্বাভাবিক কার্য্যের আয় সুসম্পন্ন হইয়া যায় । এই নিমিত্তই সাধনার নাম ব্রত, সাধনার নাম তপশ্চর্যা, এবং সাধনার নাম যোগ । যাহারা সাধনার পথে পথিক হইয়া, যত্নসহকারে ব্রত পালন করেন,—তপস্বীর আয় উহাতেই একবারে ডুবিয়া যান, তাঁহারা সিদ্ধ হন । যাহারা তাহা না করিয়া, চিরকালই শ্রোতের জলে ভাসিতে থাকেন, তাঁহারা চিরকালই ঐরূপ ভাসমান রহেন ।

যিনি যে বিষয়ে সিদ্ধকাম হইতে চাহেন, তাঁহাকে তত্বপ-যোগিনী সাধনা অবলম্বন করিতে হয় । যথা, যিনি সরস্বতীর সাধক, তাঁহার একরূপ সাধনা ; যিনি জাতীয় স্বাধীনতারূপ মহামন্ত্রের সাধক, তাঁহার আর একরূপ সাধনা । যিনি প্রভুত্বের সাধক, তাঁহার একরূপ সাধনা ; যিনি প্রেমের সাধক, তাঁহার আর একরূপ সাধনা । গ্যালিলিও আর গ্যারিবল্ডী, শঙ্করাচার্য্য

আর শিবজী অথবা হাওয়ার্ড আর ক্রমওয়েল, এবং চৈতন্য ও প্রতাপাদিত্য, ইহারা সকলেই অতি শ্রেষ্ঠ কল্পের সাধক, অথচ ইহাদিগের সাধনা বিভিন্ন প্রকারের। ইহাদিগের কাহারও হস্তে বীণা, কাহারও হস্তে ভেরী। কেহ কেবলই কুসুম চয়ন করিয়াছেন, কেহ কেহ কেবল কণ্টক চয়ন করিয়া, তদ্বারাই পরিশেষে কুসুমকোমল শয্যা রচনা করিয়াছেন। কেহ নিরবচ্ছিন্ন অশ্রুবর্ষণ করিয়াছেন, কেহ অশ্রুর মূলপ্রস্রবণ পর্যাস্ত শোষণ করিবার জ্ঞাত, আপনার ছৎপিওকেও ছিঁড়িয়া ফেলিয়াছেন। কিন্তু এই স্রষ্টাকোও একতা আছে, এই বিভিন্নতার মধ্যও কতকগুলি নিয়ম বিষয়ে অভিন্নতা দৃষ্ট হইয়া থাকে। আমরা এই প্রবন্ধে সর্ববিধ সাধনার বাজস্বত্রস্বরূপ সেই সাধারণ নিয়মগুলিই অতি সংক্ষেপে বিবৃত করিতে চেষ্টা করিব।

সাধনার প্রথম অঙ্গ, উদ্দেশ্যনির্ধারণ—অথবা মন্ত্রপরিগ্রহ। কৃত্তী পুরুষেরা বহুচিন্তা, বহুপর্যাবেক্ষণ এবং নিজ হৃদয়ে বহু আলোচনার পর কোন না কোন মন্ত্রে দীক্ষিত হন, এবং শয়নে, জাগরণে, নির্জনে কি লোকারণ্যে সতত ঐ ইষ্টমন্ত্রই জপ করিতে রহেন। এই মন্ত্রগ্রহণেই মনের একতা এবং এই একা-গ্রতাতেই উন্নতি। নাবিক যেমন গভীর অন্ধকারের মধ্যে নক্ষত্রবিশেষের প্রতি চক্ষুঃ স্থির রাখিয়া, সমুদ্রের অনন্ত বিস্তার ভেদ করিয়া চলিয়া যায়, প্রকৃত সাধকেরাও সেইরূপ আপনার মূলমন্ত্রে মনঃসন্নিবেশপূর্বক অনন্ত সংসারসমুদ্রের তরঙ্গরাজি ভেদ করিয়া, ক্রমশঃ অগ্রসর হন। সূতরাং তাঁহাদিগের দৃষ্টি অর্থযুক্ত, এবং তাঁহাদিগের হস্ত, উল্লাস, আমোদ, উৎসব, ভোগ, বিলাস, শ্রম ও বিরাম সমস্তই অর্থযুক্ত। তাঁহাদিগের প্রতিপদনিষ্ক্ষেপেই জীবনের এক একটি কার্য্য। তাঁহাদিগের গতি স্থির।

যখন ইটালীর চিরকীৰ্ত্তিস্বরূপ ক্ষণজন্মা রায়েঞ্জী, রোমের দুৰ্দ্ধরত দুৰ্দ্ধৃত অভিজাতদিগের প্রমোদগৃহে উপবিষ্ট রহিয়া, সুরসিক বিদূষকের দ্বায় তাহাদিগকে প্রতিদিন নানাবিধ নূতন কথায় পরিতুষ্ট করিতেন,—কখনও হাসিতেন, কখনও হাসাইতেন, কখনও আপনাকে হাস্যাস্পদ করিয়া, পরের মন ঘোঁগাইতেন ; যদি কেহ তখন তাঁহার হৃদয়ের অভ্যন্তরে প্রবেশ করিয়া, তদীয় ইষ্টমন্ত্ৰ পাঠ করিতে পারিত, সে নিশ্চয়ই ভয়ে কণ্টকিত কিংবা ভক্তিতে স্তম্ভিত হইত । মূৰ্খেরা তাঁহাকে আমোদলহরীর ফেনা মাত্র মনে করিত, কিন্তু তিনি নিয়ত আপনার মন্ত্ৰ সাধন করিতেন । যখন মন্ত্ৰিবর কলবার্ট, চতুর্দশ লুইর স্বর্ণময় সিংহাসনের এক পার্শ্বে অতি নির্যোথের মত দণ্ডায়মান থাকিয়া, ক্রতাজলিপুটে রাজনিয়োগ পালন করিতেন, যদি পুরাতন রাজপুরুষগণ তাঁহার সেই লাবণাশূত্র, মাধুর্য্যবিহীন নিস্তেজ মূৰ্ত্তির বহিরাবরণ ভেদ করিয়া, তিনি কি নাম জপ করিতেছেন, তাহা তখন জ্ঞানিতে পাইতেন, তবে তাঁহারা তদগুণেই তাঁহাকে উন্নীলিত করিয়া ফেলিতেন । জন্মান্ত পৌরবর্গ তাঁহাতে কেবল রূপেরই অভাব দেখিত ; কিন্তু তিনি তখন গুণগত পরাক্রমের এক আশ্চর্য্য প্রাসাদ নিৰ্ম্মাণেই অহোরাত্র যত্নপর রহিতেন । যখন বীরশ্রেষ্ঠ বোনাপার্টি, যোসিফিনের মৃণালনিন্দিनी বাহুলতা অবলম্বন করিয়া, পারীসের তদানীন্তন প্রভু প্রসিদ্ধনামা বেরাসের বিহারভবনে তালে তালে নৃত্য শিক্ষা করিতেন, যদি কেহ তখন তাঁহার অন্তরতম মস্তকের অক্ষুট গর্জ্জন শ্রবণ করিতে সন্মর্থ হইত, সে নিশ্চয়ই আতঙ্কে অধীর হইয়া দূরে সরিয়া পড়িত । লোকে ভাবিত, তিনি নৃত্য শিখিতেছেন ; কিন্তু যে তালে সমগ্র ইউরোপ এক সময়ে ভয়ানকরূপে নৃত্য করিয়াছিল, তিনি তখন সেই রুদ্রতাল অভ্যাস করিতেন । পৃথিবীতে যাহারা কার্য্য

করিয়া গিয়াছেন, তাঁহাদিগের সকলেরই এইরূপ এক একটি মন্ত্র ছিল। তাঁহারা মন্ত্রবলে পৃথিবীকে স্বর্গে তুলিয়া লইয়াছেন, অথবা স্বর্গের শোভা সম্পদ পৃথিবীতে আনিয়া, ছড়াইয়া দিয়াছেন,—মৃতদেহে জীবনী দান করিয়াছেন, এবং পুতুল ও ক্রীড়া-কন্দুক লইয়া পর্বত ভাঙ্গিয়াছেন।

যাহারা কোন মন্ত্রেই দীক্ষিত নহে, তাহাদিগের সকলই ইহার বিপরীত। তাহাদিগের জীবন অর্থশূন্য, তাহাদিগের গতি বাতহিল্লোলে ভ্রণের মত। তাহারা কখনও উত্তরে যায়, কখনও দক্ষিণে গড়াইয়া পড়ে, কখনও পূর্বদিকে প্রবাহিত হয়, কখনও প্রতিকূলবায়ুতে পশ্চিমে নীত হইতে থাকে। তাহাদিগের মন্ত্র নাই, মন্ত্রসাধনা নাই, সূতরাং কিছুই ‘কার্য্য’ নাই। ক্ষুধার সময়ে তাহারা আহার করে, নিদ্রার সময়ে তাহারা শয়ান রহে; কেহ জাগাইলে তাহারা একটুকু জাগে বা না জাগে, কেহ না জাগাইলে তাহারা ঐরূপ পড়িয়া থাকে। লালসা আর ইচ্ছা এক নহে। লালসা প্রবৃত্তির দাসী, প্রবৃত্তিরই অমুগামিনী ;— ইচ্ছা অধীশ্বরী, প্রভাবশালিনী। লালসা প্রবৃত্তির উদ্রেকে উদ্ভিক্ত হয়, প্রবৃত্তির নিদ্রিতাবস্থায় নিদ্রিত রহে। ইচ্ছা আপনার ক্ষমতাতেই আপনি উদ্ভিক্ত থাকিয়া, সমস্ত প্রবৃত্তির উপর আধিপত্য করে। বস্তুতঃ ইচ্ছা একটি মহতী শক্তি। যাহারা মন্ত্রদীক্ষিত, তাঁহারা লালসামুক্ত, কিন্তু ইচ্ছাশিত; তাঁহাদিগের ইচ্ছা প্রগাঢ়, ঘনীভূত, কেন্দ্র-নিবদ্ধ। তাঁহাদিগের বুদ্ধি, হৃদয় ও সর্বপ্রকার মানসিক বৃত্তি সম্পূর্ণরূপে তাঁহাদিগের ইচ্ছাধীন। আর যাহারা উল্লিখিত প্রকার মন্ত্রহীন, তাহারা ইচ্ছাশূন্য, কিন্তু লালসান্বিত। তাহাদিগের সমুদয় মনোবৃত্তিই স্বতন্ত্ররূপে কার্য্য করে, কোনটিই কাহারও প্রভুত্ব মানে না। যদি তাহাদিগের মনে ইচ্ছার কিঞ্চিদ্ভ্রাতৃ ক্ষুণ্ণ জন্মে, সে ইচ্ছা

গাঢ় হয় না, ঘনীভূত হয় না, এবং কোন একটি বিশেষ কেন্দ্রে নিবদ্ধ হইতে পারে না বলিয়াই কদাপি ফলে আসে না ।

সাধনার দ্বিতীয় অঙ্গ রহস্যরক্ষা অথবা মন্ত্রগুপ্তি । মন্ত্রগুপ্তি মন্ত্রসিদ্ধির কিরূপ অনুকূল, তাহা সহজে বুঝান এক কঠিন বাপার । কিন্তু যাঁহারা, কল্পনার বিনোদকাননে বিচরণ না করিয়া, মানবজীবনের বহুকণ্টকময় দুর্গম শৈলে পাদচারণা করিয়াছেন, যাঁহারা লোকপ্রকৃতির বহির্দেশেই চিরদিন অজ্ঞের ভ্রায় দণ্ডায়মান না থাকিয়া, চিন্তার সহায়তায় উহার অন্তঃপুরে প্রবেশ করিতে পাইয়াছেন, তাঁহারা দেখিয়াছেন, তাঁহারা বুঝিয়াছেন, তাঁহারা ভূয়োভূয়ঃ এইরূপ উপদেশও দিয়াছেন যে, কোন মন্ত্রই মন্ত্রগুপ্তির ভূর্ভেদাবশ্যবিরহে দীর্ঘকাল সজীব থাকে না । যে মন্ত্র সাধকের হৃদয়মধ্যে কুপোদক-নিক্লিপ্ত-লোষ্ট্রবৎ লুক্কায়িত রহিল, তাহা মন্ত্র, বাহ্য লোকের মুখে মুখে পরিভ্রমণ করিল,—এক কর্ণের পর আর এক কর্ণ এইরূপ করিয়া, সহস্র কর্ণে যাতায়াত করিতে লাগিল, তাহা কথা । কথায় কার্য্য হয় না, কার্য্য বাহ্য হয়, তাহা মন্ত্রে । অতএব মন্ত্র যাহাতে কথায় পরিণত না হয়, এ বিষয়ে যত্ন করা সর্ব্বতোভাবে বিধেয় ।\*

খৃষ্ট বলিয়াছেন, ‘তোমার দক্ষিণহস্ত যে কার্য্য করে, তোমার বামহস্ত যেন তাহা জানিতে না পায় ।’ অধুনাতন খৃষ্টীয় ইউরোপ দানাদি সম্বন্ধে এ বিধির অনুবর্ত্তী হইয়া না থাকিলেও, মনোগোপন বিষয়ে ইহা অক্ষরে অক্ষরে প্রতিপালন করিয়া, কৃতার্থতা লাভ করিয়াছে । বলিনের লৌহময়ী রাজনীতি শুদ্ধ মন্ত্রগুপ্তির মহিমাভাষেই বাহুবলদৃষ্ট উদ্ধত ফরাসিজাতিকের পদতলে

---

\* তত্ত্বাদি প্রাচীন শাস্ত্রে এইরূপ আছে যে, গর্দভের কর্ণে মন্ত্র কহিলে, সে মন্ত্র নিষ্ফল হইয়া যায় । ইহার এই অর্থ যে, গর্দভ বড় মুখর ।



আনিয়াছে। রুসিয়া মন্ত্র-গোপনবিদ্যায় অসাধারণ কৃতিত্ব লাভ করিয়াছে বলিয়াই, সমস্ত প্রতিবেশীকে সতত শঙ্কান্বিত রাখিতে সমর্থ হইয়াছে। রোমের বর্তমান রাজবৈজয়ন্তী মন্ত্রগুপ্তির প্রসাদেই পুনরায় রোমীয় প্রাসাদসমূহে বহুদিনের পর শোভা পাইতেছে, এবং ব্রিটিশ মন্ত্রণাও এশিয়া এবং আফ্রিকায় বিশ্বাস-বিমুক্ত রাজ্যনিচয়ে এই-হেতুতেই সমধিক প্রভাবের সহিত কার্য্য করিয়া আসিতেছে।

এইরূপ প্রবাদ আছে যে, পণ্ডিতবর পিথাগোরাস তদীয় শিষ্যবর্গকে পাঁচ বৎসর কাল মোননী রহিতে বাধ্য করিতেন, এবং যে এই পাঁচ বৎসরের মোনব্রত সাধুতার সহিত উদযাপন করিতে সক্ষম হইত, তাহাকে পরিগৃহীত শিষ্যজ্ঞানে শিক্ষা দিতেন, যে তাহাতে অক্ষম হইত, তাহার নিকট হইতে এক-বারে বিদায় লইতেন। স্থূলদর্শী ব্যক্তির পিথাগোরাসের এই কঠিন নিয়মে যত কেন উপহাস করুন না, ইহার প্রকৃত অর্থ অতীব গভীর। মোনে মনোনিধান, মোনে গাম্ভীৰ্য্য এবং মোনব্রতেই চিন্তাসংঘের প্রথম সোপান। কোন কোন ক্ষীণ-প্রাণ মনুষ্য যে, বিনা প্রয়োজনেও মন্মনিহিত গূঢ়সংকল্প অথবা সম্প্রদায় বিশেষের গূঢ়মন্ত্র প্রকাশ করিয়া ফেলে, ইহার কারণ কি?—না সে তরল, সে লঘু, সে ভারবহনে অসমর্থ, সে লৌকিক যশের জন্ত লালায়িত। সে অগাধ-জলসঞ্চারী অবি-কারী রোহিতের স্থৈর্য্য ও অটলতায় কি মাহাত্ম্য আছে, তাহা বুঝিতে পারে না। তাহার হৃদয় শফরীর মত, উহা গণ্ডূষ-জলেই নৃত্য করিয়া সুখানুভব করে। ক্রোধের স্ফুৰ্ত্তি দূরে থাকুক, কার্য্য আরম্ভ না করিয়াই, সে তাহার পরিণামভোগ্য প্রশংসাবাদের জন্ত অস্থির হইয়া উঠে। অবলা যেমন অবলার কণ্ঠে ভর করিয়া, অকারণেও মনের সুখদুঃখঘটিত কথা লইয়া

আমোদ করে, সেও রাজ্যের উত্থান ও পতন এবং সমাজের সৃষ্টি-বিপ্লব-ঘটিত ভয়ঙ্কর কথা লইয়া, আমোদ করিতে সেইরূপ ভালবাসে । পরের চক্ষেই সে সর্বদা দেখিতে চাহে, পরকীয় দৃষ্টিতেই সে বিলম্বিত রহে । সুবিখ্যাত রিশিলু এই শ্রেণির পুরুষদিগকে পুরুষদেহে জ্বীলোক বলিতেন । আমরাও ইহাদিগকে জ্বীলোকের দোষযুক্ত বলিয়াই, রূপার নয়নে দেখিয়া থাকি । ইহাদিগকে যত ইচ্ছা শ্রদ্ধা কর, প্রীতি কর, কাহারও তাহাতে আপত্তি নাই ; প্রমোদপ্রসঙ্গে ইহাদিগের সাহচর্য্য গ্রহণ কর, তাহাতেও কাহারও ক্ষোভ হুংথ নাই । কিন্তু মন্ত্ৰ-ভবনে ইহাদিগকে কখনও আহ্বান করিও না । কারণ, ইহারা মন্ত্ৰরক্ষায় অসমর্থ, ইহারা স্বভাবতঃ অসিদ্ধ ।

সাধনার তৃতীয় অঙ্গ উৎসাহ অথবা মন্ত্ৰমদ ; চতুর্থ অঙ্গ উদাম অথবা মন্ত্ৰপ্রয়োগ ; পঞ্চম অঙ্গ আয়োগ্যোৎসর্গ অথবা মন্ত্ৰার্থ আভূতি ; ষষ্ঠ অঙ্গ অধাবসায় অথবা মন্ত্ৰ-শক্তিতে নির্ভর এবং শেষ ও সপ্তমাত্র অপরাজিত সহিষ্ণুতা অথবা মন্ত্ৰপূতচক্ষে কাল-প্রতীক্ষা । এই পাঁচটি সাধনার প্রাণ । ইহাদিগের সংমিশ্রণে মনে কি যে, এক অপূর্ণ অবস্থা জন্মে, ভাষা আপনিই তাহা যথোচিতরূপে ব্যক্ত করিতে পারে না ।

কে বলে যে, মনুষ্য দুর্বল ?—কে বলে যে, রোগে মনুষ্যের শক্তিস্বাস হয়, শোকে তাহাকে দাহন করে, বয়োবৃদ্ধিসহকারে জরা আসিয়া তাহাকে গ্রাস করিয়া ফেলে, এবং হুংথ, দারিদ্র্য ও নানাবিধ দুর্ঘটনায় তাহার আত্মা অবসন্ন হইয়া পড়ে ? যাহার হৃদয়ে উৎসাহের উদ্দীপনা নাই, এবং স্মৃতির আত্মায় স্মৃতি ও অন্তরে চৈতন্য নাই, তাহার পক্ষে এ সকলই সম্ভব বটে । সে বিনা রোগেও রুগ্ন, বিনা বার্কক্যেও জরাজীর্ণ, এবং শোক হুংথের কশাঘাত বিনাও চিরম্লান, চিরবিষন্ন, চির-

কালের জন্য অকর্শণ্য। কিন্তু যাহারা মল্লমদে প্রমত্ত, তাঁহাদিগের কথা স্বতন্ত্র। তাঁহারা কখনও বৃদ্ধ হন না, এবং জীবনের অন্তিমক্ষণেও তাঁহারা উৎসাহশূন্য ও উদ্যমহীন হইয়া, মনুষ্য-জীবনের অসারতা প্রতিপাদন করেন না। তাঁহাদিগের হৃদয়ের রক্তে রক্তে এক অনির্ব্বচনীয় তেজঃপ্রবাহ প্রবাহিত হয়; উহা তাঁহাদিগের প্রত্যেক ধমনীতে তাড়িত বেগ প্রদান করে, এবং শরীর যখন ছাড়িয়া দেয়, হস্তপদ শিথিল হইয়া পড়ে, তখনও উহা তাঁহাদিগকে কেমন এক আশ্চর্য্য প্রভাবে যুবার মত সজীব রাখে।

মহায়া ওয়াসিংটন অতিবৃদ্ধ বয়সেও যখন স্বজাতির ভবিষ্যৎ চিন্তা করিতেন, তখন তাঁহার নিস্তেজ নেত্র প্রদীপ্ত হইয়া উঠিত, তাঁহার নিষ্পন্দদেহ শক্তির পুনঃসঞ্চারে পুলকিত হইত। তাঁহার উৎসাহ ও উদ্যম নিদ্রাবস্থায়ও তাঁহাকে পরিত্যাগ করে নাই। ডেনিয়েল ওকোনেল যখন জীবন ও মৃত্যুর সন্ধিস্থলে দণ্ডায়মান, আয়র্লণ্ডের মঙ্গলকামনা তখনও তাঁহার হৃদয়ে তরঙ্গ তুলিত, এবং তাঁহার পবিত্র রসনা হইতে তখনও যে দুই একটি বাক্য বহ্নিকণার জ্বালায় স্থলিত হইত, সহস্র সহস্র হৃদয়ে তাহা এক ভয়ানক দাবানল জালিয়া দিত। নিরুৎসাহ ও অবসাদ কাহাকে বলে, হার্শোল্ড তাহা কখনও জানিয়া যান নাই। যে বয়সে অন্যেরা বৈরাগ্যের ভজনা করে, বিষয়ে বীতরাগ হইয়া, নিরবচ্ছিন্ন দীর্ঘনিঃশ্বাসেই সময়োতিপাত করিতে ভালবাসে, অথবা অতীতস্মৃতির আশ্রয় লইয়া, পুরাতন কথার রোমন্থন করিতে যত্নপর रहे, তিনি তখনও যৌবনের নূতন মত্ততায় জ্ঞান সাধন করিতেন, এবং মুহূর্ত্তের পর মুহূর্ত্তে নূতন কিছু লাভ করিবার জন্য, যার পর নাই আকুল रहিতেন। লর্ড পামাষ্ট'ন যখন চক্ষু মেলিয়া চাহিতেও কষ্ট অনুভব করিতেন, ক্রসিয়ান

তখনও অনেকে অনিদ্র ও উৎকর্ণ রহিয়া, তাঁহার মন্ত্রণার মৰ্ম্মার্থ-  
ভেদ করিতে চেষ্টা করিত । চিরজীবি টিয়ার ভূষণী কাকের  
মত ফরাসি-রাষ্ট্রবিপ্লবের ভূকম্প দেখিয়াছেন, প্রথম নেপো-  
লিয়ানের বিজয়দুন্দুভিনাদে নৃত্য করিয়াছেন, তৃতীয় নেপোলি-  
য়ানকে পিতৃব্যেরই সিংহাসনে অধিকৃত দেখিয়া, করতালি দিয়া-  
ছেন, আবার সে দিন সিড়ানের বিপৎপাতের পর হইতে পারি-  
সেয় রুধিরাক্ত দেহে ঔষধি লেপন করিয়া, আপনি যে অদ্যাপি  
ইহলোকেই রহিয়াছেন এবং অদ্যাপি স্বদেশেরই সেবা করিতে-  
ছেন, সংসারকে তাহা কার্য্যতঃ জানাইয়াছেন ।\* লোকে এই-  
রূপ বলিয়া থাকে যে, বৃটিশ রাজতরণীর বর্তমান কর্ণধার বার্ককে  
অত্যন্ত জড়িত হইয়াছেন । কিন্তু আজও বৃটিশ প্রাণ তাঁহার  
উৎসাহে উৎসাহিত হইতেছে ; বৃটেনিয়ার মন্দীভূত প্রতাপ-  
স্রোত তাঁহারই অভিঘাতে বেগে বহিতেছে । সাধকের উৎসাহ  
ও উদ্যম সৰ্ব্বত্র ও সকল সময়েই এইরূপ । উহা দ্রবীভূত বহি ।  
যে উহা নিভাইতে কিংবা উহার গতিরোধ করিতে যায়, সে  
আপনিই উহাতে পুড়িয়া মরে ।

সাধক সম্প্রদায়ের আত্মোৎসর্গ ইহা অপেক্ষাও অধিকতর  
বিস্ময়জনক । তাঁহাদিগের এই আত্মোৎসর্গই যথার্থ আরাধনা ।  
ভক্ত যেমন আপনাকে আরাধ্য দেবতার পদারবিন্দে পুষ্পা-  
ঞ্জলিস্বরূপ সমর্পণ করিয়া, উহাতেই বিলীন হইতে কামনা  
করেন, তাঁহারাও সেইরূপ তনু, মন, প্রাণ সৰ্ব্বস্বই তাঁহাদিগের  
আরাধ্য মস্ত্রে আহুতিস্বরূপ উৎসর্গ করিয়া, নিজ নিজ পৃথগ-  
স্তিত্বও উহাতেই নিমজ্জিত করিয়া দেন । তখন তাঁহারা  
তদগত, তন্ময় হন । সুখ তখন তাঁহাদিগকে সুখী করে না, প্রশং-

---

\* যখন এই প্রবন্ধ লিখিত হয়, তখন টিয়ার জীবিত ছিলেন ।

সার মুহূ, মোহন, মধুব ধ্বনি তখন তাঁহাদিগের চিত্তকে আকর্ষণ করিতে সমর্থ হয় না, মন স্নেহ মমতার মায়াময় বন্ধনীতে বদ্ধ হইতে চায় না, এবং কিছুই তাঁহাদিগকে তখন দক্ষিণে কি বামে হেলাইতে পারে না। তখন তাঁহারা অত্যন্ত জীবিত এবং এই হেতুতেই অত্যন্ত মৃত, অথবা অত্যন্ত মৃত এবং এই হেতুতেই অত্যন্ত জীবিত রহেন। বায়ীকির অস্ত্রিগঞ্জর হইতে রাম নামের জায় তাঁহাদিগের মন্মাস্থি হইতেও তখন কেবল একই নামই নির্গত হয়, এবং তাঁহাদিগের পরিগৃহীত মন্ত্র যত কেন হুঃসাধ্য হউক না, আশ্বোৎসর্গের অভাবনীয় বলেই তখন তাহা সূসাধ্য হইয়া উঠে।

কাব্য ও পুরাণে বাহাদিগের বর্ণনা দৃষ্ট হয়, সেই সমস্ত প্রাচীন সাধকগণ শীতের সময় হিমরাশিতে পরিবেষ্টিত রহিতেন, অতি বোরতর গ্রীষ্মের সময়ে চারিদিকে অগ্নি জালিয়া, তাহার মধ্যে উপবিষ্ট থাকিতেন। কেহ আপনার চক্ষু ছুটিকেও সাধনার পরিপন্থী বিবেচনায় উৎপাটন করিয়া ফেলিয়া দিতেন, কেহ অল্প প্রকারে মনোনিবেশে সমর্থ না হইলে, জিহ্বা কিম্বা হস্ত পদ প্রভৃতি অপরিহার্য অঙ্গ প্রত্যঙ্গও অকাতরমনে পরিবর্জন করিতেন। এ সকল কার্য সঙ্গত কি অসঙ্গত, তাহার বিচার করা এক্ষণে অনাবশ্যক। সাধারণতঃ বলিতে গেলে প্রকৃতির বিরোধী না হওয়াই শ্রেয়ঃ। কিন্তু বাহারা সাধনায় রত হইতে চান, ত্যাগ এবং আত্মনিগ্রহই তাঁহাদিগের প্রধান সহায়। যাহারা ত্যাগে ভীত, যাহারা আত্মনিগ্রহে কুণ্ঠিত, তাহাদিগের মত লোকের দ্বারা সত্যযুগেও কোন কার্য হয় নাই, কলিযুগেও কার্য হইবে না।

তুমি জ্ঞানী,—তুমি সরস্বতীর সাধক। তোমার আবার স্নেহের লালসা কেন? যদি তুমি জ্ঞানের নিম্নল আনন্দ

অপেক্ষা সাংসারিক ধ্যাতি প্রতিপত্তিকেই অধিক মনে করিলে,—  
তোমার আরাধ্য শক্তির প্রসন্নদৃষ্টি অপেক্ষা ভোগ বিলাসের  
আবিল আনন্দের জন্তই অধিকতর অধীর রহিলে, তবে তোমার  
আবার সাধনা কি ? তুমি প্রেমিক, তুমি অপার্থিব বৈভবের  
জনা লালারিত । এই বর্ণিত্বস্তিসম্পন্ন কলুষিত মনুষ্যালোকে  
যাহা স্বপ্নে বই কেহ দেখে না, কবি ও তাপস বই যাহা কেহ  
জানে না, এবং তপস্তায় ও কবিমুখে বিনা যাহার পরিচয় পাওয়া  
যায় না, তুমি সেই জ্ঞানের অগম্য অজ্ঞেয় ধনের জন্ত চির-  
তৃষিত । তোমার আবার ধন, মান, ক্ষতিলাভ গণনা কেন ?  
আর তুমি স্বদেশবৎসল ! স্বজাতির বন্ধু । তুমি যে, প্রত্যেক  
কার্যেরই পরিণাম চিন্তার পূর্বে আত্মপরিণাম চিন্তা করি-  
তেছ, দেশ-হিত-ব্রতে ব্রতী হইতে গিয়া, প্রতিক্ষণেই আত্মহিত-  
ব্রতে অগ্রসর হইতেছ, দেশীয়দিগের মধ্যে স্বাধীনতার পবিত্র  
নাম লইয়া, ধীরে ধীরে পরাধীনতার বিষাক্ত বীজ ছড়াইয়া  
দিতেছ, সকলকে স্বর্গের শোভা দেখাইবে বলিয়া, নরকে আনিয়া  
ডুবাইতেছ,—প্রভুস্বরূপ পূজা করিবে বলিয়া, পদতলে আনিয়া  
বান্ধিতেছ, তোমারও এ প্রতারণা, এ বিড়ম্বনা কিসের জন্য ?  
তুমি অগ্নিকুণ্ডে আপনাকে ভস্ম কর আর না কর, সে এক পৃথক্  
কথা । কিন্তু যদি তুমি জ্ঞান চাও, কি প্রেম চাও, কি স্বজাতীর  
অভ্যুদয় চাও, তবে আগে আপনাকে বলি দান কর,—আপ-  
নার বলিতে যাহা কিছু আছে, তাহা দূরে ফেলিয়া দাও, সাধ-  
কেব ন্যায় আপনি ক্রুশকাষ্ঠে বিলম্বিত হও, তাহার পর সিদ্ধির  
কল্পলতা হইতে আপনার আকাঙ্ক্ষিত ফল বাছিয়া লও । জনক  
রাজা যোগী হইতে পারেন নাই, তিনি তাঁহার কমণ্ডলুটি বড়  
ভালবাসিতেন । সলোমন জ্ঞানী হইতে পারেন নাই ; তিনি  
জ্ঞান অপেক্ষা সুখসন্তোগের অধিক আদর করিতেন । এবি-

লার্ড প্রেমিক হইতে পারেন নাই ; তিনি প্রেম অপেক্ষা আপ-  
নাকে অধিক জানিতেন। রবিস্পীয়ার স্বজাতির সুস্থ হইতে  
পারেন নাই ; তিনি দেশের স্বাধীনতা ও গৌরব অপেক্ষা  
আপনার স্বাধীনতা ও গৌরবের জন্ত অধিকতর ব্যগ্র রহিতেন।  
ইহারা কেহই আত্মোৎসর্গ করেন নাই।

অধাবসায় উল্লিখিত সর্বপ্রকার সাধক-ধর্মের ভিত্তি স্বরূপ।  
উহা স্বাস্থ্য অমৃত, উহা রোগে ঔষধ, এবং উহাই মূমূর্ষুর  
অবলম্ব্যষ্টি। যদি এ সংসারকে সমুদ্র বল, অধাবসায়ই তাহার  
একমাত্র ভেলা ; যদি সাধনাকে জলন্ত বহ্নি বল, অধাবসায়ই  
তাহার একমাত্র উদ্দীপনা। সাধকের হৃদয়নিহিত যে ভাব  
যখন হীন-শক্তি হইয়া পড়ে, অধাবসায়ই সেইটিকে তখন  
আশ্রয়দানে দৃঢ় করিয়া রাখে, এবং যে তেজ নির্বাণপ্রায় হয়,  
অধাবসায়ই তাহাকে পুনরায় প্রদীপ্ত করিয়া তুলে। অধাবসায়  
ভীষ্মের প্রতিজ্ঞা ; সৃষ্টিও যদি বিপর্য্যস্ত হইয়া যায়, তথাপি উহা  
টলে না ; উহা সাহসের সার, ভয়ের কোনরূপ কারণই উহাকে  
বিচলিত করিতে পারে না।

অভীষ্ট সঞ্চল প্রথম উদ্যমেই সংসিদ্ধ হইবে, এমন আশা  
করা কাহারও উচিত হয় না, এবং প্রথম পদস্থলনে কি প্রথম  
বিষদর্শনেই যাহার উদ্যম-ভঙ্গ, আশা-ভঙ্গ ও ব্রত-ভঙ্গ হয়,  
তাহার দ্বারাও কখন কোনরূপ কঠোর সাধনা হইয়া উঠে  
না। অতএব অধাবসায়ের আবশ্যকতা। সামর্থ্য আর কি ?  
অধাবসায়ই প্রকৃত সামর্থ্য। ঐ যে দুর্বল শিশু, অদূরবর্তিনী  
স্নেহময়ী জননীর আশ্বাস-প্রদ মধুর হস্তে উৎসাহিত হইয়া,  
অগ্নে অগ্নে দণ্ডায়মান হইবার ক্রম শিখিতেছে, উহার ঐ দুর্বল  
দেহলতিকা কতবার ছলিয়া পড়িবে, কতবার ক্ষত বিক্ষত  
হইবে, কে তাহা এইক্ষণ বলিতে পারে ? কিন্তু হয় ত ঐ

শিঙিটির পদভরে পৰ্জ্বতও এক সময়ে বিকম্পিত হইবে। এক-  
খানি প্রস্তরের ক্ষুদ্রতম এক অংশও উহার নিকট এইক্ষণ  
হিমাদ্রিসদৃশ ; কিন্তু অধ্যবসায় থাকিলে হয় ত উহার পদ্বের  
জায় কোমল হস্ত পিরামিড গড়িয়া তুলিবে। বস্তুতঃ, অধ্যব-  
সায়ের তুলনা নাই। অধ্যবসায় বিঘ্ন বিপত্তির সহিত ক্রীড়া  
করে, সাগর শোষণ করিয়া ফেলে, এবং সহস্র বিভীষিকা,  
বজ্রপাত ও বজ্রা বায়ুর মধ্যেও তরুলতাশূন্য তুষারমণ্ডিত অচলের  
জায় নির্ভীক ও নিষ্কম্প রহিয়া আপনার মস্ত্র আপনি সাধন  
করিতে থাকে।

সহিষ্ণুতা অস্ত্র এক পদার্থ। উহা অধ্যবসায়ের সদৃশ, অথচ  
স্বল্প দৃষ্টিতে অধ্যবসায় হইতে সম্পূর্ণরূপে বিভিন্ন। সাধারণতঃ  
সহিষ্ণুতার অর্থ ক্ষমা, সহিষ্ণুতার অর্থ মৃদুশীলতা। কেহ  
তোমায় তিরস্কার করিল, তুমি প্রত্যুত্তরে তাহাকে তিরস্কার  
করিলে না ; কেহ তোমার মস্তকে পদাঘাত করিল, তুমি  
তাহার পদনখও স্পর্শ করিলে না। লোকে ইহাকেই সহিষ্ণুতা  
বলিবে। কিন্তু সহিষ্ণুতার প্রকৃত নাম কাল-প্রতীক্ষা। যে  
কার্য্যে যশ নাই, মান নাই, আশু স্মৃথের প্রলোভন নাই এবং  
সম্মুখেও আশার উত্তেজনা নাই,—যে কার্য্যে এইক্ষণ কোনরূপ  
সহায় নাই, এবং শত বৎসরেও যাহাতে সাফল্যের সম্ভাবনা  
নাই, যিনি তাহাতেও হৃদয়-মন সঁপিয়া লিপ্ত রহিতে পারেন,  
তিনিই যথার্থ সহিষ্ণু, এবং যিনি এই প্রকার সহিষ্ণুতাকে আপ-  
নার প্রাণের মধ্যে পোষণ করিয়া, ভবিষ্যতের নিবিড় অন্ধকার  
ভেদ পূৰ্ব্বক কালের দিকে চাহিয়া থাকিতে পারেন, তিনিই  
যথার্থ সাধক, তিনিই যথার্থ পুরুষ।

প্রকৃতির সহিষ্ণুতা দেখ, আজি যে প্রকাণ্ড বটবৃক্ষ সহস্র  
বিহঙ্গকে আশ্রয় দান করিয়াছে, সহস্র তাপিতদেহ শীতল করি-



তেছে, এক সময়ে তাহা ক্ষুদ্র হইতেও ক্ষুদ্র একটি বীজ মাত্র ছিল ; প্রকৃতি ধীরে ধীরে উহাকে এইরূপ পরিবৰ্দ্ধিত করিয়াছেন। আজি যে দৃঢ় ভূমি অসংখ্য জীব জন্তুর আবাস-স্থান এবং গ্রামনগরে শোভিত হইয়াছে, এক সময়ে তাহা একটি বালুকণা মাত্র ছিল ; প্রকৃতি বালুকণার সহিত বালুকণা বান্ধিয়া, তাহাতেই ধীরে ধীরে এই আশ্চর্য্য ভিত্তি গড়িয়াছেন। আজি যে প্রশস্তভূমিয়া শ্রোতস্বিনী লক্ষ লক্ষ প্রাণীর উপজীবা এবং সমগ্র একটি দেশের সুখ ও সৌভাগ্যের ভার বক্ষে ধারণ করিয়া, গৰ্ভভরে বহিয়া যাইতেছে, এক সময়ে তাহা অতি সূক্ষ্ম একটি রজতরেখা মাত্র ছিল ; প্রকৃতি সেই রজতরেখাটিকেই ধীরে ধীরে কি না করিয়া তুলিয়াছেন ! আবার, যুগান্তের পরে যে বিপ্লব ঘটিবে, যে বিপ্লবে কত কি উচ্ছিন্ন যাইবে, কত কি উন্মূলিত হইবে,—যে বিপ্লব কোথাও প্রলয়পয়োধির তিমিরাবৃত তরঙ্গমানার তায় ভরস্কর রাবে গর্জ্জন করিবে, কোথাও কালের সর্বসংহারিণী নৃষ্টিতে জগতের সুন্দর ও কুৎসিত, স্থায়ী ও অস্থায়ী, দ্রব ও ঘন সমস্ত বস্তু লইয়া ক্রীড়া করিতে রহিবে,—যাহার স্থান প্রাশাসে অনন্ত অশনিপাত, যাহার আবর্তে আবর্তে অনন্ত জ্যোতিরাবর্ত ক্ষুটিত ও আলোকিত হইতে থাকিবে, প্রকৃতি এখনই তিল তিল করিয়া তাহার শক্তি সঞ্চয় করিতেছেন,—নীরবে, নিস্তব্ধ ভাবে, তাহার কারণ পরম্পরায় শৃঙ্খল গাঁথিতেছেন,—কেহ দেখে না, দেখিয়াও কেহ বুঝে না, এমন রূপে তাহার উপকরণ সংগ্রহে রত রহিয়াছেন। উচাই সহিষ্ণুতা। যদি অনন্ত শক্তিও সাধনাত্রেতে এইরূপ সহিষ্ণু হইতে পারে, মনুষ্য কি তবে অসহিষ্ণু হইবে ?

হায় ! যে দেশে বাবছকতাই ক্রমশঃ বৃদ্ধি পাইতেছে, আর সাধনা ক্রমশঃই বিলুপ্ত হইতেছে, সে দেশে কাহার আর কিসে

সিদ্ধি হইবে ? যে দেশে প্রত্যেকেই শতমস্ত্রে দীক্ষিত এবং মন্ত্ররক্ষায় সকলেই অশিক্ষিত, যাহাদিগের মধ্যে পরস্পরবিদ্বেষ ও আশ্ফালনের নাম উৎসাহ, চীৎকারের নাম উদ্যম, অঞ্চল-বায়ু-সেবনের নাম আত্মোৎসর্গ এবং অবিচলিত নিদ্রার নাম অধাবসায়, তাহাদিগের আর ভরসা কোথায় ? যাহারা প্রাতঃ-সূর্য্যের অভ্যাদয়ে যে কার্য্যের কল্পনা করে, সন্ধ্যা হইতে না হইতেই তাহার ফলভোগের জন্ত বাস্তব হয়,—এক রাজ্যিতেই বোম নিষ্প্রাণ করিতে চাহে, শাশ্রদগমের পূর্বেই জীবনের সকল ব্যাপার সম্পাদন করিয়া, কীর্ত্তিশৈলে আরুঢ় হইয়া বসে, তাহাদিগের আর আশা কি ? তবে জানি না, কবে সাধকের পুনরুদয় হইবে.—কবে আবার সাধনা পুনঃপ্রবর্তিত হইয়া অন্ধকারকে আলোক করিবে ।

সম্পূর্ণ ।